

2 ያኦሲ ዓሶ ሃይሶ ኬኤዛ ማፃኣፖ ዓይያ ካር

ያኦሲ ዓሶ ሃይሶ ኬኤዛ ማፃኣፖኩ ለምዓሳ ዓርቃሢ ቤርታሳ ማፃኣፖ ሃይሶ ኬኤዚ ዔቂሴ ካራፓኬ። ዬይያ፡- ካኣቲ፥ ሴሎሞኔ ካኣታዴሰካፓ ዴንዲ ሃይቃንዲያ ሄለንዳኣና ዓኣ ሃይሴኬ፤ ዒዮርቢዓሜ ሱኡጌ ማዔም ኬዶ ዛላ ዓኣ ዒሰራዔኤሌ ፃጰ ዒዛኮ ዓዶ ሴሎሞኔ ቤዛ ጌሊ ካኣታዴ፥ ዪሁዳ ካኣቲ፥ ርቢዓሜም ዋይዞ ዒፃሢ ኬኤዚሰካፓ ዴንዲ ዬሩሳላሚ ካታማ ዶዔ ዋዶ ጌይፃ ኪሪሰቶሴ ሾይንቶኮ ቤርታ ዶንኅ ፃኤታና ሳሊታሚ ላሃሳ ለፆ ሄለንዳኣና ዓኣ ዶኦሎ ዛሎ ዪሁዳ ካኣቶ ሃይሶ ፓይዲ ፓይዲ ኬኤዛኔ።

ማፃኣፔላ ዲማ ዲማ ዓርቄ ባኮ

ሴሎሞኔ ካኣታዲ ዋይሢ ዋዶ (1:1—9:31)

1. ሃጊ ዓይያ ሌዖይዳ ማዲንቲ ባኮ (1:1-17)

2. ጌኤዡ ማኣራ ማዢንቲሢ (2:1—7:10)

3. ጊንፃሳ ሌዖይዳ ማዲንቲ ባኮ (7:11—9:31)

ኬዶ ዛላ ዓኣ ዒሰራዔኤሌ ፃጰኮ ዋይዞ ዒፂያ (10:1-19)

ዪሁዳ ዓጮ ካኣቶ (11:1—36:12)

ዬሩሳላሜኮ ዶዒያ (36:13-23)

ማሊ ጳቂሥሢ ዔራቶ ዴንቃኒ ሴሎሞኔኮ ሺኢጲያ

(1ካኣቶ. ማ 3:1-15)

¹ ናንጊና ናንጋ ጎዳ ማዔ ዒዛኮ ያኦዛሢ ዒዛና ዋላ ዓኣያ ማዒ ኮሺ ዒዛ ዔርቲያ ማሄሢሮ ዳውቲ ናኣዚ፥ ሴሎሞኔ ካኣቲዋይዳ ጊኢጊንቲ ዴዔኔ።

² ዬካፓ ሴሎሞኔ ዒሰራዔኤሌ ዓሶ፥ ሺዮና ፃኤቶ ፖኦሊሶ ዓይሣ ዓሶ፥ ዋጎ ዋጋ ዓሶ፥ ዒሰራዔኤሌ ዓሶ ጉቤሢንታ ዲማ ዲማ ማኣሮ ዓሶናኮ ሱኡጎ።

³ ጌባዖኦኔይዳ ያኦሲ ካኣሸኪንታ ባኣኮ ዒዛና ዋላ ዓኣዳንዳጉዲ ዓይሣኔ፤ ዒኢካ ዔያታ ዓኣዳሢ ናንጊና ናንጋ ጎዳኮ ዓይላሢ፥ ሙሴ ዓሳ ናንጉዋ ዳውሎይዳ ማዢ ናንጊና ናንጋ ጎዳ ዴርና ካኣማ ዓፒሎ ማኣራ ጌባዖኦኔይዳ ዓኣሢሮኬ።

4 ጫክቁሞ ሳኦፂና ጋዓንቴ ካኦቲ ዳውቴ ቂርያቸይዓሪሚ ካታሞይዳፓ ዔኪ ሙኬ ዋዶና ዩሩሳላሚይዳ ዬያሞ ገኢጊሼ ዓፒሎ ማኦርይዳ ዓኦኔ።

5 ሆሬ ናኦዚኮ ናኦዚ ዑሬ ናይ ባስሊዔኤሌ ጎዖሢ ሞኦኖ ዓንጎይዳፓ ኮሼ ሚቺ ዒንጎ ቤዛ ዒኢካ ገባዖኦኔይዳ ዓፒሎና ማዢንቴ ያኦሲ ዴርና ካኦማ ማኦርኮ ቤርቶ ዛላ ዓኦኔ፤ ዒኢካ ካኦቲ ሴሎሞኔንታ ዴራኦ ቢያ ናንጊና ናንጋ ጎዳና ካኦማኒ ኮዔኔ፤

6 ካኦቲያ ዓፒሎና ማዢንቴ፥ ያኦሲ ዴርና ካኦማ ማኦሪሎኮ ቤርቶ ዛላ ዓኦ ሞኦኖ ዓንጎና ኮሾና ሚቺ ዒንጎ ቤዛ ዑፃ ሚቺ ዒንጎ ባኮ ሺኢሼኔ፤ ዒማና ፔቴ ሺያ ቆልሞ ሹኪሲ ዒንጎ ቤዛይዳ ጉቤና ሚቺንታንዳጉዲ ዒ ማሄኔ።

7 ዬኖ ዋንቴሎ ያኦሲ ሴሎሞኔም ፔጋዲ ጴዳዮ፡- «ታ ኔኤም ዓይጎ ዒንጋንዳጉዲ ኔ ኮዓይ?» ጌይ ያኦጩኔ።

8 ዒማና ሴሎሞኔ ማሃዮ፡- «ታ ዓዶ ዳውቴም ኔ ዴኤፒ ኮሺ ባኦዚ ማዴኔ፤ ታና ዒዛ ቤዛ ሃሢ ኔ ካኦታሢኔ።

9 ናንጊና ናንጋ ጎዳ ማዔ ያኦሲዮ! ታ ዓዶም ኔ ጉሙርሲ ከኤዜ ቃኦሎ ከጎሢ፤ ሃያ ሚርጉማ ዓጪጉዲ ማዔ ዴርይዳ ኔ ታና ካኦታሢኔ፤

10 ዬያር ኔኤኮ ዴር ፒዜ ዔኪ ዓኦዲኒ ታና ዳንዳዒሳ ማሊ ጳቂሥሢና ዔራቶና ታኦም ዒንጌ፤ ያዲ ማዒባኦያታቶ ጋዓንቴ ሃያ ኔኤኮ ዴኤፖ ዴር ዋዲ ታ ዔኪ ዓኦዳንዳይ?» ጌዔኔ።

11 ዬካፓ ያኦሲ ሴሎሞኔም፡- «ኔ ኔ ቶኦኪም ያርጎቹሞ፥ ቆሎ፥ ኔኤኮ ሞርካ ሃይቃንዳንጉዲ፤ ሃሣ ሚርጌ ሌዔ ናንጋኒቱዋንቴ ኔኤኒ ዔያቶይዳ ካኦታዳንዳጉዲ ታ ማሄ፥ ታኦኮ ዴር ፒዙሞና ዔኪ ዓኦዲኒ ኔና ዳንዳዒሳ ማሊ ጳቂሥሢና ዔራቶና ኔ ያኦጩሢ፤

12 ሃይሾ ኔ ታና ያኦጩ ጳቂሢያና ዔራቶና ታ ኔኤም ዒንጋንዳኔ፤ ቃሲ ሃሣ ሃያኮ ቤርታ ዋያ ካኦቲ ማዔቴያ ዴንቂያና ሴካ ቤርቲማኦ ዴንቃኒ ዳንዳዓያይዳፓ ባሼ ያርጎቹሞ፥ ቆሎና ዴኤፒ ሱንሢያ ታ ኔኤም ዒንጋንዳኔ» ጌዔኔ።

ካኦቲ ሴሎሞኔኮ ቢታንቶንታ ቆሎንታ

(1ካኦቶ. ማ 10:26-29)

13 ሴሎሞኔ ገባዖኦኔይዳ ያኦሲ ዴርና ካኦማ፥ ዓፒሎና ማዢንቴ ማኦራ ዓኦ ባኦካፓ ዩሩሳላሚ ዓኦዴኔ፤ ዒዚ ፔኤኮ ናንጎ ቤዛ ዒኢካ ማሂ ዒሰራዔኤሌይዳ ካኦታዴኔ።

14 ሴሎሞን ዒማና ፔቲ ሺያና የይዶ ጃኤታ ሳርጌላ የይታና ታጾ ላምዖ ሺያ ፓርና ዶዲ የላ ዓሲ ገአጊሻየ ዔያቶይዳፓ ዛሎ ዬሩሳላሜይዳ፥ ዓቲ ዓሶ ሃሣ ሃንጎ ዱማ ዱማ ካታማ ናንጋንዳጉዲ ፓቂ ፓቂ ገሣኔ።

15 ሴሎሞን ካኣታዲ ዓኣ ዎዶና ዬሩሳላሜይዳ ዎርቆና ቢሮናኮ ሚርጉማፓ ዔቄያና ዓዳ ቃንዖ ማዔኔ፤ ሃሣ ዴኤሎ ዚቢቆ ሚርጉማኣ ዪሁዳይዳ ገሜሮ ዴማ ጉቤ ቤዛ ባቃላ ቦኦቦጉዲ ፓይዲንቴኔ።

16 ካኣቲኮ ፓራሢ ሙካሢ ገብፄና ቁዌ ዓጮናፓኬ፤ ካኣቲኮ ኮርሞ ኮርማ ዓሳ ዬያ ፓራሢ ቁዌይዳፓ ሻንቃኔ።

17 ገብፄይዳፓ ዔያታ ጌልዛሢ ፔቲ ሳርጌሎ ላንካይ ከሎ ገራኣሜ ማዓ ቢራና፤ ሃሣ ፔቲ ፓሮዋ ፔቲና ዛላና ከሎ ገራኣሜ ማዓ ቢራና ሻንቁኬ፤ ዬያ ባኮ ገንሣ ዔያታ ሂኢታ ዓሶንታ ሶኦሪ ዓሶ ካኣቶም ሻንቻኔ።

2

ጌኤዢ ማኣሮ ማዢን ገአጎና ገአጊንቲ (1ካኣቶ. ማ 5:1-18)

1 ካኣቲ ሴሎሞን ናንጊና ናንጋ ጎዳ ሱንዎም ጌኤዢ ማኣሮና ካኣቲሞ ማኣሮና ማዢን ማሌኔ፤

2 ዬያሮ ዒዚ ኬዲ ኬዳንዳ ላንካይታሚ ሺያ ዓሲ፥ ሹቺ ጳላንዳ ሳሊታሚ ሺያ ዓሲ ኬሲ ማዳንዳጉዲ ዓይሣኔ፤ ዬያጉዲ ሃሣ ማዶ ዛጊ ማዳሻንዳ ሃይሃ ሺያና ላሆ ጃኤታ ማዓ ዓሲ ገአጊሹኔ።

3 ዩካፓ ዒዚ ፂሮሴ ካኣቲ፥ ከራሜም፡- «ታ ዓዴ ዳውቲ ፔኤኮ ካኣቲሞ ማኣሮ ማዢኛ ዎዶና ሊባኖኦሴ ሚዖ ኔ ዳኬሢጉዲ ታኣማኣ ዳኬቴራ፤

4 ሃሢ ታኣኒ ናንጊና ናንጋ ጎዳ ማዔ ታ ያኦዛሢም ጌኤዢ ማኣሮ ማዢን ገአጊንቲዳ ዓኣኔ፤ ዬይ ጌኤዢ ማኣሮ ታኣና ታ ዴሮና ሳውቃ ዑንጆ ጩቢሲ ናንጊና ናንጋ ጎዳ ኑ ካኣሽካ ቤሲ፥ ዒዛም ዱማዴ ካሃዋ ቢያ ዎዴ ኑ ዒንጋ ቤሲ፥ ቢያ ኬሊ ጉቲና ዋንቴና፤ ዬያጉዲ ሃሣ ሃውሾ ኬሎ ኬሎ፥ ዓጊኖ ጃኤሮንታ ዬያጉዴ ዱማዴ ቦንሾ ኬሎና ናንጊና ናንጋ ጎዳ ማዔ ኑ ያኦዛሢ ቦንቻኒ ሚቺ ዒንጎ ዒንጊዖ ዒንጎንዶ ዱማዴ ቤሲ ማዓንዳኔ፤ ዒሰራዔኤሌ ዴራ ዬያ ናንጊና ማዳ ማዳ ናንጋንዳጉዲ ያኦሲ ዔያቶ ዓይሣኔ።

5 ኑ ያሕዛሢ ሚሌ ካኣሽኮ ያኦዛፓ ቢያ ባሽ ፌኤፒ ማዔሢሮ ፌኤፒ ጌኤሺ ማኣሪ ማዛኒ ታ ማሌኔ።

6 ጋዓንቴ ጫሪንጮንታ ሳዖንታኮ ዳልጉማ ዒዛ ፔ ጋራ ማሂ ዓርቃኒ ዳንዳዑቀሴ፤ ዓካሪ ጌኤሺ ማኣሪ ዒዛም ማዛኒ ዳንዳዓይ ያናዳይ? ዒዛኮ ቤርታ ዑንጆ ጩቢሶ ቤሲ ማዢፓዓቴም ጌኤሺ ማኣሪ ዒዛም ማዛኒ ታናንሢ ዓይጎ ዓሲዳይ?

7 ሃሣ ፔቴ ባኣዚ ዱማ ዱማ ጎይሢና ኮሻኒ ዋርቄ፥ ቢራ ዓንጊ፥ ሞኦኖ ዓንጎንታ ዱማ ዱማ ዓንጎዋ ሽኤሽ ዱዓኒ፤ ሃሣ ጮልዔንታ ዲንኪ ዞቄ ዓፒላንታ ዱዋኒ ዳንዳዓ ሃኣሚ ዓሲያኣ ታኣም ዳኬ፤ ታ ዓዴ ዳውቴ ዶኦሬ ዩሁዳና ዩራሳላሚናይዳ ዓኣ ሃኣም ዓሶና ዎላ ዒዚ ማዳንዳይ።

8 ኔኤኮ ሚያ ቲቃ ዓሳ ኮሺ ጎኦባታሢ ታ ዔራኔ፤ ዬያሮ ሊባኖኦሴይዳፓ ሊባኖኦሴ ሚያንታ ዚቢቆንታ ዴኤሎ ዚቢቆንታ ታኣም ዳኬ።

9 ሚርጌ ሚሢ ቲቂያና ኔ ዓሶ ማኣዳንዳጉዲ ታ ዓሶፓ ኔ ባንሢ ዓሲ ታ ዳካንዳይ፤ ዬያ ታ ማዳንዳሢ ታ ማዛኒ ማሌ ጌኤዢ ማኣራ ዳልጊ፤ ሃሣ ኮሺ ሚዛጲ ማዓኒ ኮይሳሢሮኬ።

10 ኔኤኮ ማዳ ዓሶም ጋላ ማዓንዳያ ላምዎ ሚሎኔ ኪሎ ማዓንዳ ዛርጌ ዲኢሊ፥ ላምዎ ሚሎኔ ኪሎ ማዓንዳ ዔልዓ፥ ያይዶፄኤታ ሺያ ዶሎዜ ማዓንዳ ዎይኔ ዑሽ፤ ጊንሣ ሃሣ ያይዶ ፄኤታ ሺያ ዶሎዜ ማዓንዳ ዛይቴያኣ ታኣኒ ዳካንዳይ» ጌዔኔ።

11 ዬያሮ ካኣቴ፥ ኪራሜ ካኣቴ ሴሎምኔም ኪኢታ ዋርቃታ ፃኣፓ፦ «ናንጊና ናንጋ ጎዳ ፔኤኮ ዴሮ ናሽካሢሮ ኔኤኒ ዔያቶይዳ ካኣታዳንዳጉዲ ኔና ካኣታሢኔ፤

12 ናንጊና ናንጋ ጎዳም ጌኤዢ ማኣሮንታ ፔኤኮ ካኣቴም ማኣሮንታ ማዛኒ ሃኣማቶ ዓኣ ናይ ካኣቴ ዳውቴም ዒንጌ፥ ጫሪንጮንታ ሳዖንታ ማዢ፥ ናንጊና ናንጋ ጎዳ ማዔ ዒሰራዔኤሌ ያኦዛሢ ጋላቴንቶንጎ!

13 ሃይሾ ሃሢ ታኣኒ ሃኣማቶ ማዶና ዔርቴያ ማዔ ሁራሜ ዓቢ ጌይንታሰኬያ ኔኤም ዳኬኔ።

14 ዒዛኮ ዒንዳ ዳኣኔ ዜርፃፓ፥ ዓዴ ዒዛኮ ፂሮሴ ዓጪ ዓሲኬ፤ ዒዚ ዋርቄ፥ ቢሮ ዓንጎ፥ ሞኦኖ ዓንጎ፥ ዱማ ዱማ ዓንጎ፥ ሹቺንታ ሚሢንታይዳፓ ዱማ ዱማ ባኣዚ ኮሻኒ ዳንዳዓ ዓሲኬ፤ ዬያጉዲ ሃሣ ዲንኪ፥ ጮልዔ፥ ዞቄንታ ሻኣዢሲ ሱኮና ሽኤምና ዱማ ዱማ ማኣያ ኮሺ ዔራያኬ፤ ሃሣ ጊንሣ ዱማ ዱማ ማሎና ዓኣ ባኣዚ

ማዢ ከሲሢና ዒዛም ማዳንዳጉዲ ዓይሢንቴ ጎይሢና ቢያ ባኣዚ ማዲሢ ዒራያኬ፤ ዩያሮ ዩያ ዓሢ ዲማ ዲማ ባኮ ማዲ ዒራ ኔ ዓደም ማዳ ዓሶና ዋላ ማዲሼ።

15 ኔ ኑም ዳካኒ ጌዔ ዛርጋሢ ዲኢሎ፥ ዒልያ፥ ዋይኖ ዑዡንታ ሪሚቶ ዛይቶንታ ዳኬ፤

16 ኑኤኒያ ኔ ኮዓ ሊባኖኦሶ ሚያ ቢያ ሊባኖኦሴ ዲካፓ ቲቂ ፔቴይዳ ቲካያ ባዞ ዋኣያይዳ ጌሢም ዋኣፃ ዒኪ ዒኖጵ ሄሊሳንዳጉዲ ዳካንዳኔ፤ ዩካፓ ኔኤኒ ዩሩሳላሜ ዒኪ ዓኣዳኒ ዳንዳዓኔ» ጌዔኔ።

ጌኤዡ ማኣሮ ማዳ ዓርቂንቴሢ

(1ካኣቶ. ማ 6:1-38)

17 ካኣቲ ሴሎሞኔ ቤርታ ዒዛኮ ዓዴ ዳውቴ ማዴሢ ጎይያ ዒሰራዒኤሌይዳ ናንጋ ሜሌ ዓጮ ዓሶ ፓይዴኔ፤ ዩያይዲ ፔኤኮ ዓጮ ጋርይዳ ፔቴ ጃኤታና ዶንጊታሚ ሃይሦ ሺያና ላሆ ጃኤታ ማዓ ሜሌ ዓጪ ዓሲ ዓኣሢ ዒሬኔ፤

18 ዩያቶይዳፓ ላንካይታሚ ሺያ ዓሲ ከዶ ባኮ ከዳንዳጉዲ፥ ሳሊታሚ ሺያ ዓሲ ዲኮይዳ ሹቺ ጳላንዳጉዲ ዓይሢኔ፤ ዩያጉዲ ሃሣ ማዳ ፒዜ ማዲንታሢ ዛጋንዳጉዲ ሃይሦ ሺያና ላሆ ጃኤታ ዓሲ ዶኦሬኔ።

3

1 ሴሎሞኔኮ ዓዴ፥ ካኣቲ፥ ዳውቴ ጌኤዡ ማኣራ ማዢንታንዳ ቤሲ ዩሩሳላሜይዳ ሞኦሪያ ዲካ ዩያኮ ቤርታ ጌኢጊሼያኬ፤ ዩና ቤዛ ናንጊና ናንጋ ጎዳ ካኣቲ ዳውቴም ፔጋዲ ጴዴያ፥ ዒያቡሳ ዓሢ ዖርናኮ ሃኣኮ ሺርኮ ቆይዶኬ።

2 ሴሎሞኔ ካኣታዴያ ያይዳሳ ሌያኮ ላምዓሳ ዓጊኖ ላምዓሶ ከሎና ጌኤዡ ማኣሮ ማዡ ዓርቂኔ፤

3 ካኣቲ ሴሎሞኔ ማዢሴ ጌኤዡ ማኣሮኮ ጋር ያዶሱማ ላሂታሚ ዋዳ ማዓዛ፥ ዳልጉማ ላማታሚ ዋዳኬ።

4 ጌሎ ካርይዳ ዓኣ ማኣሮኮ ዳኣሮ ዒጳ ጃኤታና ላማታሚ ዋዳ፥ ጋር ዳልጉማ ጌኤዡ ማኣሮኮ ጋር ዳልጉሞጉዴያ ላማታሚ ዋዳኬ፤ ዩይ ጋራ ጌኤሺ ዋርቄና ጳርቂንቴኔ፤

5 ጌኤዡ ማኣሮኮ ዴኤፖ ቆልዓ ዚቢቂና ጌኤሺ ዋርቄና ጳርቂንቴያ ማዓያ ሜኤጃንታ ካኒ ቢራታኣ ማሊሺ ዑፃ ኮሺንቴ ባኣዚ ዓኣኔ።

6 ካኣቲ ሴሎሞን ጌኤዝ ማኣሮ ኮሺ ሚዛጲ ማዔ ሹቸና ፓርዋይሜ ዓጫፓ ሙኬ ዋርቄና ኮሺኔ።

7 ጌኤዝ ማኣሮኮ ኮጫ፡ ሳኮኮ ፀንጋ፡ ካሮኮ ዓጮ ዛሎና ዓኣ ሚያና ካሮና ዋርቄና ዒ ጳርቄኔ። ዩካፓ ሹጮና ማዦና ኮጮ ዑያይዳ ኪሩቤሌ ጌይንታ ኪኢታንቸ ማሊሺ ማዦኔ።

8 ዬያጉዲ ሃሣ ዑሣ ዓኣጳ ጌኤዝ ማኣሮ ጌይንታ ጋሮ ማዦኔ፤ ዬኖ ጋሮ ቆልዔሎኮ ያዶሱማ ለማታሚ ዋዳ ማዓዛ፡ ጋሮ ዳልጉማ ጌኤዝ ማኣሮኮ ጋሮ ዳልጉሞ ጉዴያ ለማታሚ ዋዳ፡ ዬያ ጋሮ ለማታሚ ሺያ ኪሎ ማዓ ጌኤሺ ዋርቄና ጳርቄ ኮሺኔ።

9 ዋርቆ ሚሰማሮኮ ዴኤሡማ ዶንጎ ጂኤታና ላንካይታሚ ገራኣሚ ማዓያኬ፤ ዑያ ኩቦ ጋሮ ቆልዓ ሹጮና ማዦናሢ ዋርቄና ጳርቄንቴ።

10 ካኣቲ ሴሎሞን ዒዛኮ ማዳ ዓሳ ኪሩቤኤሎ ማሊሺ ኮሺ ዋርቄና ጳርቄንዳጉዲ፤ ዩካፓ ዑሣ ዓኣጳ ጌኤዝ ማኣሮ ቆልዓ ጋራ ዔቂሳንዳጉዲ ዓይሣኔ።

11-13 ኪሩቤላ ዑሣ ዓኣጳ ጌኤዝ ማኣሮ ጌሎ ካሮ ሆቶይዳ ዋሊ ቤቂ ዔቂ ዓኣኔ፤ ፔቴ ፔቴ ኪሩቤኤሎኮ ለምዖ ጋኣሲ ዓኣኔ፤ ፔቴ ፔቴ ጋኣዘኮ ያዶሱማ ዶንጎ ዋዳኬ፤ ለምዖ ጋኣዘንሢ ቢያ ዛሎና ፒሺንቴያ ማዒ ቆልዓ ጋሮኮ ሳዛ ዋሊና ካኣማኔ፤ ዓቴ ለምዖ ጋኣዘንሢ ሃሣ ፔቴ ፔቴሢ ቢያ ዛሎና ዓኣ ኮጮ ካኣማያ ማዓዛ፡ ዬንሢ ፒሺንቴ ጋኣዘንሢ ዳልጉማ ለማታሚ ዋዳ ማዓያኬ።

14 ዑሣ ዓኣጳ ዴማጳ ጋራሎሞ ቃራ ሚዛጲና ሜሌ ዴማ ዴማ ዓፒላናይዳፓ ጎኦቦ ዓፒላ ጌሣኔ፤ ጎኦቦ ዓፒሌላ ጮልዔ፡ ዲንኪ፤ ሃሣ ዘቂ ማዓዛ ዑያይዳ ኪሩቤኤሎ ማሊሲ ኮሺንቴ ባኣዚ ዓኣኔ።

ሞኦኖ ዓንጎና ኮሺንቴ ለምዖ ቱርቱሮ

(1ካኣቶ. ማ 7:15-22)

15 ካኣቲ ሴሎሞን ፔቴ ፔቴሢኮ ሌካ ዔጳ ሃይሢታሚ ዶንጎ ዋዳ ማዓያ ለምዖ ቱርቱሪ ኮሺሲ ጌኤዝ ማኣሮኮ ቤርቶ ዛላ ሆታ ዔቂሴኔ፤ ፔቴ ፔቴ ቱርቱሮኮ ቶኦኮይዳ ያዶሱማ ዶንጎ ዋዳ ማዔ ለምዖ ሙስኩሌ ዓኣኔ፤

16 ሮኦጨ ሱሲ ጎይሢ ካኒ ቢራታ ሞኦና ዓንጊና ኮሺንቴ ፓይዳ ፔቴ ጂኤታ ማዔ ሮኦማኣኔ ሚያ ዓኣፖ ማሊሺ ኮሺንቴ ባኣዚ ዓኣኔ፤

17 ቱርቱርንሢ ደቁንቴሢ ጌኤዡ ማኣር ጌሎ ካርኮ ሻውሎና ሚዛቆናይዳኬ፤ ደኦሎ ዛሎና ዔቁ ቱርቱራሢ «ያከኔ»* ጌይንታዛ፤ ኬዶ ዛሎና ዔቁሢ «ቦዔዜ»† ጌይንቴኔ።

4

ጌኤዡ ማኣር ጋራ ማዲንቶ ሜሆ
(1ካኣቶ. ማ 7:23-51)

1 ካኣቱ፥ ሴሎሞኔ ዳልጉሞና ያዶሱሞና ላማታሚ ዋዳ፤ ሌካ ዔጳ ታጳ ዋዳ ማዔያ ያኦሲም ዒንጎ ቤሲ ሞኦኖ ዓንጎና ኮሼኔ።

2 ዬያጉዲ ሃሣ ሴካ ጎኦቦ ዳልጉማ ዓጫፓ ዓጮ ሄላንዳኣና ታጳ ዋዳ፤ ሌካ ዔጳ ዶንጎ ዋዳ ማዔ ሺሪ ዴንዳ ዙላ ጋባዳጉዴያ ዶኦላ ዓንጎ ሼኤሺ ዓልቂሲ ኮሼኔ፤ ዬያኮ ዙሎ ዋርቆዛ ሃይሢታሚ ዋዳ ማዓኔ።

3 ዬያ ዶኦላሢ ካርኮ ዴማ ፔቴ ፔቴ ዋዳ ማዓያይዳ ዙሎ ሺሬያ ታጳ ጌማይ ማላ ባኣዚ ላምዖ ቤሲ ፓቂንቲ ዋሊ ቤቂ ዓኣኔ፤ ዬይ ጌማታ ዶኦላሢና ዋላ ፔቴ ማሂ ኮሾናያኬ።

4 ዶኦላሢ ሞኦኖ ዓንጋፓ ፔኤኮ ባሊቶ ሴካ ሺርሺሲ ኮሾና ታጳ ላምዖ ጌማቶ ማላ ባኮ ዑፃ ጌሢንቴኔ፤ ዬንሢ ጌማቶ ማሊሲ ኮሾናዞንሢኮ ሃይሦንሢ ኬዶ ዛሎ ባንሢ፥ ሃይሦንሢ ዶኦሎ ዛሎ ባንሢ፥ ዛሎ ሃይሦንሢ ዓባ ኬሰካሢ ባንሢ፥ ዓቴ ሃይሦንሢ ሃሣ ዓባ ጌላ ባንዖ ዛጋያኬ።

5 ዬያ ዶኦላሢኮ ዓንዲርሙማ ፔቴ ኬኤላ ዋዳ ማዓያ፥ ካራ ሃሣ ዑሺ ዑሽኮ ዓንገ ካራ ማላያ፥ ገንሢ ሱኤፖ ቡኒጉዴያ ዙሎም ሺሬያኬ፤ ዬይ ዶኦላሢ ላሂታሚ ሺያ ዶሎዜ ማዓ ዋኣሢ ዓርቃያኬ።

6 ሄሊሳዖ ዋኣሢ ማሰቶ ታጳ ጎንገ ኮሺሲ፥ ዶንጋሢ ጌኤዡ ማኣርኮ ዶኦሎ ዛሎ ጎኦባ፤ ዓቴ ዶንጋሢ ሃሣ ጌኤዡ ማኣርኮ ኬዶ ዛሎና ጎኦባ ጌሢኔ፤ ዬንሢ ጎንጎንሢ ያኦሲም ሚቺ ዒንጎር ሹኪንታ ቆልሞኮ ዓሽኮ ቢያ ማሰኮያኬ፤ ዴኤፖ ዶኦላሢዳ ዓኣ ዋኣዖ ቄኤሳ ማሰታያኬ።

7 ሴሎሞኔ ቤርታ ገኢጊሺ ሃሾና ማሊዖ ጎይዖ ታጳ ፖሢ ጌሦ ሻርና ዋርቂይዳፓ ኮሺሲ ጌኤዡ ማኣርኮ ዴኤፖ ቆልዖ ጋራ ዶንጋሢ ኬዶ ዛሊና፥ ዶንጋሢ ዶኦሎ ዛሊና ጌሢኔ።

* 3:17 ያከኔ ጌይዖ፦ «ያሕሲ ዓቂሳኔ» ጌይሢኬ።

ዋልቂና ጌይሢኬ።

4:1 ኬሲ. ማፃ 27:1-2።

4:7 ኬሲ. ማፃ 25:31-40።

† 3:17 ቦዔዜ ጌይዖ፦ ያሕሲ

4:6 ኬሲ. ማፃ 30:17-20።

8 ዬያጉዲ ሃሣ ታጽ ዴጌ ሎኦክፍ ያይታ ኮሺሲ ጌኤዢ ማእሮኮ ዴኤፖ ቆልዖ ጋራ ደንጋሢ ሻውሎ ዛላ፡ ዓቲ ደንጋሢ ሚዛቆ ዛላ ጌሄኔ፤ ዬያ ሌሊቱዋንቴ ቃሲ ዪኤታ ጉንጉሎዋ ዋርቁይዳፓ ኮሺሴኔ።

9 ሴሎሞን ቄኤሶኮ ማደም ማዓንዳ ጌኤዢ ማእሮኮ ጋሮ ዛሎና ዓሲ ቡካ ጳኦካ፤ ዬያጉዲ ሃሣ ዴኤፒ ጳኦካኦ ኮሺሴኔ፤ ዬንሢ ላምዖ ጳኦኮንሢኮ ባኦካ ዓኦ ካራ ሞኦኖ ዓንጎና ጳርቂንቴያኬ።

10 ዴኤፖ ዶኦላሢ ዒማና ጌኤዢ ማእሮኮ ዶኦሎ ዛላ ዓባ ኬሰካ ባንዖና ጌሢንቴኔ።

11-16 ሁራሜ ቃሲ ሃሣ ዖቲ፡ ታሚ ካኦሾ ኩንዔንታ ዔቶ ሳኦኖንታ ኮሺኔ፤ ዬያይዲ ሁራሜ ካኦቲ ሴሎሞንም ኮሻኒ ጫኦቂ ጎይዖ ጌኤዢ ማእሮ ማደም ማዓ ሚሆ ቢያ ኮሺ ጋፒሴኔ፤ ዬይ ዒ ኮሺ ባካ ሃካፓ ዴማ ፔቴ ፔቴ ፓይዲንታዞንሢ፡-

ላምዖ ቱርቱር፡

ቱርቱርንሢን ቶኦካ ዓኦ ሳኦኖ ማላ ላምዖ ሙሰኩሎ፡

ላምዖ ሙሰኩሎንሢ ማይሊ ሚዛጲሳኒ ሮኦጮ ማሊሲ ኮሺንቴ ላምዖ ካኖ ቢራቶ፡

ሙሰኩሎንሢ ማይሊ ኮሻኒ ፔቴ ፔቴ ሙሰኩሎ ዑፃ ላሚ ጳንጪ ሞኦኖ ዓንጎና ኮሺንቴ ዖይዶ ዪኤታ ሮኦማኦኔ ዓኦፖ ማላ ባኮ፡

ሺራ ቶኪ ዓኦ ሚሆ ጌሃ ታጽ ባኮ

ዋኦዖ ማሰቶ ታጽ ዶኦላ፡

ዴኤፒ ዶኦላ፡

ዶኦላሢ ዶዑዋጉዲ ዓርቂ ጌማቶ ማላ ታጽ ላምዖ ባኮ፡

ዖታ፡ ታሞ ካኦሾ ኩንዓ፡ ቃጳሢንታ ሜሌ ዬያጉዲ ሚሆዋ ፔ ሃኦማቶና ዒ ኮሺኔ።

ሃኦማቶና ዔርቱያ ማዔ ሁራሜ ካኦቲ፡ ሴሎሞን ዒዛ ዓይሢ ጎይዖና ያኦሲኮ ጌኤዢ ማእሮ ማደም ማዓንዳጉዲ ዬያ ሚሆ ቢያ ኮሺሢ ዑጪ ጊኢኒሺ ጌሃና ሞኦኖ ዓንጎናኬ።

17 ካኦቲ፡ ሴሎሞን ዬያ ሚሆ ቢያ ኮሺሢሢ ዮርዳኖሴ ዶኦጫ፡ ሱኮቴና ዪሬዳ ጌይንታ ቤዞ ባኦካ ዓኦ ሞኦኖ ዓንጎ ሺኤሾ ቤዛኬ፤

18 ዬያይዲ ኮሺንቴ ባካ ኮሺ ሚርጌታሢሮ ዬያ ባኮ ኮሺሳኒ ዔኪንቴ ሞኦኖ ዓንጎኮ ዴኤሠማ ዋሊ ዑፃ ዋኦዲታቶዋ ያኦኒያ ዔራኒ ዳንዳዒባኦ።

19 ዬያጉዲ ሃሣ ካኦቲ፡ ሴሎሞን ጌኤዢ ማእሮ ማደም ማዓንዳ ባኦዚ ዋርቁና ኮሺሴኔ፤ ዬይ ባካ፡ ናንጊና ናንጋ ጎዳም ዒንጎ ባኮ

ዒንጎ ቤዘንታ ያኦሲም ዒንጊሢ ማዒ ሸኢሸንታ ካሦ ጌሦ ዴ ሎኦኦኦ ያይቶ።

20 ጌኤሺ ዋርቁጋ ኮሺንቴ ፖፖ ጌሦ ሻርናንታ ቤርታ ማሊንቴ ጎይያና ጌኤኦ ማኣሮኮ ቤርቶ ዛላ ፖዓ ፖፖ።

21 ቡኖ ማሊሶና ፓልማሢንታ ፖፖንታ፤ ዬያጉዲ ሃሣ ዲቢንያ ቆንቾሢንታ።

22 ጌኤሺ ዋርቁይዳፓ ኮሺንቴ ፖፖ ፖሲሶሢንታ ዋደሢ፤ ጉንጉላሢ፤ ጨቦ ጨቢሾሢንታ ታሞ ካኦሾ ኩንፖንታ፤ ዬይ ባካ ቢያ ጌኤሺ ዋርቁይዳፓ ኮሺንቴያኬ፤ ጌኤኦ ማኣሮኮ ዙሎ ካሮንታ ዑሣ ዓኣዴ ጌኤኦ ማኣሮኮ ካሮንታ ዋርቁና ጳርቂ ኮሾናያኬ።

5

1 ካኦቴ ሴሎሞኔ ጌኤኦ ማኣሮ ማደ ቢያ ማዲ ጋፒሴሰካፓ ዒዛኮ ዓዴ፤ ዳውቴ ናንጊና ናንጋ ጎዳም ዳማሴ ቢሮንታ ዋርቆንታ፤ ዬያጉዲ ሃሣ ሜሌ ባኮዋ ቢያ ጌኤኦ ማኣሮይዳ ዓኣ ሜሆ ጌሦ ማኣሮ ጌልዜ።

ጫኦቁሞ ሳኣዲኖ ጌኤኦ ማኣሪ ጌልዘናሢ
(1ካኣቶ. ማ 8:1-9)

2 ዬካፓ ካኦቴ ሴሎሞኔ ናንጊና ናንጋ ጎዳኮ ጫኦቁሞ ሳኣዲኖ ዳውቴ ካታሞ ማዔ፤ ዲዮኔይዳፓ ሃንጋ ጌኤኦ ማኣሪ ዔኪ ሙካንዳንጉዲ ኬኤዛኒ ዒሰራዔኤሌ ዓሶኮ ጋርቾ ዓሶና ፃጸ ፃጸንታ ማኣሮ ማኣሮንታኮ ሱኡጎ ቢያ ዬሩሳላሜይዳ ቡኩሴ።

3 ዒሰራዔኤሌ ዓሳ ለንካሳ ዓጊኖይዳ ወልሾ ዴማ ቦንቻ ቦንቻና ካኦቴ ዔኤሌ ዓሳ ቢያ ዬሩሳላሜይዳ ሙኪ ቡኬ፤

4-5 ዒሰራዔኤሌ ዓሶኮ ሱኡጋ ቢያ ፔቴይዳ ቡኪንቴ ዋዶና ሌዊ ዓሳ ጫኦቁሞ ሳኣዲኖ ኬዲ ጌኤኦ ማኣሪ ዔኪ ዬዔኔ፤ ዬያጉዲ ሃሣ ቄኤሶንታ ሌዊ ዓሶንታ ዓፒሎና ማዢንቴ ናንጊና ናንጋ ጎዳ ካኦሽኪንታ ማኣሮና ጋርይዳ ዓኣ ያኦሲ ማዶም ዲማዴ ሜሆዋ ቢያ ጌኤኦ ማኣሪ ዔኪ ዬዔኔ።

6 ዒማና ካኦቴ ሴሎሞኔንታ ዴሮንታ ቢያ ጫኦቁሞ ሳኣዲኖኮ ቤርቶ ዛላ ሙኪ ቡኬ፤ ሚርጉማፓ ዔቄያና ፓይዲንታኒ ዳንዳዑዋ ዲቢ ማሪይንታ ባይንታ ዒንጎ ባኣዚ ማሢናንጊና ናንጋ ጎዳም ዔያታ ሸኢሸኔ።።።

7 ቄኤሳ ናንጊና ናንጋ ጎዳኮ ጫኦቁሞ ሳኣዲኖ ጌኤኦ ማኣሪ ዔኪ ጌላፖ ዑሣ ዓኣዴ ዲማዴ ጋርይዳ ዓኣ ኪሩቤሌ ጋኣዘ ዴማ ጌሣ።።

8 ዓሚና ፒሺንቲ ዓኣ ኪሩቤኤሎኮ ጋኣዛ ጫክቁሞ ሳኣዲኖንታ ሳኣዲኖ ኬዶና ዛጳሢ ሚያንታ ካንቂ ዓኣቼኔ።

9 ዛጳሢ ሚያ ኮሺ ያዶሲታሢሮ ዑሣ ዓኣጴ ዱማጴ ጋሮኮ ቤርቶ ዛላ ዔቁ ዓይጎ ዓሲያማም ዴንቃኒ ዳንዳዓኔ፤ ጋዓንቲ ሜሌ ዛላና ዔቁ ዓሲ ፔቲታ? ዴንቃኒ ዳንዳዑዋሴ፤ ዬንሢ ዛጳ ሚያንሢ ሃኖ ሄላንዳኣና ዒኢካ ዓኣኔ።

10 ዬያ ጫክቁሞ ሳኣዲኖ ጋራ ዒሰራዔኤሌ ዴራ ጊብፄይዳፓ ኬሰከንቲ ናንጊና ናንጋ ጎዳ ዔያቶና ዋላ ጫክቁሞ ጫክቁያና ሙሴ ሲና ዴኮይዳ ጫክቁሞ ሳኣዲኖ ጋራ ጌሢ ላምዖ ሹጮ ዓርሶናዘንሢዳፓ ዓታዛ ሳኣዲኖ ጋራ ሜሌ ዓኣ ባኣዚ ባኣሴ።

ያኦሲኮ ቦንቾ ፔጋጲ ጴጴሢ

11 ቄኤሳ ጌኤዡ ማኣራፓ ኬሰከኔ፤ ዬያታ ቄኤሳ ቢያ ዔያቶ ማድንጎ ጎያና ኬሎ ማዒባኣቲያ ቢያሢ ፔና ጌኤሺ ናንጊና ናንጋ ጎዳም ዱማሴ።

12 ያኦሲ ቦንቾም ዓይኑም ዓይናዳ ሌዊ ዓሳ ቢያሢ፥ ዓሳኣፔ፥ ሄማኔንታ ዪዱታኔንታ፤ ዔያቶኮ ዓቲንቆ ናኣቶንታ ዒጊኖንታ ቢያ ሚዛጲ ሻኣዡ ማኣያ ማይንቲ ዓኣኔ፤ ሌዊ ዓሳ ዓሚና ዑኡቲቡሎንታ ፔቲ ሻሺ ዴንሢ ዋርቆ ጎኦሎዋ ዔኪ ናንጊና ናንጋ ጎዳም ዒንጎ ባኮ ሺኢሾ ቤዘኮ ባባ ኬሰካ ዛሎና ዔቁ ዓኣኔ።

13-14 ዔያቶና ዋላ ዛዬ ዋርቃ ፄኤታና ላማታሚ ማዓ ቄኤሴ ዓኣኔ፤ ዬያታ ያኦሲ ቦንቾም ዓይኑም ዓይናዳ ዓሳ ዛያሢንታ ዑኡቲቡላሢንታ ፔቲ ሻዡ ዴንሢ ዋርቆ ጎኦሎንታ ሜሌ ባኮዋ ያልሲ ያልሲ ሂዚ ጌዒ ዓይናዳ ፔቲ ዑኡሲና ናንጊና ናንጋ ጎዳ ጋላታኔ።
«ዒዚ ኮሺታሢሮ፥ ናሹማኣ ዒዛኮ ናንጊና ጋፑዋያታሢሮ ናንጊና ናንጋ ጎዳ ጋላቲዋቲ።»

ዓሚና ዔርቲባኣንቲ ያኦሲኮ ቦንቾ ፔጋሲ ዳዋ፥ ዓኣፒዳ ዱዱካ ፖዒ ፖዓ ሻኣሬ ናንጊና ናንጋ ጎዳኮ ጌኤዡ ማኣሮ ኩሜሢሮ ቄኤሳ ካኣዡ ማዶ ማዳኒ ዳንዳዒባኣሴ።

6

ሴሎሞን ዴሮም ኬኤዜ ባኮ (1ካኣቶ. ማ 8:12-21)

5:10 ላሚ. ዋማ 10:5። 5:13-14 1ያኦሲ. ዓሃኬ 16:34፤ 2ያኦሲ. ዓሃኬ 7:3፤ ዒዚ. 3:11፤ ዓይኡ. 100:5፤ 106:1፤ 107:1፤ 118:1፤ 136:1፤ ዒር. 33:11።

5:13-14 ኬሲ. ማፃ 40:34-35።

1 ይካጥ ካኣቲ ሴሎሞን፡-
«ናንጊና ናንጋ ጎዳሂዮ! ታኣኒ ዲሞ ጌዔ ሻኣሬ ባኣካ ናንጋኔ» ኔኤኒ
ጌዔኔ፤

2 ሃይሾ ዲቃሂ ሄርሺሳ ሚዛጲ ጌኤሺ ማኣሪ
ታ ኔኤሞ ማገፍኔ፤

ዬይ ጌኤዢ ማኣሪ

ኔኤኒ ዒኢካ ናኣናና ናንጋ ቤሲ ማዓንዳኔ» ጌዔኔ።

3 ዒማና ዒሰራዔኤሌ ዓሳ ዒኢካ ዔቁ ዓኣኔ፤ ካኣቲ ሴሎሞን
ዬያ ዓሶ ባንሂ ሺሪ ያኦሲኮ ዓንጃ ዒያቶም ማዓንዳጉዲ ሂዚ ጌዒ
ሺኢቄኔ፡-

4 «ናንጊና ናንጋ ጎዳ ማዔ ዒሰራዔኤሌ ያኦዛሂ ጋላቲንቶንጎ!
ዒዚ ታ ዓዶ፤ ዳውቴም ጉሙርሲ ኬኤዜ ሃጊ ማዓንዳ ዋዞ ቃኣሎ
ዒ ኩንሄኔ፤ ዒዚ ጉሙርሴ ቃኣላ ሂዚ ጋዓያኩ፡-

5 ታኣኮ ዴሮ ገብፂይዳገ ታ ኬሴ ኬላገ ዓርቃዖ ዴንዲ ሃኖ
ሄላንዳኣና ታኣኒ ካኣሽኪንታንዳ ጌኤሺ ማኣሪ ማገፍንታንዳ ቤሲ
ዒሰራዔኤሌ ዓፄ ጉቤሂዳገ ፔቴ ካታማታዖ፤ ዬያጉዲ ሃህ
ታኣኮ ዴሮ ዒሰራዔኤሌ ዓርናዲ ዔኪ ዓኣዳንዳ ዓይጎ ዓሲያኣ ታ
ዶኦሪባኣሴ፤

6 ሃሂ ጋዓንቴ ታና ካኣሽኮንዶ ቤሲ ማዓንዳጉዲ ዬሩሳላሜ፤
ታኣኮ ዴሮ ዓርና ማዒ ዔኪ ዓኣዳንዳጉዲ ኔና፤ ዳውቴ ታ ዶኦሬኔ።»
»

7 ሄለሣዖ ሃህ ካኣቲ ሴሎሞን፡- «ናንጊና ናንጋ ጎዳ ማዔ
ዒሰራዔኤሌ ያኦዛሂ ካኣሽኪንታንዳ ጌኤሺ ማኣሪ ታ ዓዶ ዳውቴ
ማዣኒ ማለኔ፤

8 ናንጊና ናንጋ ጎዳ ጋዓንቴ ዒዛም፡- ታኣም ጌኤሺ ማኣሪ ማዣኒ
ማሊፃ ኔኤኮ ቃራኬ፤

9 ያዲ ማዔቴያ ታኣም ጌኤዢ ማኣሪ ማዣንዳሂ ኔ ሾዔ ኔኤኮ
ናኣዚኬ፤ ኔናቴዋሴ» ጌዔኔ።

10 ሃህ ሴሎሞን፡- «ሃይሾ ናንጊና ናንጋ ጎዳ ጉሙርሲ ኬኤዜ
ሃጊ ማዓንዳ ዋዞ ቃኣሎ ኩንሄኔ፤ ዬያሮ ታኣኒ ታ ዓዶ ቤዛ ጌሊ
ዒሰራዔኤሌይዳ ካኣታዴኔ፤ ናንጊና ናንጋ ጎዳ ማዔ ዒሰራዔኤሌ
ያኦዛሂ ካኣሽኪንታንዳ ጌኤዢ ማኣሪዋ ታ ማገፍኔ፤

11 ናንጊና ናንጋ ጎዳ ዒሰራዔኤሌ ዴርና ዋላ ጫኣቄ ጫኣቄማ
ዓኣ ሳኣፂኖዋ ጌኤዢ ማኣሪይዳ ታ ጌልዚ ጌሄኔ» ጌዔኔ።

ሴሎሞን ያሕሲ ሺኢቄ ሺኢጲዖ
(1ካኣቶ. ማ 8:22-53)

12-13 ዬካፓ ካኣቲ ሴሎሞን ዒሰራዔኤል ዴራ ዓኣ፥ ናንጊና ናንጋ ጎዳም ዒንጎ ባኮ ሺኢሾ ቤዘኮ ቤርቶ ዛሎ ጳኦኮይዳ ዓኣ ዴጊሲ ኮሾና ባኮ ዑያ ኬሰኪ ዔቄኔ። ዳልጉሞና ያዶሱሞና ዶንጎ ዋዳ፥ ሌካ ዔጸ ሃይሦ ዋዳ ማዔ ዬኖ ዴጌ ባኬሎ ሞኦና ዓንጊና ዒዚ ኮሺሲ ዬካ ጳኦካ ዶቂሼያኬ፤ ዒዚ ዴራ ቢያ ዒዛ ዛጋኒ ዳንዳዓ ዬኖ ዴጌ ባኬሎይዳ ጉሞዓታዎ ኩጮ ሌካ ጫሪንጮ ባንሢ ዴጊዲ፡-

14 «ናንጊና ናንጋ ጎዳ ማዔ ዒሰራዔኤል ያኦሲዮ! ጫሪንጮይዳ ማዔቶዋ ሳዖይዳ ቢያ ኔናጉዴ ያኦሲ ፔቲታዎ ባኣሴ፤ ኔኤኒ ኔኤኮ ዴርና ዋላ ጫኣቄ ጫኣቁሞ ካፓኔ፤ ጉቤ ዒናፓ ኔኤም ዓይሢንታ ዓሶ ናንጊና ጋፑዋ ናሹሞና ኔ ናሽካኔ።

15 ታ ዓዶ፥ ዳውቲሞን ጉሙርሲ ኬኤዜ ሃጊ ማዓንዳ ዎዞ ቃኣሎ ኔ ዶዲሺኔ፤ ኔ ኬኤዜ ፔቲ ፔቲ ዎዞ ቃኣላ ሃይሾ ሃኖ ኩሜኔ፤

16 ናንጊና ናንጋ ጎዳ ማዔ ዒሰራዔኤል ያኦዛሢዮ! ታ ዓዶ ዳውቲሞ፡- «ኔኤኒ ታኣኮ ዎጎ ዛጊ ካፔሢጉዲ ኔኤኮ ናኣታኣ ካፔቶ ኔ ዜርዖይዳፓ ዒሰራዔኤሉይዳ ካኣታዲ ዴዓንዳ ዓሲ ቢያ ዎዴ ባይቃዓኬ» ጌዒ ኔ ጫኣቄ ጫኣቁሞ ሃሢ ኔ ዶዲሻንዳጉዲ ታ ኔና ሺኢቃኔ፤

17 ናንጊና ናንጋ ጎዳ ማዔ ዒሰራዔኤል ያኦዛሢዮ! ኔ ዓይላሢ ዳውቲሞን ጉሙርሲ ኬኤዜ ሃጊ ማዓንዳ ዎዞ ቃኣሎ ቢያ ዓካሪ ኩንሣዎ» ጌዔኔ።

18 ሃሢ ዒዚ፡- «ጎኔ ጌሰቶያታቲ ያኦሲ ዓሲና ዋላ ሃይካ ሳዓይዳ ናንጋንዳኖ? ጫሪንጮ ማዔቶዋ ጫሪንጮኮ ዑፃ ዓኣ ጫሪንጮ ኔና ጋራ ማሂ ዓርቃኒ ዳንዳዐ-ዋሴ፤ ታኣኒ ማዜ ማኣሬሎንሢ ዎዚ ዳካንዳይ?

19 ያዲ ማዔቴያ ናንጊና ናንጋ ጎዳ ማዔ ታ ያኦዛሢዮ! ታኣኒ ኔ ዓይሌኬ፤ ታና ኔ ዓይላሢንታ ታ ሺኢቃ ሺኢጲያንታ ሂንዳ ዛጌ፤ ታ ኔና ሺኢቄ ዔኤላ ዔኤሊያዎ ዎይዜ።

20 ታ ሱንፃ ካኣሽኪንታንዳኔ» ኔኤኒ ጌዔ ሃያ ጌኤዢ ማኣሮ ባንሢ ሮኦሮንታ ዒባኖንታ ዛጌ፤ ታኣኒ ኔኤኮ ዓይላሢ ሃኖ ጌኤዢ ማኣሮ ባንሢ ዛጊ ሺኢቃ ሺኢጲያዎ ታኣም ዎይዜ፤

21 ታና ኔ ዓይላሢታቲያ ኔኤኮ ዴር ማዔ ዒሰራዔኤል ዓሳ ዓኣፓ ካሮ ሃኖ ቤዛ ባንሢ ሺርሺ ሺኢቃኣና ሺኢጲያ ኦኡሲ ዎይዜ፤ ኔኤኒ ናንጋ፥ ጫሪንጮ ዓኣዖ ኦም ዎይዜ፤ ዓቶንጎ ጌዔ።

22 «ፔቲ ዓሲ ፔኤኮ ላጋሢኮ ዔኤቢ ፑርቲሴያ ማዔም ዎጌና ዓርቂንቲ ሃያ ጌኤዢ ማኣሮይዳ ዒንጎ ባኮ ሺኢሾ ቤዘ ባንሢ ሙኪ

ማዳንዳጉዲ ዲ ኔና ሺኢቃ ባኮ ቢያ ዲዛም ኩንሣ፤ ዬይ ያዲ ማዓኣና ሃይ ታ ኔኤም ማዜ ጌኤዡ ማኣራ ኔ ሱንፃ ካኣሽኪንታ ቤሲ ማዔሢ ዬይ ዓሳ ዔራንዳኔ።

34 «ዔያታ ፔኤኮ ሞርኮ ያላኒ ኬሰኮም ኔኤኮ ዳሮ ኔ ዓይሣ ዎዶና ዎካ ዓኣዎ ማዎም ሃኖ ኔ ዶኦሬ ካታሜሎና ታ ኔኤም ማዜ ሃኖ ጌኤዡ ማኣሮና ባንሢ ሺሪ ዔያታ ኔና ሺኢቁቶ።

35 ዔያቶኮ ሺኢጲዎ ዎይዜ፤ ኔኤኒ ጫሪንጫ ዓኣዎ ዔያታ ፔ ዛሎ ሺኢቃ ሺኢጲዎ ዎይዜ ያሎና ዔያቶ ባሺሲሴ።

36 «ዓሲ ዳቢንቴ ዓቱዋኣያታሢሮ ኔኤኮ ዳራ ጎሜ ማዲ ኔና ያዬሴያ ማዔም ኔኤኒ ዳጋዲ ሞርካ ዔያቶ ያሊ ባሺ ዲዲ ዔኪ ሜሌ ዓጪ ዓኣዳንዳጉዲ ማሄቴ ዬይ ዓጪ ዎዚ ሃኬታቴያ።

37 ዔያታ ዲዲንቴ ዓሲ ማዲ ዓኣ ዓጪሎይዳ ዓኣዎ፡- ሉ ጎሜ ማዴኔ፤ ኑ ዳቤኔ፤ ዎይዚያ ኑ ዒፄኔ፤ ጌዲ ጎሞ ፔኤኮ ቡኡፄቴ ናንጊና ናንጋ ጎዳሢዮ! ዔያቶኮ ሺኢጲዎ ዎይዜ፤

38 ዔያቶ ዲዲ ዔኪ ዓኣዴ፡ ዔያቶኮ ሞርኮ ዓጪ ዓኣዎ ጉቤ ዒናፓ ጎኑሞና ፒዜ ማሊሢና ዔያታ፡- ሉ ዳቤያኣዎይ፤ ጌዲ ኔኤኒ ኑኤኮ ቤርታኣ ዓዶንሢም ዒንጌ ሃኖ ዓጪሎ ባንሢ፤ ሃሣ ጊንሣ ኔኤኒ ዶኦሬ ሃኖ ካታሜሎና ታኣኒ ኔኤም ማዜ ሃኖ ጌኤዡ ማኣሮና ባንሢ ሺሪ ሺኢቁቶ።

39 ዔያቶኮ ሺኢጲዎ ዎይዜ፤ ኔ ናንጋ ጫሪንጫ ዓኣዎ ዔያቶኮ ሺኢጲዎ ዎይዜ ዔያቶ ማኣሬ፤ ኔኤኮ ዳሮኮ ጎሞ ቢያ ዓቶም ጌዔ።

40 «ታ ያኦዛሢዮ! ሃሢ ኑ ባንሢ ዛጌ! ሃኖ ቤዘይዳ ኑ ሺኢቃ ሺኢጲዎ ቢያ ዎይዜ፤

41 ናንጊና ናንጋ ጎዳ ማዔ ያኦዛሢዮ! ሃሢ ዔቂ ኔኤኮ ዎልቆኮ ማላታ ማዔ ጫኣቁሞ ሳኣፂናና ዎላ ሃያ ጌኤዡ ማኣሮ ጌሌ፤ ዒኢካ ጋራ ናኣናና ናንጌ፤ ቁኤሳ ማዳ ባኮና ቢያ ዔያቶ ዓንጃ፤ ኔኤኮ ዳራ ኔ ኮሹሞና ዎዛድንጎ፤

42 ናንጊና ናንጋ ጎዳ ማዔ ያኦዛሢዮ! ኔኤኒ ዶኦሜ ካኣታሢ ሃሺፓ፤ ኔ ዓይላሢ ዳውቴ ኔ ናሽኬ ናሹሞ ማሊ ጳቂሄ» ጌዲ ሺኢቁኔ።

7

ጌኤዡ ማኣራ ማዶ ዓርቃኒ ኩንሢንቴ ዳምቦ
(1ካኣቶ. ማ 8:62-66)

1 ካኣቲ ሴሎሞን ሺኢጲያ ሺኢቂ ጋጋጋማና ኔጉዋዎ ታሚ ጫሪጎጫጋጋ ከዲ ሚቺ ዒንጋኒ ሺኢሾና ባኮንታ ሚሌ ሺኢሾና ባኮዋ ሙዔኔ፤ ናንጊና ናንጋ ጎዳኮ ቦንቾ ፔጋሲ ዔርዛ ዓኣፒዳ ዱዱካ ፖዒያ ጌኤዡ ማኣር ኩሜኔ፤

2 ናንጊና ናንጋ ጎዳኮ ቦንቾና ጌኤዡ ማኣራ ኩሜሢር ቄኤሳ ጌኤዡ ማኣሪ ጌላኒ ዳንዳዒባኣሴ።

3 ታማ ጫሪጎጫጋጋ ከዳሢ፤ ናንጊና ናንጋ ጎዳኮ ቦንቾ ጌኤዡ ማኣሪደዳ ሙኬሢ ዒሰራዔኤሌ ዓሳ ዛጋዎ ባሊቶ ሳዎ ሄሊሲ ዘጊ፡- «ናንጊና ናንጋ ጎዳ ኮሺ ጎዳኬ፤

ዒዛኮ ናሹማ ናኣናና ናንጋያኬ!»

ጌዔኔ፤ ያሕሲያ ጋላታ።

4 ዬካፓ ካኣቲ ሴሎሞንታ ዒዛና ዋላ ዓኣ ዳሮ ቢያሢንታ ናንጊና ናንጋ ጎዳም ዒንጎ ባኣዚ ሺኢሾኔ፤

5 ሴሎሞን ዒማና ላማታሚ ላምዎ ሺያ ባይና ፃኤታና ላማታሚ ሺያ ማራይ ፔቱሞና ዒንጎ ባኣዚ ማሂ ሺኢሾኔ፤ ዬያይዲ ካኣቲ ሴሎሞንታ ዒሰራዔኤሌ ዳሮ ቢያሢንታ ጌኤዡ ማኣር ያሕሲም ዲማዴያ ማሄኔ።

6 ቄኤሳ ዔያቶም ጊኣጊሾና ቤዛ ዔቄኔ፤ ዔያቶኮ ቤርቶ ዛላ ለዊ ዓሳ ዔቄ ካኣቲ ዳውቲ ቤርታ ኮሺሲ፤ ናንጊና ናንጋ ጎዳ ቦንቾም ዓይኑም ዓይናዳ ዓንጋሞና፡- « ናሹማ ዒዛኮ ናንጊና ናንጋያኬ» ያሕሲ ጋላቱዋቲ» ጌይ ጌይ ናንጊና ናንጋ ጎዳ ጋላታ፤ ቄኤሳ ዛያሢ ዋርቃኣና ዳራ ጉቤ ዔቄ ዓኣኔ።

7 ዬያጉዲ ሃሣ ዬኖ ከሎ ሴሎሞን ጌኤዡ ማኣርኮ ቤርቶ ዛላ ዓሳ ቡካ ጳኦኮኮ ሳዛ ዓኣ ቤዞ ናንጊና ናንጋ ጎዳም ዲማሴኔ፤ ሄሊሳዎ ሃሣ ጉቤ ሚቺ ዒንጎ ዒንጊፃ፤ ሃኣኮ ዒንጊፃ፤ ፔቱሞና ዒንጎ ዒንጊፃንታ ቆልሞኮዋ ማሎ ቢያ ናንጊና ናንጋ ጎዳም ሺኢሺ ዬኖ ቤዛ ሺኢሾኔ፤ ዬያ ዒዚ ማዴሢ ሞኦኖ ዓንጎና ኮሺንቲ፤ ናንጊና ናንጋ ጎዳም ዒንጎ ባኮ ሺኢሾ ቤዞይዳ ዬይ ቢያ ጌሢንታኒ ዳንዳዒዋኣሢርኬ።

8 ዒኢካ ጌኤዡ ማኣሪደዳ ሴሎሞንታ ዒሰራዔኤሌ ዳሮ ቢያሢንታ ላንካይ ከሊ ጉቤ ዉልሾ ዴማ ዴዒ ቦንቾ ቦንቾ ቦንቹኔ፤ ከዶ ዛሎና ሃማቲ ባንሢ ዴንዳ ጎይፃፓ ዓርቃዎ ዴንዲ ዶኦሎ ዛሊና ጊብፄ ዓጮ ዛጶ ሄላንዳኣና ዓኣ ዓጫፓ ሙኬ ዳርኮ ሚርጉማ ሃማዲኬ ጌይንቱዋኣያኬ።

9 ዒንጎ ባኮ ሺኢሾ ቤዛ ናንጊና ናንጋ ጎዳም ዲማሶ ዳምቦ ኩንሣኒ ለንካይ ኬሊ ዔያታ ዴዔኔ፤ ሃሣ ጊንሣ ለንካይ ኬሊ ቦንቸ ቦንቸ ጌዔሰካፓ ሳላሳ ኬሎና ጋፒሰሢ ዳምቤ ኩንሣ ለንቸ ጋፒሰኔ፤

10 ዚሮ ጉቴሎ ጌይፃ፡- ለንካሳ ዓጊኖኮ ለማታሚ ሃይሣሳ ኬሎና ዓሳ ፔ ቤዛ ቤዛ ዴንዳንዳጉዲ ዴሮ ቢያ ሴሎሞኔ ዳኬኔ፤ ናንጊና ናንጋ ጎዳ ፔ ዴሮ ዒሰራዔኤሌም፤ ሃሣ ፔ ዓይላሢ ዳውቴና ሴሎሞኔናም ዒንጌ ዓንጆሮ ዴራ ዋዛዲ ፔ ማኣሪ ማኣሪ ዴንዴኔ።

ያኦሲ ሴሎሞኔም ለሚ ፔጋዲ ጴዳሢ
(1ካአቶ. ማ 9:1-9)

11 ካኣቲ ሴሎሞኔ ጌኤዡ ማኣሮና ፔ ካኣቱም ማኣሮና ማዶ ቢያ ማሌ ጎይፆ ሜቱ ባኣዚ ባኣንቴ ጋፒሰሰካፓ፡

12 ናንጊና ናንጋ ጎዳ ፔቱ ኬሊ ዋንታ ሴሎሞኔም ፔጋዲ ጴዳ፡- «ጌኤኮ ሺኢጲፆ ታ ዋይዘኔ፤ ሃይ ጌኤዡ ማኣራ ታኣም ዒንጎ ባኣዚ ሺኢሾ ቤሲ ማዓንዳጉዲ ታ ዶኦሬኔ፤

13 ዒርዚ ዋርቁዋጉዲ ታ ላኣጋ ዋዶና፤ ሃሣ ሃኣኮ ዓቢፃ ሙዓንዳጉዲ ታ ዳኬ ዋዶና፤ ታ ዴሮይዳ ዲማ ዲማ ዶርፆ ታ ኬይሴ ዋዶናኣ ቢያ፡

14 ታ ዴራ ማዴ ፑርቶ ባኮይዳፓ ሃኪ ያዪሢና ታና ሺኢቁቶ ጫሪንጫ ዓኣፆ ታ ዋይዛንዳኔ፤ ጎሞዋ ታ ዔያቶኮ ዓቶም ጋዓንዳኔ፤ ዓጮ ዔያቶኮ ታ ጊንሣ ማለሻንዳኔ፤

15 ሃያ ጌኤዡ ማኣሮ ታ ካፓንዳኔ፤ ሃያ ጌኤዡ ማኣሮይዳ ሺኢቁንታ ሺኢጲፆ ቢያ ታ ዋይዛንዳኔ፤

16 ታኣኮ ሱንፃ ናንጊና ዒኢካ ካኣሽኪንታንዳጉዲ ሃያ ጌኤዡ ማኣሮ ታ ዶኦሪ ታኣም ዲማሰኔ፤ ታኣኮ ዒኖ ጋራ ጌሢ ቢያ ዋዴ ታ ካፓንዳኔ።

17 ኔ ዓዴ፥ ዳውቴ ማዴ ጎይፆ ቢያ ጉሙርቁንቲ ታኣም ኔ ማዴቶ፤ ታኣኮ ዋጎና ዳምቦና ካፒ ዓይሢፆዋ ታኣኮ ኔ ኩንሣቶ፡

18 ኔኤኮ ዓዶ፥ ዳውቴም፡- «ጌኤኮ ዜርፆ ባኣካፓ ዒሰራዔኤሌይዳ ካኣታዳንዳ ዓሲ ባይቃዓኬ» ጌዒ ታ ዒዛም ጉሙርሲ ኬኤዜ ቃኣሎ ጎይፆና ካኣቱም ታኣኒ ኔኤሲ ዶዲሻንዳኔ፤

19 ጋዓንቴ ኔኤና ኔ ዴሮና ታኣኒ ዒንሢም ዒንጌ ዋጎና ዓይሢፆና ካፒ ኩንሣባኣቱ፥ ማሌ ያኦዘ ዒንሢ ካኣሽኪ ዬያቶም ዚጌቱ፡

20 ታኣኒ ዒንሢም ዒንጌ ዓጮሎይዳፓ ዳውሲንቲ ዓኣዲ ባይቃንዳጉዲ ታ ማሃንዳኔ፤ ታ ካኣሽኪንታ ቤሲ ማዓንዳጉዲ ታኣም

ታኣኒ ዲማሴ፥ ሃኖ ጌኤዡ ማኣሬሎ ታ ሃሻንዳኔ፤ ሜሌ ዴራ ቢያ ሚኢጪ ዓማሎ ቤሲ ዒዞ ማሃንዳኔ» ጌዔኔ።

21 ሃሃ ናንጊና ናንጋ ጎዳ፡- «ሃያ ጌኤዡ ማኣሮኮ ሃሢ ዴግ ጌዔ ቦንቾ ዓኣኔ፤ ዬኖና ጋዓንቴ ጌኤዡ ማኣሮኮ ኮርሳ ዴንዳ ዓሲ ቢያ ዲቃቲ ሄርሺሢና ሩንጊና ናንጋ ጎዳ ሃኖ ሳዔሎና ሃኖ ጌኤዡ ማኣሮናይዳ ዓይጎሮ ሃያጉዴ ባኣዚ ማዴይ? ጌይ ያኣጫንዳኔ፤

22 ዓሳ ጊንሣ ማሂ፡- «ሃይ ባይሲንታ ቢያ ዔያቶ ሄሌሢ ጊብፄፓ ዔያቶ ዔኪ ኬሴ፥ ናንጊና ናንጋ ጎዳ ማዔ ዔያቶ ዓዶንሢኮ ያኣዛሢ ዔያታ ሃሺ ሜሌ ያኣዞ ካኣሸኪ ዬያሞ ዚጌሢሮኬ» ጋዓንዳኔ» ጌዔኔ።

8

ሴሎሞን ማዴያ ሜሌ ማዶ (1ካኣቶ. ማ 9:10-28)

1 ሴሎሞን ጌኤዡ ማኣሮና ካኣቱሞ ማኣሮና ማዢ ጋፒሳንዳኣና ላማታሚ ሌዔ ማዔኔ፤

2 ጊንሣ ሃሃ ካኣቲ ኪራሚ ሴሎሞንሞ ዒንጌ ካታሞ ጊንሣ ዓካሲ ማዢ ዒሰራዔኤሌ ዓሶ ዒኢካ ጌልዚ ዴይሢኔ።

3 ዒዚ ሃማቴና ያባ ዓጮናኮ ዴማ ዋርቃ ዓጮ ያሊ ፔ ዴማ ዋይሢኔ።

4 ዓሲ ናንጉሞ ዳውሎይዳ ዓኣ ታፅሞሬ ካታሞና ሃማቴይዳ ዓኣ ያሎ ዓሶኮ ጋሎንታ ዓንጋሞንታ ጌሦ ካታሞ ቢያ ማዢ ደዲሺኔ፤

5 ዬያጉዴ ሃሃ ሴሎሞን ኬዶ ዛሎ ቤትሆሬና ደኣሎ ዛሎ ቤትሆሬናይዳ ዓንጊና ዋዲንታ ጌሎ ካራ ዓኣያ፥ ዙሎ ኬልቂ ዲርቆና ካታማሰከንሢ ጊንሣ ደዲሺ ማዢኔ፤

6 ጊንሣ ሃሃ ባዕላቴ ካታሞንታ ያሎ ዓሶኮ ጋሎንታ ዓንጋሞንታ ጌሦንዶ ካታማኣ፥ ፓራሢንታ ሳርጌሎ ያይቶንታ ጌሦንዶ ካታማኣ፤ ዬያይዲ ሴሎሞን ዬሩሳላሜንታ ሊባኖኦሴንታይዳ ዒ ዋይሢ ዓጮ ጋራ ቢያ ማዢ ማሌ ባኮ ቢያ ማዢ ጋፒሴኔ።

7-8 ሴሎሞን ዋልቂ ማዶ ማዳንዳጉዲ ዔኬ ካኣና፤ ዓሲ ዓኣኔ፤ ዒሰራዔኤሌ ዓሳ ዔያቶኮ ዓጮ ፔ ዓጪ ማሂ ዓርቂ ዋዶና ዬያቶ ዋዶሞ ያሸኔ፤ ዬያታ ሃኖ ሄላንዳኣና ዓይሌ ማዒ ማዶ፡- ሂኢታ ዓሶ፥ ዓሞራ ዓሶ፥ ፔርዛ ዓሶ፥ ሂዋዌ ዓሶንታ ያይቶኣ ዓሶንታከ፤

9 ሴሎሞን ዒሰራዔኤሌ ዜርፃፓ ዓይጎ ዓሲያ ካራሚ ማሂ ማዲሺባኣሴ፤ ዓማና ዒሰራዔኤሌ ዓሳ፡- ፖኦሊሴ፥ ያሎ ዓሶኮ ሱኡጌ፥ ሳርጌሎ ያይቶ ዒሺ ዔኪ ዓኣዳ ዓሶኮ ሱኡጌ፤ ሃሃ ፓራሢና ያላ ዓሲ ማዒ ማዳኔ።

10 ሴሎሞን ማዝ ዲማ ዲማ ባኮ ወልቄና ማዳንዳጉዲ ጌይንቲ ዓይሎኮ ሱኡጌ ማዒ ላምዖ ጃኤታና ደንጊታሚ ዒሰራዔኤሌ ዓሲ ደኦሪንቴኔ።

11 ሴሎሞን ዒማና፡- «ናንገና ናንጋ ጎዳኮ ጫአቁሞ ሳኦፂና ጌሢንቲ ቤዛ ቢያ ዲማዴ ቤሲታሢሮ ታኦኮ ማቻ፥ ገብፄ ዓጮ ዓሴላ ዒሰራዔኤሌ ካኦቲ ዳውቴኮ ካኦቲሞ ማኦሮይዳ ናንጋኒ ኮይሱዋሴ» ጌዒ ገብፄ ካኦቲ ናዎ፥ ዒዛኮ ማቸ ዳውቴ ካታማፓ ኬሲ ዒዚ ማዢሴ ሜሌ ማኦሪዳ ናንጋንዳጉዲ ዳኬኔ።

12 ሴሎሞን ጌኤዢ ማኦሮኮ ቤርታ ሆታ ኮሹ፥ ያሕሲም ዒንጎ ባኮ ሸኢሾ ቤዛ ዑዖ ሚቺ ዒንጎ ዒንጊያ ናንገና ናንጋ ጎዳም ሸኢሹኔ፤

13 ሙሴ ዔርዘ ዋጋ ዓይሣ ጎይያና ፔቴ ፔቴ ቦንቸ ኬሎና ጌይፃ፡- ሃውሾ ኬሎና ኬሎና፥ ዓጊኖ ጃኤራ ጃኤራ፥ ሌዓ ሌዓ ቦንቸንታ ሃይሣ ቦንቸ ኬሎንሢዳ ዩንሢያ፡- ሙኑቆ ፃኣዛ ጌሊባኣ ካሦ ሙዒ ቦንቸ ኬሎ፥ ሃኣካ ካፄም ማኦሎ ቡሪያ ቦንቸንታ ዉልሾ ዴማ ዴዒ ቦንቸ ኬሎንታይዳ ናንገና ናንጋ ጎዳም ዒንጎ ባኣዚ ሸኢሻኔ።

14 ዒዛኮ ዓዴ ዳውቴ ኬሴ ዳምቦ ጎይያጉዴያ ቄኤሶ ዔይታ ማዳ ቤዛ ቤዛ፥ ሃሣ ሌዊ ዓሳ ያሕሲ ጋላቶ ዓይኑሞ ዓይናዲ ዓይናዲ ቄኤሶ ማኦዳንዳጉዲ ገኢጊሹኔ፤ ዩያጉዲ ሃሣ ያሕሲ ዓሢ፥ ዳውቴ ዓይሢ ጎይያ ጌኤዢ ማኦሮ ካፓ ዓሳ ፔቴ ፔቴ ዲሮኮ ጋሮ ጌሎ ካሮ ካፒያ ኬላ ኬላ ካፓንዳጉዲ ፓቂ ፓቂ ጌሢኔ።

15 ዔይታ ካኦቲሞ ማኦሮኮ ሜሆ ጌሦ ማኦሮንታ ሜሌ ባኮ ዛሎዋ ካኦቲ ዳውቴ ቄኤሶንታ ሌዊ ዓሶንታም ዓይሢ ጎይያና ፔቴ ባኣዚታዖ ፓጪሱዋዖ ቢያ ባኮ ኮይሳሢጉዲ ገኢጊሹኔ።

16 ዒማና ሴሎሞን ማዳኒ ማሌ ማሊፃ ቢያ፥ ጌይፃ፡- ጌኤዢ ማኦሮኮ ዓይያ ሹጮ ደቂያይዳፓ ዓርቃዖ ዴንዲ ጋፒንያ ሄላንዳኣና ማዳ ቢያ ኮሺና ማዳንቴኔ።

17 ዩካፓ ሴሎሞን ዔይኦሜ ዓጮይዳ ባዘ ዓጮ ዓኣ፥ ዔይዮንጋቤሬና ዔላቴ ጌይንታ ቤዛ ዓኣዴኔ፤

18 ዒማና ካኦቲ ኪራሜ፡- ኮሺ ዔራ ማዔ ዋኦያ ካኦሚሎ ዒሻዘንሢና ዔያቶኮ ሱኡጋ ዔኪ ሃንታ ዋኦያ ካኦሚሎዋ ሴሎሞንም ዳኬኔ፤ ዔይታ ሴሎሞንኮ ዋኦያ ካኦሚላ ማዳ ዓሶ ሱኡጎና ዋላ ዖፔሬ ጌይንታ ዓጮ ሙኬኔ፤ ዒኢካፓ ታጾ ደንጎ ሺያ ኪሎ ማዓ ዋርቄ ዔኪ ሙኪ ካኦቲ ሴሎሞንም ዒንጌኔ።

9

ሳኦባ ዓጮ ካኦቲላ ሴሎሞን ዛጋኒ ዴንዴሢ
(1ካአቶ. ማ 10:1-13)

1 ሳኦባ ዓጮ ካኦቲላ ካኦቲ ሴሎሞን ዴቃሢ ሄርሺሳ ዔራቶ ዛሎ ኬኤዚንታ ሃይሶ ቢያ ዋይዜኔ፤ ዩያሮ ዒዛ ሚርጌና ሜታሳ ያኦጪሢ ያኦጪ ዒ ዋዚ ጌይ ማሃቲያ ዋይዛኒ ዩሩሳላሜ ሙኬኔ፤ ዒዛ ዩሩሳላሜ ሙካኦና ሚርጌ ዒዛኮ ደንዛ ማዓ ዲቢ ዓሲ ዋላ ዒከ፤ ሳውቃ ቲሺንታ ዴኤሻንታ ሚርጌና ሚዛጸ ሹቺንታ ኮሺ ሚርጌ ዋርቁያ ጋኦሎና ጫኦኒኬ፤ ሴሎሞንና ዒዛ ካኦማዖ ፔ ዒኖና ያኦጫኒ ማሌ ባኮ ቢያ ያኦጮኔ፤

2 ዒዚያ ዒዛ ያኦጮ ባኮ ቢያ ማሂ ኬኤዜኔ፤ ዒዛም ዒ ቡሊ ኬኤዛኒ ባሼያና ዔርቶ ዒዲ ዓኦሺንቲ ዓቲ ያኦጪሢ ፔቲታዖ ባኦሴ።

3 ሳኦባ ዓጮ ካኦቲላ ሴሎሞን ዔራቶና ጌሰታ ጌኤዞ ዋይዜኔ፤ ሃሣ ዒዚ ማዢ፤ ዒዛኮ ካኦቲሞ ማኦሮዋ ዛጌኔ፤

4 ገንሣ ሃሣ ሴሎሞን ሙዓንዳጉዲ ካሢንቲ ሺኦካ ሙዓ፤ ዒዚ ቢታንቶ ዒንጌ ዓሳ ናንጋ ቤዞና ዒዛኮ ካኦቲሞ ማኦራ ማዳ ዓሳ ፔ ማዳ ማዳ ዓርቂ ማዳ ጎይያንታ ዩያ ማዳሮና ሙዖ ሙኤዚያሮዋ ዓሳ ማኦዓ ማኦዓሢንታ ጌኤዞ ማኦሮዳ ያኦሲም ዒንጎ ባኮዋ ቢያ ዛጌኔ፤ ዩያ ዒዛ ዛጋኦና ዒዛ ዋንዴ ማሌሢፓ ዑሣ ዓኦዴ ዴቃሢ ዒዛ ሄርሺሴ።

5 ዩካፓ ዒዛ ካኦቲ ሴሎሞን ኮራ፡- «ኔ ማዴ ባኮና ኔ ዔራቶኮ ዴኤቸሞ ታ ዓጫ ዓኦዖ ታ ዋይዜሢ ቢያ ጎኔኬ!

6 ጋዓንቲ ሃይካ ሙኪ ታኦኒ ታ ዓኦፒና ዛጋንዳያ ሄላንዳኦና ዩያ ኬኤዚንቲ ባኮ ጎኔኬ ታ ጌይባኦሴ፤ ዋዮና ታ ዋይዜሢ ዓኦፖና ታ ዛጌሢኮ ሄካሢታዖ ማዒባኦሴ፤ ጎኔ ኔኤኮ ዔራቶና ዖርጎቹሞና ታ ዓጫ ዓኦዖ ታኦኒ ዋይዜሰካፓ ዑሣ ዓኦዴ ባሺኬ።

7 ኔ ቤርቶ ቢያ ዋዴ ሙኪ ሙኪ ኔኤኒ ዔራቶና ጌሰታ ጌኤዞ ዋይዛ ዓሶና ኔኤኮ ደንዞና ዋዚ ባሊቲና ዓኦያዳይ!

8 ናንጊና ናንጋ ጎዳ ማዔ ኔ ያኦዛሢ ጋላቲንቶም! ዒዚ ኔና ዶኦሪ ዒሰራዔኤሌኮ ካኦቲ ማሃኒ ዒዛኮ ኮሺ ማላሢ ማዔሢሮ ጋላታ ዒዛ ሄሎም፤ ሃሣ ዒዚ ዒሰራዔኤሌ ዓሶ ናሽካ ናሹማ ናንጊና ጋቸዋያ ማዔሢሮ ያሎሞና ፒዜ ዋጊሢና ባይቁዋዖ ናንጋንዳጉዲ ኔ ማሆም ዒሰራዔኤሌኮ ኔና ዒ ካኦቲ ማሂ ዶኦሪሬ» ጌዔኔ።

9 ዒማና ዒንጋኒ ዔኪ ሙኬ ባኮ ቢያ ካኦቲ ሴሎሞንም ዒዛ ዒንጌኔ፤ ዒዛ ዒንጌ ባካ፡- ያይዶ ሺያ ኪሎፓ ባሺ ማዓ ዋርቁ፤ ሚርጌ ዲቢ ሳውቃ ቲሺንታ ዴኤሻንታ ሚዛጸ ሹቺንታኬ፤ ዒዛ

ሴሎሞንም ዒንጌ ሳውቃ ቲዡ ሚርጉማገ ባሻያ ማዔ ሳውቃ ቲሺ ይያኮ ቤርታ ዒዛም ዔኪ ሙኪንቲ ቤቂባኣሴ።

10 ያፔሬ ዓጫገ ሴሎሞንም ዋርቆ ዔኪ ሙኪ ካኣቲ ኪራሜና ካኣቲ ሴሎሞንናኮ ዓሳ ዒኢካፓ ዲቢ ዴኤሎ ዚቢቆንታ ሚዛጲ ሹቺንታ ዔኪ ይዔኔ፤

11 ሴሎሞን ይያ ዴኤሎ ዚቢቆና ጌኤዡ ማኣሮንታ ዒዛኮ ካኣቱም ማኣሮኮዋ ጊያ ሳኖ፥ ያኦሲ ቦንቾም ዓይናዳ ናኣቶኮ ጎኦሎንታ ፔቲ ቫሺና ዋርቆ ጎኦሎዋ ኮሼኔ፤ ይያጉዴ ዴኤሎ ዚቢቆና ኮሸና ዓይኑም ዓንጋሞጉዴያ ሃያኮ ቤርታ ዪሁዳ ዓጫ ፔቲታ? ጴዲ ቤቂባኣሴ።

12 ሳኣባ ዓጮ ካኣቲላ ኮዔ ባኮንታ ያኦጩ ባኮዋ ቢያ ካኣቲ ሴሎሞን ዒዛም ዒንጌኔ፤ ይይ ዒዚ ዒንጌ ባካ ዒዛ ዔኪ ሙኪ ባኮይዳፓ ቢያ ባሼኬ፤ ይካፓ ዒዛ ፔ ዓሶና ዎላ ፔ ዓጮ ማዒ ዴንዴኔ።

ካኣቲ ሴሎሞንኮ ቆሎ ሚርጉሞ

(1ካኣቶ. ማ 10:14-25)

13 ካኣቲ ሴሎሞን ሌዓ ሌዓ ላማታሚ ሃይህ ሺያ ኪሎ ማዓ ዋርቂ ዔካኔ፤

14 ይይ ዋርቃ ኮርሞ ኮርማ ዓሳ ዒዛም ጨጋሢንታ ኮርማ? ቃሲ ዒዚ ዴንቃሢንታ፤ ይያጉዲ ሃሣ ዓሬቦ ዓጮ ካኣቶንታ ዒሰራዔኤሌኮ ዴማ ዴማ ፓቆና ዓጮ ዎይሣ ዓሳ ጊኢራ ጌዒ ጨጋሢንታ ቃሉዎንቲኬ።

15 ሴሎሞን ላም? ፃኤታ ዴኤፒ ዴኤፒ ጊቲማ ኮሺሲ፥ ይያ ጊቲሞ ፔቲ ፔቲሢኮ ዑያ ላንካይ ኪሎ ማዓ ዋርቂና ጳርቂ ኮሼኔ።

16 ይያጉዲ ሃሣ ሃይህ ፃኤታ ዳካ ዳካ ጊቲማ ኮሺሲ ፔቲ ፔቲ ጊቲሞኮ ዑያ ሃይህ ኪሎ ማዓ ዋርቂና ጳርቂ ኮሼኔ፤ ይያቶ ቢያ «ለባኖኦሴ ዴኤሎ» ጌይንታ ዳልጎ ማኣራ ጌሣኔ።

17 ሃሣ ዒዚ ዳርሲ ዓቺና ፔቲ ዴኤፒ ካኣታ ዴዓ ያይታ ኮሺ ዋርቂና ዑያ ጳርቂ ሚዛጲሴ።

18-19 ይያ ካኣቱም ያይቶ ኬሰኪ ዴዒኒ ላሆ ጌዲጉዲ ጊዒ ኬሰኮ ባኣዚ ዓኣኔ፥ ይያ ፔቲ ፔቲ ጌደኮ ዓጫ ዓጫ ላም? ዎሊ ዑፃ ታጾ ላም? ዘቢ ኮሺንቲኔ፤ ይያ ካኣታ ዴዓ ያይቶኮ ቶኪ ጌሦ ዋርቂና ኮሺንቲ ባኣዚ ዓኣኔ፤ ያይቶኮ ሚዛቆ ዛሎና ቫውሎ ዛሎናይዳ ኩቺ ጌሦ ቤሲ ዓኣኔ፤ ኩጮ ጌሦሢኮ ኮይላ ኮይላ ፔቲ ፔቲ ዘቢ ማሊሲ

ማዠና ባኣዚ ዔቂ ዓኣኔ። ሜሌ ዓይጎ ዓጨ ካኣቲኮዋ ዬያ ማላ ካኣታ ዴዓ ያይታ ፔቲታዎ ባኣሴ።

20 ካኣቲ ሴሎሞን ዑዠ ዑሽካ ዓንጎንታ «ለባኖኦሴ ዴኤሎ» ጌይንታ ዴኤፖ ማኣሮይዳ ዓኣ ሜሃ ቢያ ጌኤሺ ዋርቁይዳፓ ኮሺንቲያኬ፤ ካኣቲ ሴሎሞን ዋዶና ቢራ ዑሣ ዓኣዴ ሚርጌሢሮ ዔኤቢ ጉሪ ባኣዚ ማዔኔ።

21 ካኣቲ ኪራሜም ማዳ ዓሳ ዒሻ ዋኣዎ ካኣሚሎና ዋላ ዴኤፖ ዋኣዎ ዑፃ ሃንቲ ቲርሴሴ ዴንዳ ዋኣሢ ካኣሚሎ ሴሎሞንቲ ዓኣኔ፤ ዬያታ ዋኣዎ ካኣሚላ ሃይሆ ለዔይዳ ፔቲና ዴንዲ ዋርቁንታ ቢራ ዓንጌንታ ዳርሲ ዓቺንታ ቃኣራንታ ቲኢኪንታ ዔኪ ዒዛም ሙካኔ።

22 ካኣቲ ሴሎሞን ሳያይዳ ዓኣ ካኣታፓ ቢያ ባሺ ያርጎቺ፤ ሃሣ ዔራ ዓሲኬ፤

23 ዓጮ ቢያይዳ ዓኣ ዓሳ ቢያ ያኦሲ ዒዛም ዒንጌ ዔራቶና ዒ ጌሰታ ጌኤዙ ዋይዛኒ ዒዛ ኮይላ ሙካኒ ስዓኔ፤

24 ዒዛ ባንሢ ሙካ ዓሳ ቢያ ቢራ ዓንጌ፤ ዋርቁ፤ ማኣዓ፤ ያልዚ ዓንጋም፤ ሳውቃ ቲሺንታ ዴኤሻንታ፤ ፓርንታ ባቁሎንታ ዒንጋኒ ዔኪ ሙካኔ፤ ዬይ ዓሳ ዔኪ ሙካሢ ለዓ ለዓኬ።

25 ሴሎሞንቲ ሳርጌሎ ያይቶና ፓራሢናም ያይዶ ሺያ ባርታ፤ ዬያጉዲ ሃሣ ታጳ ላምዎ ሺያ ፓር ዒሻ ዓሲያ ዓኣኔ፤ ዬያቶይዳፓ ዛሎ ዒዚ ዒዛና ዋላ ዬሩሳላሚይዳ ዴዓንዳጉዲ፤ ዛሎ ጌንሣ ዲማ ዲማ ካታምይዳ ፓቂንቲ ዴዓንዳጉዲ ጌሢኔ።

26 ሴሎሞን ዔፕራዒሴ ዋራፓ ፒሊሰፄኤሜ ዓጮና ዴንዲ ጌብፄ ዓጮ ዛጳ ሄላንዳኣና ዓኣ ካኣቶ ቢያ ፔኤም ጌኢሪሻኔ፤

27 ዒዚ ካኣታዲ ዋይሢ ዋዶና ዬሩሳላሚይዳ ዓንጎ ቢራ ቃንዮጉዲ፤ ሊባኖኦሴ ሚፆኮዋ ሚርጉማ ዪሁዳ ጌሚሮ ዴማ ቢያ ቤዛ ባቃላ ቦኣቦጉዲ ማዔኔ።

28 ሴሎሞንም ጌብፄና ሜሌ ዓጮናፓ ቢያ ፓራሢ ዔኪ ሙኮኔ።

ሴሎሞን ዋይሢ ዋዶ ሃይሳ ቃሚሢና

(1ካኣቶ. ማ 11:41-43)

29 ሴሎሞን ካኣታዲ ዋይሢ ዋዶኮ ሜሌ ሃይሳ ዓይፃፓ ዴንዲ ጋፓ ሄላንዳኣና ያኦሲ ማሊዎ ኬኤዛ ናኣታኣኔ ፃኣፔ ሃይሶይዳ፤ ሴኤሎ ዓጮይዳ ሾይንቲ ያኦሲ ማሊዎ ኬኤዛ ዓኪያ ኬኤዙ ያኦሲ ማሊዎይዳ፤ ሃሣ ዒሰራዔኤሌ ካኣቲ ዒዮርቢዓሜ ካኣታዴ ዋዶና ያኦሲ ማሊዎ ኬኤዛ ዒዶም ያኦሲ ፔጋሲ ዳቂ ባካ ፃኣፒንቲ ዓኣሢዳ ፃኣፒንቲ ዓኣኔ።

30 ሴሎሞን ናንጎ በዘ ዩሩሳሌም ወሃ ጉቤ
ዒሰራዔኤልይ ያይደታሚ ለዔ ካኦታዳ።

31 ዩካፓ ዒዚ ሃይቂ ፔ ዓዶ ዳውቲ ካታማ ዱኡቲም በዘይደ
ዒዛኮ ናኣዚ ርቢዓሜ ካኦታዳ።

10

ኬደ ዛሎይደ ናንጎ ዒሰራዔኤል ፃጸኮ ዋይዘ ዒያ
(1ካኣቶ. ማ 12:1-20)

1 ርቢዓሜ ካኦታሢ ኮዓ ኬደ ዛሎይደ ናንጎ ዒሰራዔኤል ዳራ
ሴኬሜይደ ቡኪንቲ ዒዛ ካፓሢ ርቢዓሜ ዒኢካ ዳንዳ።

2 ካኣቲ፡ ሴሎሞን ፑኒ ገብፄ ዓጮ ዳንዲ ዒኢካ ዓኣ ናባፄ
ናኣዚ ዒዮርቢዓሜ ዩያ ዋይዚ ማዒ ሙኬን፤

3 ዒማና ዒሰራዔኤል ዓጮኮ ኬደ ዛሎይደ ናንጎ ፃጸ ኪኢታ
ዳኪ ዒዛ ዓኤለሳዖ ዒዛና ዋላ ርቢዓሜ ኮራ ሙኪ፡-

4 «ኔ ዓዳ፡ ሴሎሞን ኦና ሄርቂ ዋይሢ ሜታሴን፤ ሃሢ ኔኤኒ ዩያ
ኦም ሸለዒሲ ናንጎ ኦኡኮ ኔ ገኢሺቲ ኔኤም ኦ ዋርቃንዳ።» ጌዔ።

5 ርቢዓሜ ዒያቶም፡ «ሃሢ ዳንዲጋፓ ሃይሣሳ ኬሎና ማዒ
ሙኩዋቲ» ጋዓዛ፡ ዳራ ዳንዳ።

6 ዩካፓ ካኣቲ፡ ርቢዓሜ ዒዛኮ ዓዶ ሴሎሞን ዘራ ዶንዘ ፔቲይደ
ዒኤሊ፡- «ታኣኒ ዳሮም ዋዚ ጌይ ኬኤዛንዳቲያ ዒንሢ ታኣም ኬኤዛ
ባኣዚ ዓኣ?» ጌዒ ያኦጩ።

7 ዶንዛ ማሃዖ፡- «ኔኤኒ ዳሮም ኮሺ ማዳያ ማዒ፡ ሃሣ ዒያታ
ያኦጩ ባኮኮ ገኢጋ ማሃሢ ኔ ማሄቲ ዒያታ ቢያ ዋዴ ጉሙርቂንቲ
ኔኤም ዋርቃያ ማዓንዳ።» ጌዔ።

8 ርቢዓሜ ጋዓንቲ ዶንዛ ዘሬ ዘሮ ቦሂ ዒዛና ዋላ ዲጩ፡ ዒዛኮ
ላጌ ማዒ ዒዛ ዘራ ጳጌዘንሢ ኮይላ ዳንዲ፡-

9 «ታ ዋዳንዳቲያ ዒንሢ ታኣም ኬኤዛ ባኣዚ ዓኣ? ዋይሢያ
ሸኤለዒሲ ዋይሣንዳጉዲ ታና ያኦጩ ዳሮም ታ ዋዚ ጌዒ
ማሆንዶይ?» ጌይ ያኦጩ።

10 ዒያታ ማሃዖ፡- «ዒያቶም ታኣኮ ኬኤሎ ናዖማ ታ ዓዶኮ
ኬርናፓ ባሽ ዓንዲርቃያ ማዓንዳ፤

11 ታ ዓዳ ዒንሢ ሄርቂ ሜታሴ ዋይሢ፤ ታኣኒ ሃሢ ዩያይዳፓ
ባሽ ዒንሢ ሄርቂ ዋይሣንዳ፤ ታ ዓዳ ዒንሢ ዠራፓና ጳርቂ፤ ታ
ጋዓንቲ ዒንሢ ጉማሬና ጳርቂ ሜታሳንዳ፤» ሂዚ ጌዔ። ጌኤ።

12 ዩካፓ ሃይሣሳ ኬሎና ዒዮርቢዓሜንታ ዳሮንታ ቢያ ርቢዓሜ
«ሙኩዋቲ» ጌዔ ኬሎና ማዒ ሙኬን፤

13 ዲማና ካኣቲ፥ ርቢዓሜ ጋርቾ ዶንዛ ዒዛ ዘሬ ዘር ሃሺ ዴርሞ ፑርታ ሃይሴ ጌሰትሢ ዓርቄኔ፤

14 ዒዛኮ ላጋ ዒዛ ዘሬ ጎይዖ፡- «ታ ዓዴ ዒንሢ ሄርቂ ሜታሲ ዋይሄኔ፤ ጋዓንቲ ታ ዬያፓ ባሼ ዒንሢ ሄርቂ ሜታሲ ዋይሣንዳኔ፤ ታ ዓዴ ዒንሢ ዠራፓና ጳርቄኔ፤ ታ ዒንሢ ጋዓንቲ ጉማሬና ጳርቂ ሜታሳንዳኔ!» ጌዔኔ።

15 ዬይ ያዲ ማዔሢ ሴኤሎይዳፓ ሙኩ፥ ያኦሲ ማሊያ ኬኤዛ ዓኪያ ዛሎናናባፍናኣዚ ዒዮርቢዓሜ ዛሎናንጊናናንጋ ጎዳ ኬኤዜ ባካ ኩማንዳጉዲኬ፤ ካኣቲ ርቢዓሜ ዴርኮ ማሊያ ቦሂ ሃሼሢ ያኦሲ ዬያይዳኒ ማሊያታሢርኩ።

16 ዲማና ካኣቲ ርቢዓሜ ዴራ ያኦጩ ያኦጩ ቦሂ ሃሼሢ ዴራ ዔራዖ፡- «ዳውቲንታ ማኣር ዓሶንታ ማይ ኑሞ ዓይጎዋዳንዳይ? ዔያታ ኑሞ ፔቲታዖ ማዴ ባኣዚ ባኣሴ! ዒሰራዔኤሌ ዴሬዮቴ! ዒንሢ ማኣሪ ማኣሪ ማዒ ዴንዲዋቴ! ርቢዓሜ ፔ ማሊያ ጎይዖ ማዶንጎ!» ጌዔኔ።

ዬያይዲ ዒሰራዔኤሌ ዴራ ርቢዓሜም ዋይዞ ዒዲ ፔ ማኣሪ ማኣሪ ማዒ ዴንዴኔ።

17 ዬያር ርቢዓሜ ዪሁዳ ዓጮይዳ ዓኣ ዴር ዑፃ ሌሊ ካኣታዴኔ።

18 ዬካፓ ካኣቲ ርቢዓሜ ዋልቄና ማዲሾ ዓሶኮ ሱኡጋሢ፥ ዓዶኒራሜ ዒሰራዔኤሌ ዓሶ ኮይላ ዳኬኔ፤ ዔያታ ጋዓንቲ ሹቻ ዒዛ ዲይ ዋዴኔ፤ ዲማና ርቢዓሜ ዑካዲ ሳርጌሎ ያይቶ ቶጊ ዬሩሳላሜ ዴንዳዖ ቶሊ ዓቲኔ።

19 ዲማፓ ዓርቃዖ ኬዶ ዛሎ ዓጫናንጋ ዒሰራዔኤሌ ዓሳ ካኣቲ ዳውቲ ማኣርሞ ዋይዞ ዒዳያ ማዔኔ።

11

ሺማዒያ ኬኤዜ ያኦሲ ማሊያ

(1ካኣቶ. ማ 12:21-24)

1 ርቢዓሜ ዬሩሳላሜ ሄላዖ ዪሁዳና ቢኢኒያሜና ፃጳፓ ዶኦሪ ዶኦሪ ኬሶና ፔቲ ፂኤታና ሳሊታሚ ሺያ ያልዚ ያላንዳ ጎኦባ ዓሲ ዔኪ ፔቲይዳ ቡኩሴኔ፤ ዬያ ዒ ማዴሢ ዒሰራዔኤሌ ፃጳ ያሊ ዓጮ ቢያ ፔ ዴማ ማሃኒ ማሊኩ።

2 ጋዓንቲ ያኦሲ ማሊያ ኬኤዛ ሺማዒያም ያኦሲ፡-

3 «ርቢዓሜም፥ ዬያጉዲ ዪሁዳና ቢኢኒያሜ ፃጳ ቢያሢም፤ ሃሣ ሃንጎ ዴርማኣ ቢያ፥

4 <ሲንሢኮ ዒጊኖ ዒሰራዔኤሌ ዓሶ ያላኒ ዴንዲፖቴ፤ ቢያሢ
ሲንሢ ማኣሪ ማኣሪ ዴንዲዋቴ፤ ዬይ ባካ ያዲ ማዔሢ ታኣኒ ማዖንጎ
ጌዔምኬ» » ጌይ ከኤዛንዳጉዲ ዓይሄኔ። ዬያር ዬያታ ቢያሢ
ናንጊና ናንጋ ጎዳ ጌዔ ባኮ ዋይዚ፤ ዒዮርቢዓሜ ያሊያ ሃሺ ፔ ማኣሪ
ማኣሪ ዴንዴኔ።

ርቢዓሜ ካታሞ ከልቂ ዶዲሺ ዲርቄሢ

5 ርቢዓሜ ዬሩሳላሜይዳ ናንጊ ሱንፃ ሃካፓ ዴማ ፓይዲንታ
ዪሁዳና ቢኢኒያሜ ካታሞም ዶዲ ከኤሌ ኮሼኔ፤ ዬንሢ
ካታሞንሢ፡-

6 ቤኤቴሌሄሜ፤ ዔፃሜ፤ ቴቆዓ፤

7 ቤትፀራ፤ ሶኮ፤ ዒዲላሜ፤

8 ጋኣቴ፤ ማሪሻ፤ ዚፔ፤

9 ዓዶራይሜ፤ ላኪሺ፤ ዓዜቃ፤

10 ያርዓ፤ ዓያሎኔንታ ከብሮኦኔንታኬ።

11 ርቢዓሜ ዬንሢ ካታሞንሢ ዶዲሺ ከልቂ ዲርቄኔ፤ ፔቴ ፔቴ
ካታሞም ፔቴ ፔቴ ሱኡጌ ዶኦሬኔ፤ ሃሣ ፔቴ ፔቴዘንሢዳ ሃኣኮ፤
ሪሚታፓ ኮሽ ዛይቶንታ ዋይኖ ዑዠንታ፤

12 ዬያጉዲ ሃሣ ጊቲማና ዋርሢና ቡኩሴኔ፤ ዬያይዲ ዪሁዳና
ቢኢኒያሜ ዓጮ ፔ ዴማ ማሄኔ።

ቄኤሶና ሌዊ ዓሶናኮ ዒሰራዔኤሌይዳፓ ዪሁዳ ሙኪያ

13 ቄኤሶና ሌዊ ዓሶና ዒሰራዔኤሌ ዓጮ ጉቤይዳፓ ዶኦሎ
ዛሎና ዓኣ ዪሁዳ ዓጮ ሙኬኔ፤

14 ዒሰራዔኤሌ ካኣቲ ዒዮርቢዓሜና ዒዛ ቤዛ ጌሊ ካኣታዳ፤
ዒዛኮ ዜርፃ ሌዊ ዓሳ ናንጊና ናንጋ ጎዳኮ ቄኤሴ ማዒ ማዳንዳጉዲ
ዓይሢንቲባኣሢሮ ሌዊ ዓሳ ዪሁዳና ዬሩሳላሜና ዔያታ ሙኬሢ
ቆልሞ ሄንቆ ቤዘና ሜሌ ባኮ ቢያ ሃሺኬ።

15 ዒዮርቢዓሜ ጌሜራ ጌሜራ ሜሌ ዓሳ ፔ ያኦዞ ካኣሽካ ቤዛ
ማዳንዳ፤ ሃሣ ፃላሄና ዒዚ ፔኤም ጌማቶ ማሊሲ ኮሼ ሜሌ
ያኦዞናም ዚጊ ካኣሽካንዳ ፔ ቄኤሴ ዶኦሪናኣኮኬ።

16 ዬያፓ ዔቄያና ናንጊና ናንጋ ጎዳ ማዔ ዒሰራዔኤሌ ያኦዞሢ
ፒዜ ማዔ ዓያናና ካኣሽካኒ ኮዓ ዓሲ ዒሰራዔኤሌ ፃፅ ቢያይዳፓ
ከሰከ ሚርጌ ዴፊ ናንጊና ናንጋ ጎዳ ማዔ ዔያቶኮ ቤርታኣ ዓዶንሢ
ያኦዞሢም ዒንጎ ባኣዚ ሺኢሻኒ ሌዊ ዓሶ ጊንፆ ዬሩሳላሜ ሙኬኔ።

17 ዬይ ማዳ ዪሁዳ ካኣቲ ዶዲሼኔ፤ ሃይሃ ሌዔ ጉቤ ሴሎሞኔኮ ናኣዚ ርቢዓሜ ዔያታ ማኣዴኔ፤ ዔያታ ካኣቲ ዳውቴና ሴሎሞኔና ማዳ ጎይፆ ማዲ ኮሺና ናንጌኔ።

ርቢዓሜ ማኣሮ ዓሶ

18 ርቢዓሜ ማሃላቴ ጌይንታ ላኣሊስከኖ ዔኬኔ፤ ዒዛኮ ዓዴ ያሪሞቴ ጌይንታ ዳውቴኮ ናይ ማዓዛ፤ ዒንዳ ዒዛኮ ዓቢጋይሎ ጌይንታ ዒሴዬኮ ናኣዚ ናፆ ዔኤለዓቤ ናዎኬ፤

19 ማሃላቴ ዪዑሹ፤ ሽማሪያና ዛሃሜ ጌይንታ ሃይሃ ዓቲንቄ ርቢዓሜሞ ሾዔኔ፤

20 ዬካፓ ናንጌቤቃ ርቢዓሜ ማዕካ ጌይንታ ዓቤሴሎሜ ናዎ ዔኪ፡- ዓቢያ፡ ዓታዬ፡ ዚዛና ሽሎሚቴ ጌይንታ ያይዶ ዓቲንቄ ናይ ሾዔኔ።

21 ርቢዓሜኮ ዋሊ ዑፃ ታጾ ሳሊ ላኣሊና ላሂታሚ ጊንፃኣ ማቸንሢ ማዓ ላኣሊያ ዓኣኔ፤ ዔያቶይዳፓ ላማታሚ ሳሊ ዓቲንቄና ላሂታሚ ዉዲሮ ናይ ዒ ሾዔኔ፤ ዒዚ ፔኤኮ ላኣሎና ጊንፃኣ ማቸንሢ ቢያሢዳፓ ማዕካ ጋዓዛ፤ ዓቤሴሎሜ ናዎ ባሽ ናሽካኔ፤

22 ዬያጉዲ ሃሣ ፔኤኮ ናኣቶይዳፓ ቢያ ማዕካይዳፓ ሾይንቲ ዓቢያ ጎፆሢ ባሽ ዒ ናሽካኔ፤ ዬያሮ ዒዚ ፔ ቤዛ ናኣዚ ዓቢያ ካኣታዳንዳጉዲ ማሊሢሮ ዒዛ ጌርሲንሢኮ ሱኡጌ ማሂ ዒዛ ዶኦሬኔ፤

23 ርቢዓሜ ዔራቶና ፔኤኮ ዓቲንቄ ናኣቶ ሱኡጌ ማሂሢና፤ ኬልቂ ዲርቆና ዪሁዳና ቢኢኒያሜ ካታሞ ቢያይዳ ሱኡጌ ማሂ ዶኦሬኔ፤ ዬካፓ ዔያቶሞ ኮይሳ ባኣዚ ቢያ ሚርጌና ዒንጌኔ፤ ሚርጌ ላኣሊያ ዔያታ ዔካንዳጉዲ ማሂኔ።

12

ጌብፃ ዓጮ ካኣቲ ዪሁዳ ዓጮ ያሌሢ

(1ካኣቶ. ማ 14:25-28)

1 ርቢዓሜ ካኣቲሞና ዔርቲ ዶዴስካፓ ዒዛንታ ዒስራዔኤሌ ዴሬኣ ቢያ ናንጌና ናንጋ ጎዳኮ ዎጎ ሃሽኔ፤

2 ናንጌና ናንጋ ጎዳሞ ዔያቶኮ ዓኣ ጉሙርቂንቲፆ ዔያታ ፓጪሴሢሮ ርቢዓሜ ካኣታዴ ዶንጋሳ ሌዖና ጌብፃ ካኣቲ ሺሻቄ ዬሬሳላሜ ያሌኔ።

3 ዒዚ ዒማና ፔቲ ሺያና ላምፆ ፃኤታ ሳርጌላ ያይታ፡ ላሂታሚ ሺያ ፓራሢና ያላ ዓሲንታ ሃሣ ሚርጌማ ፓይዲንቲዎ ፖኦሊሴ ዔኪ

ዩሩሳላሜ ያሌኔ፤ ዬያ ሺሻቄኮ ያላ ዓሶ ባኣካ ሊቢያ ዓሲ፥ ሱካ ዓሲንታ ዒቶጲያ * ዓሲያኣ ዓኣኔ፤

4 ካኣቲ፥ ሺሻቄ ኬልቄ ዲርቆና ዪሁዳ ካታሞ ያሊ፥ ዴንዲ ዩሩሳላሜ ሄላንዳኣና ዓርቄኔ።

5 ዬካፓ ያሕሲ ማሊያ ኬኤዛ ሹማዒያ ሺሻቄ ዒጊጨ ዩሩሳላሜይዳ ዋሊ ዑፃ ቡኪንቲ ዓኣ ካኣቲ ርቢዓሜና ዪሁዳ ዓሶ ሱኡጎ ኮይላ ዴንዲ፡- «ናንጊና ናንጋ ጎዳ ኬኤዛያ ታና ዒንሢ ሃሹሢሮ ታ ዒንሢ ሺሻቄ ኩጫ ሃሹኔ» ገዓኔ።

6 ካኣቲ ርቢዓሜና ዪሁዳ ዓሶኮ ሱኡጋ ዔያታ ጎሞ ማዲ ዳቤሢ ዔሬሢሮ፡- «ናንጊና ናንጋ ጎዳ ማዴ ባካ ቢያ ፒዜኬ» ገዓኔ።

7 ናንጊና ናንጋ ጎዳ ዒማና ዔያታ ፔና ሂርኪዴሢ ዛጋያ ፔ ማሊያ ኬኤዛ ሹማዒያ ላሚ ገንሣ፡- «ሃሣ ዔያታ ፔኤኮ ዳቢንቶ ዔሬ ፔ ቶኦኮ ሂርኪዴሢሮ ታ ዔያቶ ባይዛዓኬ፤ ሺሻቄ ዔያቶ ያላ ዋዶና ዑኩና ዓውሲ ታ ዔያቶ ዳቂሻንዳኔ፤ ዩሩሳላሜይዳ ዳጎና ታ ማዲኒ ማሌ ባኮ ቢያ ማዳዓኬ፤

8 ያዲ ማዔቲያ ታ ዋይሣሢና ሳያ ካኣታ ዋይሣሢናኮ ባኣካ ዓኣ ዲሙሞ ዔያታ ዔሬንዳጉዲ ሺሻቄ ያሎና ዔያቶ ባሺ ዋይሣንዳኔ» ገዓኔ።

9 ዬያሮ ካኣቲ ሺሻቄ ያሎና ባሺ ዩሩሳላሜ ጌሊ፥ ጌኤዢ ማኣሮና ካኣቲሞ ማኣሮናይዳ ዓኣ ባኮ ቢያ፤ ሃሣ ካኣቲ ሴሎሞኔ ዋርቆይዳፓ ኮሺሴ ጌቲማኣ ዓቱዋንቲ ቡሪ ዔኬኔ።

10 ካኣቲ ርቢዓሜ ሺሻቄ ዔኬ ጌቲሞ ቤዛ ሜሌ ጌቲማ ሞኦና ዓንጊና ኮሺሲ ካኣቲሞ ማኣሮ ዲሮ ካሮ ካፓ ዓሶኮ ሱኡጋ ጌሣንዳጉዲ ዒንጌኔ።

11 ካኣቲ ጌኤዢ ማኣሪ ሙካ ዋዶና ዋዶና ዬንሢ ካፓዘንሢ ዬንሢ ጌቲሞንሢ ዓርቄ ካኣቲና ዋላ ሃንታኔ፤ ካኣቲ ዴንዴስካፓ ማሂ ካፓዘንሢ ዔያቶኮ ቆልያ ጋራ ጌሣኔ፤

12 ዒማና ካኣቲ ርቢዓሜ ፔኤኮ ዳቢንቶ ዔሬ ፔና ሂርኪዴሢሮ ናንጊና ናንጋ ጎዳኮ ጎሪንታ ጋፒንሢ ሜቶ ሄሊሲባኣሴ፤ ዋዋይቲይ ገዔቲ ዪሁዳ ዓጮ ቢያይዳ ኮሺ ባኣዚ ማዓኔ።

ርቢዓሜ ካኣቲሞ ዋዶ ሃይሳ ቃሚሢና

13 ርቢዓሜ ናንጎ ቤዞ ፔኤኮ ያሕሲ ካኣሽኪንታኒ ዒሰራዔኤሌ ዓጮ ጉቤሢ ባኣካፓ ዶኦሬ ዩሩሳላሜ ካታማ ማሂ ታጾ ላንካይ

* 12:3 ዒቶጲያ ጋዛዙ፡- ዔብሬ ዓሶ ሙኡጮ ማፃኣፓ «ኮሺ» ጋዓኔ፤ ዬና ዓጫ ጊብዪ ዓጮኮ ዶኦሎኬ፤ ዬና ቤዛ ሃሢ ዓኣ ዒቶጲያንታ ሱዳኔንታኮ ዛላ ዓጪ ፔ ጋራ ማሃኔ።

12:9 1ካኣቶ. ማ 10:16-17፤ 2ያሕሲ. ዓሃኬ 9:15-16።

ሌዔ ወይሄኔ፤ ፔኤኮ ካኦቱሞ ቢታንቶዋ ደዲሼኔ፤ ዒዚ ካኦታዳ ዋደና ሌዓ ዒዛኮ ያይዲታሚ ፔቲ ሌዔኬ፤ ርቢዓሜኮ ዒንዳ ናዕማ ጌይንታያ ዓሞኦኔ ዓጫ ሾይንቲ ዓሲኬ፤

14 ናንጊና ናንጋ ጎዳ ጋዓ ባኣዚ ዒራኒ ርቢዓሜ ኮዒባኣሢ ፑርታ ባኣዚ ማዴኔ፤

15 ካኦቲ ርቢዓሜ ማዴ ባካ ቢያ ዓይፃፓ ጋፖ ሄላንዳኣና፤ ዬያጉዲ ሃሣ ዒዛ ማእሮ ዓሶኮ ሃይሳ ያኦሲ ማሊያ ኬኤዛ ሹማዒያና ዒዶ ሃይሶና ማፃኣፓ ፃኣፒንቲ ዓኣኔ፤ ዒማና ርቢዓሜና ዒዮርቢዓሜና ጋፑዋ ያልዚ ቢያ ዋዶ ያልታኔ፤

16 ዬካፓ ርቢዓሜ ሃይቁ ዳውቲ ካታማ ዓኣ ካኦታ ዱኡታ ቤዛ ዱኡቲኔ፤ ዒዛ ቤዛ ዒዛኮ ናኣዚ ዓቢያ ካኦታዴኔ።

13

ዓቢያ ዒዮርቢዓሜ ያሌሢ

(1ካኣቶ. ማ 15:1-8)

1 ዒዮርቢዓሜ ዒሰራዔኤሌይዳ ካኦታዴንቲ ታጾ ሳላሳ ሌያና ዓቢያ ዪሁዳይዳ ካኦታዴኔ፤

2 ዒዚ ዬሩሳላሜይዳ ዴዒ ሃይሣ ሌዔ ካኦታዴኔ፤ ዒንዳ ዒዛኮ ሚካያ ጎዞዛ ገቢዓ ካታማ ሾይንቲያ ዑሪዔኤሌ ናዎኬ።

ዓቢያና ዒዮርቢዓሜና ባኣካ ዴኤፒ ያልዚ ኬሰኬኔ፤

3 ዒማና ዓቢያ ያይዶ ፃኤታ ሺያ ያላ ዓሲና ኬሰካዛ፤ ዒዮርቢዓሜ ሃሣ ሳሊ ፃኤታ ሺያ ፖኦሊሴ ዔኪ ዋሊ ያሎ ዓርቄኔ።

4 ዬካፓ ጌሜራ ሚርጌ ዓኣ ዔፕሬኤሜ ዓጮይዳ ዓኣ ፃማራይሜ ጌይንታ ዴካ ኬሰኪ ዓቄኔ፤ ዒዚ ፔኤኮ ዑኡዞ ዴገዲ ዒዮርቢዓሜና ዒሰራዔኤሌ ዓሶናሞ ጉቤ ዒላታያ፡- «ኮሺ ዋይዙዋቲ!

5 ዳውቲና ዒዛኮ ዜርያና ዒሰራዔኤሌይዳ ናኣናና ካኦታዳያ ማዒያ ናንጊና ናንጋ ጎዳ ማዒ ዒሰራዔኤሌ ያኦዛሢ ዳውቲና ዋላ ዓገፁዋ ጫኣቁሞ ጫኣቁሢ ዒንሢ ዔሩዋዓዳ?

6 ሂዳያ ሃይ ሴሎሞኔ ካራማሢ፤ ናባፄ ናኣዚ፤ ዒዮርቢዓሜ ፔ ጎዳሢ ሴሎሞኔም ዋይዞ ዒፃንቲሞ፤

7 ዬያ ሌሊቱዋንቲ ናንጊቤቃ ዒዮርቢዓሜ ናንጊም ማሉዋ ፑርታ ዓሲ ቡኩሴኔ፤ ዬይ ዓሳ ሃጊ ናይ ዓኣያ፤ ሃሣ ዒናዲባኣያ ማዒ ዔያቶ ቃዛኒ ዳንዳዒባኣ ርቢዓሜኮ ካራ ባይዘኔ።

8 ሃሢ ዒንሢ ናንጊና ናንጋ ጎዳ ዳውቲ ዜርያም ዒንጌ ካኦቱሞ ቢታንቶ ባይዛኒ ማሌኔ፤ ዒንሢኮ ዬይ ማሊያ ጋፒንሢ ሄላንዳጉዲ ሚርጌ ያልዚ ዓሲ ዒንሢ ገኢጊሼኔ፤ ዒንሢኮ ካኣሽኮ ባኣዚ

ማዓንዳጉዲ ዲዮርቢዓሜ ዋርቁና ኮሺሴ፥ ናኦሮ ማላ ባኮ ዲንሢ ዔኪ ሙኬኔ።

9 ናንጊና ናንጋ ጎዳኮ ቄኤሴ ማዔ ዓኦሮኔ ዜርዖና ሌዊ ዓሶና ዲንሢ ዳውሴኔ፤ ዬያቶ ቤዛ ሜሌ ዴራ ማዳ ጎይዖ ዲንሢም ቄኤሴ ዲንሢ ዶኦሬኔ፤ ፔቲ ዚያ ገማይ ሃንጎ ላንካይ ማራይ ዔኪ ዲንሢ ኮራ ሙካ ዓይጎ ዓሲያ ያኦሲቱዋ ዲንሢኮ ሜሌ ያኦዛም ቄኤሴ ማሂ ዲንሢ ዶዶኦራኔ።

10 «ኦኦኒ ጋዓንቴ ሃሢያ ናንጊና ናንጋ ጎዳ ማዔ ኦ ያኦዛሢ ካኦሽካኔ፤ ዲዛ ሃሺ ኦ ሸኢካዓኬ፤ ዓኦሮኔ ዜርዖ ማዔ ቄኤሳ ያኦዛሢም ማዲያ ሃሺባኦሴ፤ ሌዊ ዓሳኦ ቤርታ ማዳ ጎይዖ ቄኤሶ ማኦዳንዳኔ፤

11 ቢያ ኬላ ጉቴና ዋንቴና ሳውማ ኮሺ ማዔ ዑንጆና ቆልሞ ሚቺ ዲንጎ ዲንጊዖዋ ናንጊና ናንጋ ጎዳም ሸኢሻኔ፤ ዳምቦ ጎይዖና ጌኤሾና ጋባዶይዳ ካሦ ዲንጎ ዲንጊዖዋ ሸኢሻኔ፤ ዔያታ ቢያ ኬላ ዋንቶ ዋንቶ ዋርቃፓ ኮሺንቴ፥ ፖዖ ጌሦ ሻርኖ ዑፃ ዓኦ ፖዖ ፖዒሣኔ፤ ኦኦኒ ያኦሲኮ ዓይሢያ ማዲ ኩንሣኔ፤ ዲንሢ ጋዓንቴ ያኦሲ ሃሺኔ።

12 ኦኦኮ ሱኡጋሢ ፔኤሮ ዲዛ ያኦዛሢኬ፤ ዲዛኮ ቄኤሳ ዛዮ ዋርቃኒ ገኢጊንቴ ሃይካ ኦኦና ዋላ ዓኦኔ፤ ዔያታ ዛሣሢ ዋርቆ ዓርቃዛ ኦኦኒ ዲንሢ ያሊያ ዓርቃንዳኔ፤ ዬያሮ ዒሰራዔኤሌ ዓሲዮቴ! ፔቲታዖ ዲንሢ ያሎና ባሻኒ ኦና ዳንዳዑዋኦሢሮ ናንጊና ናንጋ ጎዳ ማዔ ዲንሢኮ ቤርታኦ ዓዶንሢ ያኦዛሢና ያልቴፖቴ!» ጌዔኔ።

13 ዒማና ዲዮርቢዓሜ ፔኤኮ ያሎ ዓሶኮ ዛሎ ዪሁዳ ያሎ ዓሶኮ ጊንዖ ዛሊና ካቲ ያላንዳጉዲ ዳካዖ ዓቲ ዓሶ ሃሣ ዪሁዳ ያሎ ዓሶኮ ቤርቲና ሙኪ ያሎ ዓርቃንዳጉዲ ዓይሢኔ።

14 ዪሁዳ ዓሳ ኮይሎ ዛጊ ዔያታ ማንጊንቴሢ ዴንቃዖ ዔያቶ ማኦዳንዳጉዲ ናንጊና ናንጋ ጎዳ ባንሢ ዒላቴኔ፤ ቄኤሳኦ ዛዬ ዋርቄኔ፤

15 ዪሁዳ ዓሳ ዑኡዛ ዴጊዲ ዒላቴኔ፤ ዬካፓ ካኦቲ ዓቢያ ዔያቶ ዔኪ ኬሰኬም ዔያታ ያሌኔ፤ ያኦሲ ዒማና ዲዮርቢዓሜንታ ዒሰራዔኤሌኮ ያሎ ዓሶዋ ያሊ ባሺኔ፤

16 ዬያሮ ዒሰራዔኤሌ ዓሳ ዪሁዳ ዓሶ ቤርታፓ ጳሽኬኔ፤ ያኦሲ ዒሰራዔኤሌ ዓሶ ዪሁዳ ዴሮም ዓኦሢ ዲንጌኔ፤

17 ዓቢያና ዲዛኮ ያሎ ዓሶና ዒሰራዔኤሌ ዓሶ ያሎና ባሺ ዴቢ ዓሲ ዋዴኔ፤ ዬኖ ያሎና ዒሰራዔኤሌ ፖኦሊሶፓ ዶኦሪንቴያ ዶንጎ ዪኤታ ሺያ ፖኦሊሴ ሃይቄኔ።

18 ዪሁዳ ዴራ ናንጊና ናንጋ ጎዳ ማዔ ዔያቶኮ ቤርታኦ ዓዶንሢ ያኦዛሢና ጉሙርቁንቴሢሮ ዒሰራዔኤሌ ዓሶ ያሊ ባሺኔ፤ ዒሰራዔኤሌ ዓሳ ጋዓንቴ ቦርሲንቴኔ።

19 ዓቢያ ዒዮርቢዓሜኮ የሎ ዓሶ ዒሚና ዳውሴኔ፤ ዒዮርቢዓሜ ካታሞይዳ፡- ቤኤቴኤሌ፥ ዪሻናንታ ዒፕሮኔንታ ዒያቶኮ ኮይላ ዓኣ ጉርዶና ዋላ የሊ ባሺ ዒ ዓርቄኔ፤

20 ዒሚፓፓ ዒዮርቢዓሜ ዓቢያ ካኣታዲ ዓኣ ዋዶና ዋልቄ ዴንቂ ዒቃኒ ዳንዳዒባኣሴ፤ ናንጊና ናንጋ ጎዳ ጋፒንፆይዳ ዒዮርቢዓሜ ዋዴኔ።

21 ዓቢያ ጋዓንቴ ኮሺ ዶዲ ዶዲ ዓኣዴኔ፤ ታጾ የይዶ ላኣሊ ዒከ ላማታሚ ላምዎ ዓቲንቄ ናይና ታጾ ላሆ ዉዲሮ ናይ ሾዔኔ፤

22 ካኣቲ ዓቢያኮ ሃንጎ ዓቴ ሃይሶንታ ዒዚ ጌሰቴ ጌኤዞንታ ማዴ ማዳኣ ቢያ የኣሲ ማሊዎ ኬኤዛ ዒዶ ፃኣፔ ማፃኣፖይዳ ፃኣፒንቴ ዓኣኔ።

14

ዪሁዳ ካኣቲ ዓኣሳ ዒቶጺያ ዓሶ የሎና ባሺሢ

1 ካኣቲ ዓቢያ ሃይቄ፥ ዳውቴ ካታማ ካኣታ ዴኡታ ቤዛ ዴኡቴኔ፤ ዪካፓ ዒዛ ቤዛ ዒዛኮ ናኣዚ ዓኣሳ ካኣታዴኔ፤ ዒ ካኣታዴ ዋዶና ዓጫ ታጾ ለዔ ኮሺ ናንጌኔ።

2 ዓኣሳ ዒሚና ኮሺ፥ ሃሣ ፒዜ ማዔ ባኣዚ ማዲ ናንጊና ናንጋ ጎዳ፥ ፔኤኮ የኣዛሢ ዋዛሴኔ፤

3 ዒ ዋዋዴይ ጌዔቴ ሜሌ የኣዞም ዒንጎ ባኮ ዒንጎ ቤዞና ጌሚሮይዳ ዓኣ ሜሌ ዓሳ ፔ የኣዞ ካኣሽካ ቤዞ ቢያ ባይዜኔ፤ ካኣሽካ ኮሾና ዳኣቦ ሹጮ ሜንሣኔ፤ ዓሺራ ጌይንታ ላኣሎ የኣዜሎኮዋ ማሊሲ ማዞና ባኮ ቲቂ ቲቂ ኬኤሬኔ፤

4 ዓኣሳ ዪሁዳ ዴሮ ዒያታ ፔኤኮ ቤርታኣ ዓዶንሢኮ ጎዳ ማዔ የኣዛሢ ማሊዎ ማዲ ኩንሣንዳጉዲ፥ ዒዛኮ ዋጎንታ ዓይሢፃንታ ካፓንዳጉዲ ዓይሣኔ፤

5 ሜሌ ዓሳ ፔ የኣዞ ዚጊ ካኣሽካ ቤዞና ዑንጆ ጩቢሻ ቤዞ ዪሁዳ ካታማፓ ቢያ ባይዜሢሮ ዒ ካኣታዴ ዋዶና ሳዓ ኮሺ ማዔኔ፤

6 ሃሣ ዪሁዳ ካታሞኮዋ ዋርዲያ ቤሲ ኮሺኔ፤ ናንጊና ናንጋ ጎዳ ሳዩ ኮሺ ማሃሢሮ ሚርጌ ለዔ የልዚ ባኣያ ማዔኔ፤

7 ዓኣሳ ዪሁዳ ዴሮም፡- «ሹጮና ማዞና ማኣሮንታ ዙሎ ኬልቂ ዲርቆና ዲፆንታ ዓንጎና ጋጋርቂ ዋዶ ዲሮ ካኣታ ማዞ ካታሞ ኦኡኮ ኦ ዋርዲ ጊኢጊሾም፤ ናንጊና ናንጋ ጎዳ ማዔ ኦ የኣዛሢኮ ማሊዎ ኦ ማዲ ኩንሣሢሮ ሳዔላ ኦ ኩጮ ጋራ ዓኣኔ፤ ናንጊና ናንጊና ጎዳ ኦና ካፔኔ፤ ቢያ ዛሎና ሂርጊሻ ባኣዚ ባኣያ ማሂ ሃውሾ ኦም ዒንጌኔ» ጌዔኔ፤ ዪያሮ ዴራ ካታሞ ዓጮ ዲርቂ ዋርዲዬኔ፤ ሃሣ የርጎጩኔ።

8 ካኦቲ ዓኣሳኮ ዴኤፒ ዴኤፒ ገቲማና ዋርሢና ዓርቄ ሃይሆ ዪኤታ ሺያ ያልዚ ዓሲ ዪሁዳፓ፡ ዳካ ዳካ ገቲማና ሂኢሺና ዓርቄ ላምያ ዪኤታና ሳሊታሚ ሺያ ያልዚ ዓሲ ቢኢኒያሜይዳፓ ዓኣኔ፤ ዬያታ ቢያ ያሎ ዛሎ ኮሺ ዔሬያ ዔርቲ ፖኦሊሴኬ፤

9 ዛራሄ ጌይንታ ዒቶጲያ ዓሲሰኬይ ፔቲ ሚሎኔ ፖኦሊሴና ሃይሆ ዪኤታ ሳርጌላ ያይታና ዔኪ ዪሁዳ ያሊ ዓርቃኒ ማሬሻ ጌይንታ ቤዘ ሙኬኔ፤

10 ዬያር ዓኣሳ ዔያቶ ያላኒ ኬሰካዖ ላምዓሢ ዋላ ያልቶር ማሬሻ ኮይላ ዓኣ ዪፓታ ዶኦጫ ቤሲ ቤሲ ዓርቄ ገኢጌኔ፤

11 ዒማና ዓኣሳናንገናናንገ ጎዳ ማዔ ፔ ያኦዛሢ፡- «ናንገናናንገ ጎዳሢዮ! ያሎ ዓሶ ሚርጌሢ ማዔቲያ ዳኮ ዓሶ ማኣዳኒ ኔ ዳንዳዓኔ፤ ናንገናናንገ ጎዳ ማዔ ኑ ያኦዛሢዮ! ኔና ኑ ጉሙርቃሢ ሃያ ዲቦ ያሎ ዓሶና ኑ ያልታኒ ሙኬኔ፤ ኑና ማኣዳ፤ ናንገናናንገ ጎዳሢዮ፡ ኔ ኑኡኮ ያኦዛሢኬ፤ ኔና ባሻኒ ያኦኒያ ዳንዳዐብሴ» ጌይ ሸኢቄኔ፡፡

12 ዒቶጲያ ዓሳ ያሎና ባሺንታንዳጉዲ ዓኣሳንታ ያሎ ዓሶዋ ናንገናናንገ ጎዳ ማኣዳኔ፤ ዬያር ዒቶጲያ ዓሳ ባሺንቲ ጳሽኬኔ፡፡

13 ዒማና ዓኣሳንታ ዒዛኮ ያሎ ዓሶንታ ዔያቶ ዴንዲ ጌራሬ ሄላንዳኣና ዳውሴኔ፤ ዬኖ ኬሎ ዒቶጲያኮ ያሎ ዓሶይዳፓ ሚርጌ ዓሲ ሃይቄሢር ያሎ ዓሳ ላሚ ዶዲ ዔቄ ያላኒ ዳንዳዒባኣሴ፤ ዬያይዲ ናንገናናንገ ጎዳና ዒዛኮ ያሎ ዓሶና ዔያቶ ያሌም ዒቶጲያ ዓሳ ባሺንቲኔ፤ ካኦቲ ዓኣሳኮ ያሎ ዓሳ ሚርጌ ባኣዚ ዲዒ ዔኬኔ፤

14 ዬኖ ዓጮ ኮይላ ዓኣ ዴራ ናንገናናንገ ጎዳ ማዴ ባኮ ዛጊ ሚርጌ ዲቃቲኔ፤ ዓኣሳኮ ያሎ ዓሳ ጌራሬና ኮይሎይዳ ዓኣ ካታሞ ቢያ ባይዘኔ፤ ካታሞ ቢያይዳፓ ሚርጌ ባኣዚ ቡሪ ዲዒ ዔኬኔ፤

15 ዬያጉዲ ፔቲ ፔቲ ሞኦሢዳ ያልዚ ቡሊ ሚርጌ ማራይ፡ ዋኣሪንታ ጋኣሎንታ ዲዔኔ፤ ዬካፓ ማዒ ዬሩሳላሜ ዴንዴኔ፡፡

15

ካኦቲ ዓኣሳ ማዲ ኮሺ ባኮ

1 ዬካፓ ያኦሲኮ ዓያና ያዴዴ ናኣዚ፡ ዓዛሪያሴይዳ ኬዴኔ፤

2 ዓዛሪያሴ ዒማና ካኦቲ ዓኣሳና ካኣማኒ ሙካዖ፡- «ካኦቲዮ ዓኣሳ፡ ሂንዳ ዋይዘ! ዒንሢ ዪሁዳና ቢኢኒያሜና ዴራ ዋይዘዋቲ! ዒንሢ ያኦሲና ዓኣ ዋዶና ዒዚያ ዒንሢና ዋላ ማዓንዳኔ፤ ዒንሢ ዒዛ ኮዔቲ ዴንቃንዳኔ፤ ዒንሢ ዒዛ ሃሺቲ ጋዓንቲ ዒዚያ ዒንሢ ሃሻንዳኔ፤

3 ዒሲሪዔኤሌ ዴራ ሚርጌ ዋዴ ጎኔ ያኦሲ ባኣያ፡ ሃሣ ዔያቶ ዔርዛ ቄኤሴና ዋጌያኣ ባኣያ ማዒ ናንጌኔ፤

4 መታ ዔያቶ ሄላ ዋዶና ጋዓንቴ ናንጊና ናንጋ ጎዳ ማዔ ዒሰራዔኤሌ ያክዛሢ ባንሢ ዓኣፖ ካሮ ማሂ ዒዛ ዔያታ ኮዓዖ ዴንቄኔ፤

5 ዬኖ ዋዶና ቢያ ቤዘይዳ ዣሎና ዲቃሣ ባኣዚና ዓኣሢሮ ኮሺና ሶኦፒ ኬሰኪ ጌላይ ዓይጎ ዓሲያ ባኣሴ፤

6 ያሕሲ ዴርይዳ ዲቃተሢና መቶና ሄሊሳሢሮ ፔቴ ዓጫ ባጎ ዓጮ፥ ፔቴ ካታማ መሌ ካታሞ ያሊ ያሊ ባይዘኔ፡፡

7 ዒንሢ ጋዓንቴ ዶዱዋቴ፤ ሂርጊፖቴ፤ ዒንሢ ማዳ ኮዦ ማዶ ዘሎ ዒንሢ ዴንቃንዳኔ» ጌዔኔ፡፡

8 ዓኣሳ ያዴዳ ናኣዚ፥ ያሕሲ ማሊያ ኬኤዛ ዓዛሪያሴ ኬኤዜ ያሕሲ ማሊያ ዋይዛዛ ዒና ዒዛኮ ዶዴኔ፡፡ ዒ ዒማና ዪሁዳና ቢኢኒያመና ዓጮይዳ፥ ዬያጉዲ ሃሣ ዒዚ ያሎና ባሺ ዲዒ ዓርቁ ጌመራ ሚርጌ ዓኣ ዔፕሬኤመ ዓጮ ካታማ ዓኣ ሻኣካ ባኮ ቢያ ባይዘኔ፤ ጌኤዦ ማኣሮኮ ዲሮ ጋራ ናንጊና ናንጋ ጎዳም ዒንጎ ባኮ ሺኢሻኒ ዶቂንቴ ቤዘዋ ዓኣሴኔ፡፡

9 ናንጊና ናንጋ ጎዳ ማዔ ዒዛኮ ያክዛሢ ዓኣሳና ዋላ ዓኣሢ ዔያታ ዛጌሢሮ ዔፕሬኤመይዳ፤ ሚናኣሴና ሲሞኦኔና የፃፓ ማዔ ሚርጌ ዓሲ ዓኣሳ ባንሢ ሙኪ ዒዛ ዓጫ ናንጌኔ፤ ዓኣሳ ዬያ ዓሶ ቢያ፤ ዬያጉዲ ሃሣ ጉቤ ዪሁዳና ቢኢኒያመና ዴራ ዬሩሳላመ ሙካንዳጉዲ ዔኤሊሢ ዳኬኔ፤

10 ዬያሮ ዔያታ ዓኣሳ ካኣታዴ ታፆ ዶንጋሳ ሌዖኮ ሃይሣሳ ዓጊኖና ዬሩሳላመይዳ ቡኪንቴኔ፤

11 ዒማና ዔያታ ዔኪ ሙኬ፥ ዲያና ባካፓ ዬኖ ዓቦ ላንካይ ፄኤታ ጌማይና ላንካይ ሺያ ማራይ ያሕሲም ሚቺ ዒንጎ ዒንጊሢ ማሂ ሺኢሺኔ፤

12 ናንጊና ናንጋ ጎዳ ማዔ ዔያቶኮ ቤርታኣ ዓዶንሢ ያክዛሢ ጎኔ ዒኔና፥ ጎኔ ሺሞፓፓ ካኣሽካኒ ዋላ ጊኢጊ ጫኣቄኔ፤

13 ናንጊና ናንጋ ጎዳ ማዔ ዒሰራዔኤሌ ያክዛሢ ካኣሽኩዋይ ዓይጎ ዴጌታቴያ ጋርቺ፥ ዓቲንቄታቴያ ላኣሊ ዋዲንታንዳያ ማዔሢ ዔያታ ዋላ ጫኣቄ ጫኣቄሞና ዔርዘኔ፤

14 ዬያ ዔያታ ጫኣቄ ጫኣቄሞ ካፓንዳያ ማዒያ ዔርዘሮ ዑኡዞ ፔኤኮ ዴጊዲ ዒላሺሢና ፖርዚንታ ዛዬያኣ ዋርቄ ዋርቄ ናንጊና ናንጋ ጎዳም ጫኣቄኔ፡፡

15 ዪሁዳ ዓሳ ቢያ ዒማና ጎኔ ዒናፓ ዬያ ጫኣቄሞ ጫኣቄሢሮ ዋዛዴኔ፤ ያሕሲ ዔያታ ሚርጌና ኮዔኔ፤ ዒዚያ ዔያቶም ጴዴኔ፤ ናንጊና ናንጋ ጎዳ ዔያቶና ዋላ ማዒ ዔያቶ ዓጮኮ ቢያ ዛሎና ሂርጊሻ ባኣዚ ባኣያ ኮሺ ማሄኔ፡፡

16 ካኣቲ ዓኣሳ ዒዛኮ ዓሃ፥ ማዕካ ዓሼራ ጌይንታ ላኣሎ ያኦዘሎኮ ሻኣካ ማላቶ ድቄሢሮ ጌኤሻታፓ ዒዛ ዒ ኬይሴኔ፤ ዬያ ማላቶዋ ማንሢ ጋኣጩኔ፤ ዬያ ማቂያ ቁድሮኦኔ ዶኦጫ ሚቹኔ፤

17 ዓኣሳ ዓጮይዳ ዓኣ ሜሌ ዓሳ ካኣሽካ ቤዛ ጉቤ ባይዚባኣቶዋ ዒዛኮ ናንሳ ጋፖ ሄላንዳኣና ናንጊና ናንጋ ጎዳሞ ጉሙርቂንታያ ማዒኔ፤

18 ዒዛኮ ዓዴ፥ ዓቢያ ያኦሲም ዲማዴያ ማዓንዳጉዲ ማሄ ሚሆ ቢያ፤ ዬያጉዲ ሃሃ ዓኣሳ ፔኤሮ ናንጊና ናንጋ ጎዳሞ ዲማዴያ ማሄ ዋርቆና ቢሮናይዳፓ ኮሺንቱ ሚሆ ጉቤ ጌኤዡ ማኣሮይዳ ጌሣኔ፤

19 ዓኣሳ ካኣታዲ ዴዔ ሃይሢታሚ ዶንጋሳ ሌዖ ሄላንዳኣና ዓጩሎይዳ ያልዚ ባኣሴ።

16

ዪሁዳ ዓሶና ዒሰራዔኤሌ ዓሶና ዋሊ ያሌሢ
(1ካኣቶ. ማ 15:17-22)

1 ዓኣሳ ዪሁዳይዳ ካኣታዴንቱ ሃይሢታሚ ላሃሳ ሌዖና፥ ዒሰራዔኤሌ ካኣቲ ባዕሻ ዪሁዳ ያላኒ ኬሰከ ዪሁዳ ባንሢ ያኦኒያ ጌሉዋጉዲና ኬሰኩዋጉዲ ማሃኒ ራኣማይዳ ዋርዲሢ ዓርቄኔ፤

2 ዬያሮ ዓኣሳ ጌኤዡ ማኣሮና ካኣቱዋ ማኣሮናኮ ሚሆ ጌሃ ማኣራፓ ቢሮ ዓንጎና ዋርቆና ኬሲ ዴማሰቆይዳ ናንጋ ሶኦሪያ ካኣቲ ቤንሃዳዴም ዒንጋንዳጉዲ ዳኬኔ፤ ዬያ ዒንጎም ዳኮና ባኮና ዋላ ሂዚ ጋዓ ከኢታኣ ዓኣኔ፡-

3 «ኔ ዓዶና ታ ዓዶና ማዴ ጎይያ ኑ ዋላ ፑርቲንዲዋኣሢ ጫኣቆም፤ ሃያ ቢሮ ዓንጎና ዋርቆና ታ ኔኤም ዳኬሢ ኔኤም ዒንጎም ጌይኬ፤ ዬያሮ ዒሰራዔኤሌ ካኣቲ ባዕሻ ፔኤኮ ፖኦሊሶ ታ ዓጫፓ ኬሳንዳጉዲ ኔ ታና ማኣዳኒ ሚና ቤርታ ኔ ዒዛና ዋላ ጫኣቄ ጫኣቁዋ ሃሻንዳጉዲ ታ ኔና ሺኢቃኔ።»

4 ካኣቲ ቤንሃዳዴ ዓኣሳ ዒዛ ያኦጩ ማሊያ ኮሺኬ ጌይ ዔካዖ ያሎ ዓሶ ዓይሣዘንሢና ያሎ ዓሶና ዳከ ዒሰራዔኤሌ ካታዋ ያሊሴኔ፤ ዬያሮ ያሎ ዓሳ፡- ዓሶኔ፥ ዳኣኔንታ ዓቤልቤትማዕካ ጌይንታ ካታዋንሢና ኒፕታኣሌኤሜ ዓጮይዳ ጋሎንታ ያሎ ዓንጋዋዋ ጌሃ ካታዋ ቢያ ያሊ ባሺ ዓርቄኔ፤

5 ካኣቲ ባዕሻ ዬያ ዋይዛዖ ራኣማይዳ ዋርዲዮ ኮሺያ ዓርቄሢ ሃሼኔ፤

6 ዬካፓ ካኣቲ ዓኣሳ ዓሶ ዪሁዳይዳፓ ቢያ ቡኩሲ፥ ካኣቲ ባዕሻ ራኣማይዳ ዋርዲኒ ጊኢጊሺ ሹጮንታ ሚያንታ ቢያ ዒኣካፓ ዔከ

ሙካንዳጉዲ ዓይሄኔ፤ ዬያሮ ዓሳ ሹጮና ሚያና ቢያ ራኣማይዳፓ ዓኪ ሙኪ ጌባዕኔና ሚዲጳ ካታሞናኮ ዙሎ ዋርዴኔ።

ያኦሲ ማሊያ ኬኤዛ ሃናኒ

7 ዓማና ያኦሲ ማሊያ ኬኤዛ ሃናኒ ካኣቲ ዓኣሳ ኮይላ ሙካያ፡- «ናንገና ናንጋ ጎዳ ማዔ ኔ ያኦዛሢና ጉሙርቁንቲያ ሃሺ ሶኦሪያ ካኣቲ ኔ ጉሙርቁሢሮ ዒሰራዔኤሌኮ ያሎ ዓሳ ኔ ኩጫፓ ቶሌኔ፤

8 ዒቶጲያና ሊቢያ ዓሶናኮ ሚርጌ ያላ ዓሲንታ ሳርጌላ ያይታንታ ፓሮና ያላ ዓሲንታ ባኣዓዳ? ዓማና ኔኤኒ ያኦሲ ጉሙርቁሢሮ ያሎና ኔ ባሻንዳጉዲ ያኦሲ ኔና ማኣዴኔ።

9 ናንገና ናንጋ ጎዳ ዓጮ ጉቤ ኮሺ ዛጋያ ጉቤ ዒኔና ዒዛ ጉሙርቃዘንሢሞ ቢያ ዶዱሞ ዒንጋኔ፤ ዓካሪ ኔኤኒ ዓኤያቶ ማዶ ማዶሢሮ ሃካፓ ሴካ ያልዚ ኔኤፓ ሺኢካዓኬ» ጌዔኔ፤

10 ዬይ ጌኤዛ ዓኣሳ ኮሺ ዳጋሴሢሮ ያኦሲ ማሊያ ኬኤዛሢ ካኒ ቢራታና ቱኪ ቱኤሲ ማኣሪ ጌልዜኔ፤ ዬማ ኬላፓ ዓርቃያ ካኣቲ ዓኣሳ ዴር ባኣካፓ ፔቴ ፔቴ ዓሶ ሚጪንቱሞ ማታሲሢሢ ዓርቁኔ።

ዓኣሳ ካኣቱሞኮ ጋፒንያ

(1ካኣቶ. ማ 15:23-24)

11 ዓኣሳ ካኣታዴሢዳፓ ዴንዲ ጋፖ ሄላንዳኣና ማዲንቲ ባካ ቢያ ዪሁዳና ዒሰራዔኤሌ ካኣቶ ሃይሶ ማፃኣፖይዳ ፃኣፒንቲ ዓኣኔ፤

12 ካኣቲ ዓኣሳ ካኣታዴንቲ ሃይሢታሚ ታዘጸሶ ሌዖና ቶኪ ዒዛኮ ኮሺ ሃርጌኔ፤ ዬያይዲ ሃርጌንታያ ዴኤሻ ዔራ ዓሶይዳፓዓቲሞ ያኦሲ ዒዛ ማኣዳንዳጉዲ ዒ ኮዒባኣሴ፤

13 ዓኣሳ ካኣታዴያ ያይዲታሚ ፔታሳ ሌዖና ሃይቁኔ።

14 ዓማና ሌዛ ዒዛኮ ዶማ ሳውቃ ቲሺንታ ዴኤሻናኣ ቲሸኪንቲ ዒዚ ቤርታ ፔኤር ዳውቲ ካታማ ላሌ ዓርሲ ኮሺ ዶኡፒ ዔቴይዳ ዶኡቴኔ፤ ዒዛ ቦንቾር ዓሳ ሚርጌ ሃንዲሌ ኩሊ ታሚ ዔኤሢ ዴኤፒ ዬኤፒ ዬኤኬኔ።

17

ዒዮሳፒፄ ዪሁዳይዳ ካኣታዴሢ

1 ዒዮሳፒፄ ዓዶ፡ ዓኣሳ ቤዛ ጌሊ ካኣታዴኔ፤ ዬካፓ ዒሰራዔኤሌ ዓሶ ያላኒ ዎልቁ ዴንቁኔ፤

2 ዙላ ኬልቁ ዴርቁንቲ ዪሁዳ ካታሞና ዙላ ዙላ ዓኣ ቤዛ ቢያ፡ ዬያጉዲ ሃሣ ዒዛኮ ዓዴ ካኣቲ ዓኣሳ ያሎና ባሺ ዓርቁ ዔፕሬሴማ ዓጫ ዓኣ ካታማኣ ዓቱዋንቲ ፖኦሊሴ ዴይሄኔ፤

3 ዒዮሳፒፄ ዒዛኮ ዓዴ ፔ ካኦቱሞ ዋዶኮ ዓይያይዳ ማዴ ጎይያ ደውቱ ማዴ ኮዠ ማዴ ማዴሢሮ ሃሣ ባዓኣሌ ጌይንታ ሜሌ ያኦዞ ካኣሽኪባኣሢሮ ናንጊና ናንጋ ጎዳ ዒዛ ዓንጃኔ፤

4 ዒዮሳፒፄ ፔ ዓዶ ያኦዞሢሞ ማዴኔ፤ ዓይሢያዋ ካፔኔ፤ ዒሰራዔኤሌ ካኦታ ማዴ ጎይያ ፑርቶ ማዴ ፔቲታያ ማዴባኣሴ፤

5 ዬያሮ ናንጊና ናንጋ ጎዳ ዒዮሳፒፄኮ ካኦቱማ ደዳንዳጉዲ ማሄኔ፤ ዪሁዳ ዴራ ቢያ ደማ ደማ ዒዛሞ ዒንጎ ባኣዚ ዔኪ ሙካሢሮ ዒዚ ኮሺ ያርጎጨ ቦንቹንታያ ማዴኔ፤

6 ዒዚ ናንጊና ናንጋ ጎዳሞ ጎኔ ዒናፓ ማዴኔ፤ ዬያ ሌሊቱዋንቴ ጌሜራ ጌሜራ ዓኣ ሜሌ ዓሳ ካኣሽካ ቤዞና ዪሁዳይዳ ዓኣ ዓሺራ ጌይንታ ላኣሎ ያኦዞሎ ማላቶ ቢያ ባይዜኔ።

7 ዒዮሳፒፄ ካኦታዴንቴ ሃይሣሳ ሌዖና፡ ቤንሃይሌ፡ ያብዲዩ፡ ዛካሪያሴ፡ ናትናዔኤሌና ሚኪያሴ ጌይንታ ዒዛኮ ዶንዞ ማዴ ቢታንታ ዓኣ ዓሳ ዪሁዳ ካታሞ ዓሶ ዔርዛንዳጉዲ ዳከኔ።

8 ዬንሢና ዋላ ታዞጳ ለዊ ዓሲና ላሞዎ ቄኤሴስኬንሢያ ዓኣኔ፤ ለዊ ዓሳ፡ ሸማዒያ፡ ኔታኒያ፡ ዜባዲያ፡ ዓሳሄሌ፡ ሸሚራሞቱ፡ ዪሆናታኔ፡ ያዶኒያ፡ ያቢያንታ ያባዶኒያንታ ማዴዛ ቄኤሶንሢ ዔልሻማዔና ዪሆራሜናከ፤

9 ዔያታ ናንጊና ናንጋ ጎዳኮ ዋጎ ማፃኣፖ ዓርቂ፡ ዪሁዳ ካታሞ ቢያ ዴንዲ ዴንዲ ዴሮ ቢያ ዔርዜኔ።

ዒዮሳፒፄኮ ዴኤቸማ ዔርቱሢ

10 ዪሁዳ ዓጮኮ ኮይላ ኮይላ ዓኣ ዓጮ ካኦታ ዒዮሳፒፄ ያሉዋጉዲ ናንጊና ናንጋ ጎዳ ዔያቶይዳ ዒጊቹሞ ጌልዜኔ፤

11 ፒሊስፄኤሜ ዓሶይዳፓ ፔቲ ፔቲሢ ሚርጌ ቢራና ሜሌ ዒንጊሢያ ካኦቲ ዒዮሳፒፄሞ ዒንጋዛ ፔቲ ፔቲ ዓሬቦ ዓሳ ጊንሣ ላንካይ ሺያና ላንካይ ፄኤታ ዓዴ ማራይ፡ ሃሣ ላንካይ ሺያና ላንካይ ፄኤታ ኮላይ ዔኪ ሙከኔ።

12-13 ዬያሮ ዒዮሳፒፄ ሌዓ ሌዓ ሌካ ኮሺ ዴጊ ዴጊ ዓኣዴኔ፤ ዪሁዳ ዓጮ ጉቤይዳ ዋርዲዬ ቤሲንታ ሚርጌ ዴቢ ጋላና ያልዚ ዓንጋሞና ቡኩሲ ጌሦንዶ ካታማኣ ማዢኔ።

ዬሩሳላሜይዳ ያልዚና ደማ ዔራቶ ዓኣ ያልዚ ዓሲ ዒ ጌሣኔ፤

14 ዪሁዳ ፃጳፓ ከሶና ፖኦሊሶኮ ዓይሣሢ ዓዲና ጌይንታሢከ፤ ዒዛኮ ደማ ሃይሆ ፄኤታ ሺያ ፖኦሊሴ ዓኣኔ፤

15 ዒዛ ሄሊሳዎ ላሞዓሳ ደማሢ ዪሆሃናኔ ጌይንታሢከ፤ ዒዛኮ ደማ ላሞዎ ፄኤታና ሳሊታሚ ሺያ ፖኦሊሴ ዓኣኔ፤

16 ዪሆሃናኔ ሄሊሳዎ ሃይሣሳ ደማሢ ማዴ ያሎ ዓሶ ዓይሣሢ ዚኪሪ ናኣዚ ዓማሰያከ፤ ዒዛኮ ደማ ላሞዎ ፄኤታ ሺያ ፖኦሊሴ

ዓኣኔ፤ ዒዚ ፔኤር ናሽኪ ናንጊና ናንጋ ጎዳ ማድም ፔና ደማሴ ያልዚ ሱኡጌኬ፤

17 በኢኢያም ፃጳፓ ኬሰኬ ፖኦሊሶ ዓይሣ ሱኡጋሢ ዒሊያዳዔ ጌይንታያ ዒዛና በቃ ዓሲባኣ ዔርቱ ፖኦሊሴኬ፤ ዒዛኮ ዴማ ጌቲማና ሂኢሺና ዓርቁ ላምያ ፄኤታ ሺያ ፖኦሊሴ ዓኣኔ፤

18 ዒዛ ሂሊሳያ ዒዛኮ ዴማ ላምዓሳያ ማዓሢ ዬሆዛባዴ ጌይንታ ያሎ ዓሶ ዓይሣሢኬ፤ ዒዛ ዴማ ያልዚም ጌኢጌያ ፔቱ ፄኤታና ሳሊታሚ ሺያ ፖኦሊሴ ዓኣኔ፤

19 ዬንሢ ፖኦሊሳ ቢያ ካኣቲ ዒዮሳፒፄም ዬሩሳላሚይዳ ማዳያ ማዓዛ፤ ካኣቲ ቃሲ ሃሣሜሌ ዙላ ኬልቂ ዲርቂንቱ ካታማይዳ ዴማ ፖኦሊሴያኣ ጌሢኔ።

18

ያኦሲ ማሊያ ኬኤዛ ሚኪያሴ ካኣቲ ዓክዓቤም ኬኤዜ ባኮ
(1ካኣቶ. ማ 22:1-28)

1 ዪሁዳ ካኣቲ ዒዮሳፒፄ ቆሎና ያርጎጪ ዔርቱያ ማዔ ዎድና ዒዛና ዒሰራዔኤሌ ካኣቲ ዓክዓቤ ማእሮ ዓሶና ዎላ ዔፒና ዒጊንቱ።

2 ዳካ ሌዔኮ ጊንፃፓ ዒዮሳፒፄ ዓክዓቤ ማእሪ ሳማሪያ ካታሞ ሸኦቹሞ ዴንዴኔ፤ ዒማና ዓክዓቤ ዒዮሳፒፄንታ ዒዛና ዎላ ዓኣ ዓሶንታ ቦንቹ ሚርጌ ማራይና ባይና ሹኪ ዴኤፒ ሙኡዚ ጌኢጊሼኔ፤ ዬካፓ ዓክዓቤ ጌሌዓዴይዳ ዓኣ ራሞቱ ካታሞ ዒዛና ዎላ ያላንዳጉዲ ዒዮሳፒፄ ሺኢቃያ፡-

3 «ራሞቱ ኔ ታኣና ዎላ ዴንዲ ያልቱቲራ» ጌይ ያኦጩኔ።

ዒዮሳፒፄ ማሃያ፡- «ኔኤኒ ጌዔያታቱ ታናኣ ማያም ታ ያሎ ዓሳ ጌኢጌያኬ፤ ኔና ማኣዳኒ ኑ ያላንዳኔ፤

4 ጋዓንቱ ናንጊና ናንጋ ጎዳ ዎዚ ጋዓቲያ ኑ ያኦጩም» ጌዔኔ።

5 ዬያር ዓክዓቤ ፓይዳ ያይዶ ፄኤታ ማዔ፡ ዒዛም ሎንሣ ኬኤዛ ዓሶ ዔኤሊ፡- «ታኣኒ ራሞቱ ዴንዲ ያሎንዶሞ፡ ሃሽንዶይ?» ጌይ ያኦጩኔ።

ዒያታኣ፡- «ዴንዲ ያሌ፡ ያኦሲ ኔና ባሺሲሳንዳኔ» ጌዔኔ።

6 ዒዮሳፒፄ ጋዓንቱ፡- «ዒዛ ዛሎና ናንጊና ናንጋ ጎዳ ዎዚ ጋዓቲያ ኑ ያኦጩንዳ፡ ያኦሲ ማሊሢ ኬኤዛ ዓሲ ሜሌ ባኣዓዳ?» ጌዒ ያኦጩኔ፤

7 ዓክዓቤ ማሃያ፡- «ዪምላ ጎያሢ ናይ ሚኪያሴ ጌይንታያ ያኦሲ ማሊሢ ኬኤዛሰኬይ ዓኣኔ፤ ጋዓንቱ ታ ዒዛ ናሽኩዋሴ፤ ዓይጎር

ጌዔቴ ዒዚ ቢያ ዎዴ ታ ዛላ ፑርታ ሎንሦ ኬኤዛፓዓቴሞ ኮሺ ኬኤዛኒ ኮዑዋሴ» ጌዔኔ።

ዒዮሳፒዌ፡- «ኔ ዬያ ጌይፖ!» ጌዔኔ።

8 ዬካፓ ካኣቲ ዓክዓቤ ዒዛኮ ዶንዞ ማዔ ቢታንታ ዓኣ ዓሶይዳፓ ፔቴያ ዔኤላዎ፡- «ሚኪያሴ ኮይ ዴንቂ፥ ዑኬ ሙኡሴ» ጌይ ዓይሣኔ።

9 ዒማና ላምዎ ካኣታ ካኣቱሞ ዓፒሎ ማይንቲ ሳማሪያ ጌሎ ካሮኮ ዙሎ ዛላ ዓኣ ሃኣኮ ሺርኮ ቆይዳ ፔኤኮ ካኣቱሞ ያይታ ያይታ ዴዔኔ፤ ዒያቶሞ ያሕሲ ማሊያ ኬኤዛ ዓሳኣ ቢያ ዒያቶኮ ቤርታ ማዒ ሎንሦ ኬኤዛኔ፤

10 ዒያቶይዳፓ ፔቴ፥ ኬናዒና ናኣዚ ሴዴቂያሴ ዓንገ ጉራኒ ኮሺ ዓክዓቤሞ፡- «ናንገና ናንጋ ጎዳ ሃንሣ ጉራኖንሣና ሶኦሪያ ዓሶ ያሊ ጉቤ ኔ ባሻንዳኔ» ጋዓኔ» ጌዔኔ።

11 ሃንጎ ያሕሲ ማሊያ ኬኤዛ ዓሳ ዒ ጌዔ ጎይዎማ፡- «ራሞቴ ዴንዲ ያሌ፤ ኔኤኒ ባሻንዳኔ፤ ናንገና ናንጋ ጎዳ ኔና ባሺሳንዳኔ» ጌዔኔ።

12 ሚኪያሴ ዔኤላኒ ዴንዴ ከኢቶ ዓሣ ዒማና ሚኪያሴሞ፡- «ሃንጎ ያሕሲ ማሊያ ኬኤዛ ዓሳ ቢያ ካኣቲ ዓክዓቤ ያሎና ባሻንዳሣ ዒርዛ ሎንሦ ኬኤዜኔ፤ ዬያሮ ኔኤኒ ዒማጉዲ ኬኤዜቴ ኔኤሞ ኮሺኬ» ጌዔኔ።

13 ሚኪያሴ ጋዓንቲ፡- «ናንገና ናንጋ ጎዳ ሃይቆ! ያሕሲ ታኣሞ ፔጋሲ ኬኤዛ ቃኣላ ሌሊ ታ ኬኤዛንዳኔ» ጌዔኔ።

14 ዬካፓ ሚኪያሴ ካኣቲ፥ ዓክዓቤ ቤርቶ ሺኢካዛ ካኣቲ፡- «ሚኪያሴ! ካኣቲ ዒዮሳፒዌና ታኣና ዴንዲ ራሞቴ ያሎንዶሞ ሃሾንዶ?» ጌዒ ያኦጩኔ።

ሚኪያሴ ማሃዎ፡- «ያሌ! ጎኔ ኔኤኒ ባሻንዳኔ፤ ያሕሲ ኔና ባሺሳንዳኔ» ጌዔኔ።

15 ዓክዓቤ ዒማና፡- «ኔኤኒ ታኣሞ ናንገና ናንጋ ጎዳ ሱንዖና ያሕሲ ማሊሣ ኬኤዛኣና ጎኔ ማዓንዳማ ኬኤዜቴራ!» ሂዚ ጌዒ ታ ኔኤሞ ዋኣዴ ማይንቲ ኬኤዛይ?» ጌዔኔ።

16 ሚኪያሴ ማሃዎ፡- «ዒሰራዔኤሌኮ ያሎ ዓሳ ጉቤ ሄንቃ ዓሲባኣ ማራይጉዲ ጌማርይዳ ዜርቂንቲ ዓኣንቲ ታ ዘጋኔ፤ ናንገና ናንጋ ጎዳ፥ ሃያ ዓሶኮ ሱኡጌ ባኣሴ፤ ዬያሮ ፔ ማኣሪ ማኣሪ ኮሺ ማዒ ዴንዶንጎ» ጌዔኔ» ጌኤኔ።

17 ዓክዓቤ ዒዮሳፒፄ ኮይላ፡- «ዒዚ ቢያ ዎዴ ታ ዛላ ፑርታፓዓቴም ኮሺ ባኣዚ ኬኤዚ ቤቂባኣሴ ታ ኔኤም ጌይባይ?» ጌዔኔ።

18 ሚኪያሴ ዒ ኬኤዛ ያሕሲ ማሊያ ኬኤዛዎ፡- «ዓካሪ ናንጊና ናንጋ ጎዳ ጋዓሢ ዋይዜ! ናንጊና ናንጋ ጎዳ ጫሪንጫ ፔኤኮ ካኦቴሞ ያይቶይዳ ዴዒ ኪኢታንቻ ቢያሢ ዒዛኮ ሚዛቆና ሻውሎናይዳ ዔቂ ዓኣንቲ ታ ዛጌኔ፤

19 ናንጊና ናንጋ ጎዳ፡ <ዓክዓቤ ራሞቴ ዓኣዲ ዒኣካ ሃይቃንዳጉዲ ዴንዲ ዳቢሻኒ ዳንዳዓንዳይ ያናዳይ?> ጌይ ያኦጫዛ፤ ኪኢታንቻ ባኣካፓ ፔቴይ ፔቴ ባኣዚ፤ ባጋሢ ሃሣ ሜሌ ባኣዚ ፔጋሲ ኬኤዛያ ማዒ ዴማ ዴማ ባኣዚ ኬኤዜኔ፤

20 ጋፒንያይዳ ፔቴ ኪኢታንቻሰኬይ ናንጊና ናንጋ ጎዳ ቤርቶ ሸኢካዎ፡- «ታ ዒዛ ዳቢሻኒ ዳንዳዓንዳይ» ጋዓዛ፤ ናንጊና ናንጋ ጎዳ ማሃዎ፡ «ዎዲ ኔ ዒዛ ዳቢሻኒ ዳንዳዓንዳይ?» ጌዔኔ፤

21 ኪኢታንቻሢ ዒማና፡- «ታ ዴንዲጋፓ ዓክዓቤም ያሕሲ ማሊያ ኬኤዛ ዓሶ ቢያ ሉኡቂሳንዳኔ» ጌዔኔ፤ ናንጊና ናንጋ ጎዳ ዒዛም፡- «ሂዴቶ ዴንዲ ዒዛ ዳቢሸ፤ ኔኤም ጊኢጋንዳኔ» » ጌዔኔ።

22 ዬካፓ ሚኪያሴ፡- «ዓካሪ ኔኤም ማሊንቲ ባካ ያዲኬ! ሃኣታ ኔኤም ያሕሲ ማሊያ ኬኤዛ ዓሳ ሉኡቂ ኬኤዛንዳጉዲ ማዴሢ ናንጊና ናንጋ ጎዳኬ፤ ዬያሮ ናንጊና ናንጋ ጎዳ ኔ ዑፃ ሜቶ ዔኪ ሙካኒ ፔኤሮ ማሌኔ» ጌዔኔ።

23 ዒማና ኬናዒና ናኣዚ፤ ሴዴቂያሴ ሚኪያሴ ባንሢ ደጫዎ ባዒጋፓ፡- «ዔኤካ! ያሕሲ ዓያና ታ ኮርሳ ዴንዲ ዎይማና ኔኤም ኬኤዜይ?» ጌዔኔ።

24 ሚኪያሴ ዒዛም፡- «ኔኤኒ ኮጮኮ ዙሌና ዓኣ ቆልዎ ጋሮ ዴንዲ ፑኔ ኬሎና ዬያ ኔ ዔራንዳኔ» ጌዔኔ።

25 ዒማና ካኣቲ ዓክዓቤ ዒዛኮ ያሎ ዓሶ ዓይሣሢኮ ፔቴሢ፡- «ሚኪያሴ ዓርቂ ካታሞ ዎይሣ ዓሞኦኔና ካኣቲ ናኣዚ ዮዓሼና ኮይላ ዔኪ ዴንዴ!

26 ታኣኒ ያላፓ ኮሺና ዬዓንዳያ ሄላንዳኣና ቱኡዞ ማኣሮ ጌልዚ፤ ዒዛም ሜልዚ ካሣና ዋኣሢና ሌሊ ዒንጊ ዒንጊ ዴሣንዳጉዲ ታኣኒ ዓይሣኔ ጌዒ ዔያቶም ኬኤዜ» ጌይ ዓይሣኔ።

27 ሚኪያሴ፡- «ኔኤኒ ያላፓ ኮሺና ማዔያታቴ ናንጊና ናንጋ ጎዳ ታ ዛሎና ኬኤዚባኣሴ ጌይሢኬ!» ጌዔኔ። ሃሣ ጊንሣ ዑኡዞ ፔኤኮ ዴጊዲ፡- «ሃይካ ዓኣ ዴራ ቢያ ታ ኬኤዜ ባኮ ቢያ ዒና ዔኪ ዎይዙዋቴ!» ጌዔኔ።

ዓክዓቤኮ ሃይሶ

(1ካኦቶ. ማ 22:29-35)

28 ዬካፓ ዒሰራዔኤሌ ካኦቲ ዓክዓቤና ዪሁዳ ካኦቲ ዒዮሳፒፍና ጌሊዓዴ ዓጮይዳ ዓኣ ራሞቲ ያላኒ ዴንዴኔ፤

29 ዓክዓቤ ዒዮሳፒፍ ኮይላ፡- «የሎሮ ኑ ዴንዳኣና ታኣኒ ዲማ ዓሲ ማላኒ ሜሌ ማኣዖ ማይንታንዳኔ፤ ኔኤኒ ጋዓንቴ ኔኤኮ ካኦቲሞ ማኣዓሢ ማይንቴ» ጌዔኔ፤ ዬያይዲ ዒሰራዔኤሌ ካኦቲ ዓክዓቤ ሜሌ ማኣዖ ማይንቲ ፔኑሞ ዓኣቲ የሎሮ ዴንዴኔ፡፡

30 ዒማና ሶኦሪያ ካኦቲ፡- «ዒሰራዔኤሌ ካኦቲ፡ ዓክዓቤ ዛጊ ዲማሲ ዴኩዋቲ፤ ሜሌ ዓይጎ ዓሲያኣ ዴኪፖቲ» ጌዒ ሳርጌሎ ያይቶ ዒሻ ዓሶ ዓይሣ ዓሶሞ ኬኤዜኔ፡፡

31 ዬያሮ ካኦቲ ዒዮሳፒፍ ዔያታ ዴንቃዖ ዔያቶሞ ዒሰራዔኤሌ ካኦቲ ማሌሣሮ ዒዛ ዴካኒ ማንጌኔ፤ ጋዓንቴ ዒዮሳፒፍ ዒላቲኔ፤ ናንጊና ናንጋ ጎዳ ማዔ ያኦዛሢ ዔያቶ ኩጫፓ ዓይሲ ዒዛ ዳቂሾኔ፤ ዬያሮ ዔያታ ዒዛ ዴኩሞዖ ሃሺኔ፡፡

32 ሳርጌሎ ያይቶ ዒሻ ዓሶ ዓይሣዘንሢ ዒዮሳፒፍ ዒሰራዔኤሌ ካኦቲቱዋኣሢ ዔራዖ ዒዛ ዳውሲያ ሃሺኔ፤

33 ዒማና ፔቲ ሶኦሪያ ፖኦሊሴስኬይ ማሊባኣዖ ሂኢዦና ዴካዛ የሎሮ ማኣዖና ዓንጎኮ ካኦማ ካሮና ጌሊ ዓክዓቤ ዓይዴኔ፤ ዬያሮ ካኦቲ ዓክዓቤ ሳርጌሎ ያይቶ ዒሻሢ ኮይላ፡- «ታ ዴኡቴኔ! ሳርጌሎ ያይቶ የሎ ቤዛፓ ማሂ ዔኪ ኬሴ!» ጌይ ዓይሣኔ፡፡

34 ያላ ዶዳዛ ካኦቲ፡ ዓክዓቤ ሶኦሪያ ዓሶኮ ሆታ ሳርጌሎ ያይቶይዳ ጌኤቂንቲ ዴዒ ዓኣዖ ዴንዲ ዓባ ጌላኣና ሃይቄኔ፡፡

19

ያኦሲ ማሊያ ኬኤዛ ዒዩ ዒዮሳፒፍ ጎሬሢ

1 ዪሁዳ ካኦቲ፡ ዒዮሳፒፍ ዬሩሳላሚይዳ ዓኣ ካኦቲሞ ማኣሮ ኮሺና ማዒ ሙኬኔ፤

2 ዒማና ሃናኒ ናኣዚ፡ ዒዩ ጎዖ ያኦሲ ማሊያ ኬኤዛሢ ካኦቲ ዒዮሳፒፍና ሙኪ ካኦማዖ፡- «ኔኤኒ ፑርቶ ዓሶ ማኣዴሢና ናንጊና ናንጋ ጎዳ ዒፃ ዓሶና ዋላ ፔቲ ማዒፃ ኔኤሞ ኮሺ ማላ? ሃይ ኔ ማዴ ፑርቶ ባካ ናንጊና ናንጋ ጎዳኮ ዳጎ ኔ ዑፃ ዔኪ ዬዔኔ፤

3 ዬይያዲ ማዔቴያ ፔቲ ፔቲ ኮሺ ባኣዚ ኔ ማዴኔ፤ ዬይ ዓይጎዳይ ጌዔቲ ዴራ ካኦሽካ፡ ዓሺራ ጌይንታ ላኦሎ ያኦኬሎ ማላሢ ቢያ ዓጫፓ ኔ ባይዜኔ፤ ያኦሲኮዋ ማሊያ ዴማሲ ዔሪ ኩንሣኒ ኔኤኒ ላቢ ማዴኔ» ጌዔኔ፡፡

ዒዮሳፒፄ ማዲ ገአጊሼ ባኮ

4 ካኣቲ ዒዮሳፒፄ ዎዚ ዬሩሳላሜይዳ ናንጋያ ማዔቲያ ዳሮ ፔኤኮ ቤርታኣ ዓደንሢኮ ጾኣዛሢ ማዔ ናንጊና ናንጋ ጎዳ ባንሢ ማሃኒ ደኣሎ ዛሎና ቤርሳቤፓ ዓርቃዖ ዴንዲ ኬዶ ዛሎኮ ጌሜራ ሚርጌ ዓኣ ዓፕሬኤሜ ዓጮ ጋፖ ሄላንዳኣና ሃንቲ ሃንቲ ቢያ ዎዴ ዳሮ ዞሪ ማሄኔ፤

5 ዒዚ ዙሎ ኬልቂ ዲርቂ ዋርዲዮና ዪሁዳ ካታሞ ቢያሢዳ ሱኡጌ ደኣራዖ፤

6 ዔያቶም፡- «ዒንሢ ዎጌ ዎጋ ዎዶና ናንጊና ናንጋ ጎዳ ዒንሢና ዎላ ማዔሢ ዔሪ ኮሺ ዛጊ ዎጉዋቲ፤ ዒንሢ ዎጋሢ ዓሲምቱዋንቲ ጾኣሲምታሢሮ፤

7 ፒዜ ዎጊሢ ሃሺሢ፡ ፔቲሢ ዛላ ማዒ ማኣዲ ጌሰቲሢ፡ ዴሜና ሚኢሼ ዔከሢ ናንጊና ናንጋ ጎዳ ማዔ ኦ ጾኣዛሢ ኮይላ ዬይ ማዕቀያታሢሮ ናንጊና ናንጋ ጎዳ ዒጊጪ ፒዜ ዎጌ ዎጉዋቲ» ጌይ ዓይሢ፡፡

8 ናንጊና ናንጋ ጎዳኮ ዎጎ ዑሣ ዓኣዲያኮ፡ ጊንሣ ሃሣ ካታማ ናንጋ ዓሶ ባኣካ ማዢንታ ዎጌና ጌሰቲንታንዳ ጌኤሲ ቢያ ሱኡጌ ማዒ ጌሰታንዳጉዲ ሌዊ ዓሶንታ ቄኤሶንታ ዓጮ ጨማፓኣ ፔቲ ፔቲ ዔርቲያ ማዔ ዓሶ ዬሩሳላሜይዳ ካኣቲ ዒዮሳፒፄ ደኣሬኔ፤ ዔያታ ዬሩሳላሜይዳ ዴዔኔ፡፡

9 ዬካፓ ዒዚ ዔያቶም ሂዚ ጌዒ ዓይሢ፡- «ናንጊና ናንጋ ጎዳ ዒጊጪ ዒዛም ጉሙርቂንታያ ማዒ ፒዜ ዒኔና ማዶ ማዶዋቲ፤

10 ዒንሢ ዓጮይዳ ዓኣ ዒንሢ ዓሶ ማዔ ዒጊኖ ቢያ ዎኖ ካታማፓኣ ማምዎ ዓሲ ዎዲ፡ ዎጌ ዓይሡዋ ባኣዚ ማዲ፡ ዓይሢንቲ ዎጎ ማዲ ኩንሡዋዎ ሃሺሢና ዓርቂንቲ ዒንሢ ኮይላ ሺኢኬቲ ጎሜ ማዲ ዔያታ ናንጊና ናንጋ ጎዳ ጾዩሱዋጉዲ፡ ናንጊና ናንጋ ጎዳኮ ጎሪንታኣ ዒንሢንታ ዒንሢ ጌርሲንሢንታይዳ ሙኩዋጉዲ ላቲ ዔያቶም ኬኤዙዋቲ፤ ዬያ ዒንሢ ማዶቲ ዳቢንቲ ዒንሢኮ ማዓባኬ፡፡

11 ጾኣሲ ባኣዚ ዛላ ቢያ ዎጋኒ ቢታንታ ዓኣሢ ቄኤሶ ቢያኮ ዑፃሢ፡ ዓማሪያኬ፤ ዓጮ ካኣቶ ዛላ ባኣዚ ቢያ ዎጋኒ ቢታንታ ዓኣሢ ዪሁዳ ዓጮ ዎይሣ፡ ዒሰማዔኤሌ ናኣዚ፡ ዜባዲያኬ፤ ሌዊ ዓሶ ዒንሢ ባኣካ ቢታንቶ ዓኣ ዓሲ ማዒ ማዶንዳኔ፤ ዒጊጪኬዎ ጫርቂ ማዶዋቲ! ናንጊና ናንጋ ጎዳ ኮሺ ማዶ ማዶ ዓሶና ዎላ ማምንጎ!»

1 ዩካፓ ዓሞኦኔና ሞዓኦቤናኮ ያሎ ዓሳ ዔያቶና ዋላ ያልዚ ያላኒ ጫክቄ፥ ዔያቶኮ ላኅ ሜዑና ዓሶና ዋላ ዒዮሳፒፃ ዓጮ ዪሁዳ ያላኒ ሙኬኔ፤

2 ዒማና ዓሲ ሙኪ ካኣቲ፥ ዒዮሳፒፃም፡- «ኔናገታ ኔ ዓጮገታ ያላኒ ኮሺ ዲቢ ያልዚ ዓሲ ሶኦጎ ባዘኮ ሶንጌኖ ሱካ ዓኣ ዔዶኦሚይዳፓ ሙኬኔ፤ ሃይሾ ዔያታ ሙኪ ሃፄያገታማሬ ሄሌኔ» ጌዒ ኬኤዜኔ፤ [ሃፄያገታማሬኮ ባጎ ሱንፃ ዔንጌዲ ጌይገታኔ፤]

3 ዬያሮ ዒዮሳፒፃ ሚርጌና ዒጊጮሢሮ ናንጊና ናንጋ ጎዳ ፔ ማለዖ ፔጋሲ ዔርዛገዳጉዲ ሸኢቄኔ፤ ዩካፓ ዓጮይዳ ዓኣ ዴራ ቢያ ሙኤዚ ሃሻንዳጉዲ ዓይሢኔ፤

4 ዒማና ዪሁዳ ካታሞ ቢያሢዳፓ ናንጊና ናንጋ ጎዳ ዔያቶ ማኣዳገዳጉዲ ያኦጫኒ ዴራ ዑካዲ ዬሩሳላሚ ሙኬኔ፡፡

5 ዔያታ ሙካዖ ዬሩሳላሚይዳ ናንጋ ዓሶና ዋላ ፔቴይዳ ጌኤዢ ማኣሮኮ ዓኪ ጊኢጊሾና ዓሳ ቡካ ቤዞይዳ ቡኬኔ፤ ዒማና ካኣቲ ዒዮሳፒፃ ሙኪ ዴሮ ቤርታ ዔቄ፥

6 ዑኡዞ ፔኤኮ ዴጊዲ፡- «ኦኡኮ ቤርታኣ ዓዶንሢ ያኦዛሢ ማዔ ናንጊና ናንጋ ጎዳሢዮ! ጫሪንጫ ዓኣዖ ዓጮ ካኣቶ ቢያ ወይሣሢ ኔናኬ፤ ዋልቄና ቢታንቶና ቢያ ኔ ኩጫኬ፤ ኔና ቃዛኒ ዳንዳዓይ ያኦኒያ ባኣሴ፤

7 ኔ ኦኡኮ ያኦሲኬ፤ ኔኤኮ ዴራ፥ ዒሰራዔኤሌ ዓሳ ሃያ ዓጮ ጌሌ ወዶና ቤርታ ሃይካ ናንጋ ሜሌ ዴሮ ኬሲ፥ ኔ ላጋሢ ዓብራሃሜ ዜርዖም ናንጊና ዔያቶ ዓጪ ማሂ ዒንጌሢ ኔናኬ፤

8 ኔኤኮ ዴራ ሃኖ ዓጮይዳ ሃኖ ሄላንዳኣና ናንጌኔ፤ ሃሣ ኔ ቦንቾም ጌኤሺ ማኣሪያ ማጌኔ፤ ዬያ ዔያታ ማዴሢ፡-

9 ኦና ኔ ሜታሳኒ ያልዚ፥ ዲማ ዲማ ፑርታ ዶርዖታቴያ ናይዚ፤ ዬያጉዴ ሜቶ ኦ ጊዳ ኔ ዔኪ ዬዔቴ ኔ ሱንፃ ካኣሽኪገታ፥ ሃኖ ጌኤዢ ማኣሮ ቤርታ ኦ ሙኪ ዔቄ ኦ ሜታሢዳፓ ኦና ኔ ዓውሳንዳጉዲ ኔና ኦ ሸኢቃንዳኔ፤ ኔኤኒያ ኦኡኮ ሸኢጲዖ ወይዚ ኦና ዓውሳንዳኦ ጌዒኬ፡፡

10 «ሃይሾ ሃሢ ዓሞኦኔገታ ሞዓኦቤገታ ዔዶኦሚገታ ዴራ ኦና ያሌኔ፤ ኦኡኮ ቤርታኣ ዓዶንሢ ጊብፄ ዓጫፓ ኬሰኬ ወዶና ዬያቶ ዴሮ ዓጮ ጌላንዳጉዲ ኔ ኮዒባኣሴ፤ ኦ ዓዶንሢ ዔያቶ ዓጮ ሸሪ ኮርሳ ዓኣዴያፓዓቴም ዔያቶ ያለ ባይዚባኣሴ፤

11 ኦ ዔያቶም ማዴ ኮዢ ማዴ ዛሎ ዔያታ ኦም ዒንጋሢ ሃያኬ፤ ኔ ኦ ዓጪ ማሂ ዒንጌ ሳዓፓ ዳውሲ ኦና ዔያታ ኬሳኒ ሙኬኔ፤

12 ኦ ያኦዛሢዮ! ኦና ያላኒ ሙኬ ሃያ ዲቦ ያሎ ዓሶ ቢያ ቃዛኒ ኦ ዳንዳዐቀኣሢሮ ኔኤኒ ዔያቶ ፑርታና ወጌ፤ ኦኡኒ ኔ

ኑና ማኣዳንዳጉዲ ኔ ባንሢ ዛጊጥ ዓታዛ ዓይጎዎ ኑ ማዳኒ ዳንዳዑዋሴ» ጌዔኔ።

13 ዒማና ዪሁዳ ዓሳ ቢያ ፔኤኮ ናኣቶንታ ላኣሎንታ ዋላ ጌኤኩ ማኣሮኮ ቤርታ ዔቂ ዓኣኔ፤

14 ናንጊና ናንጋ ጎዳኮ ዓያና ዴሮና ዋላ ዓኣ ፔቲ ሌዊ ዓሲስኬያ ዑፃ ኬዴኔ፤ ዬይ ሌዊ ዓሢ ያሃዚ ዔኤሌ ጌይንታያ ዛካሪያሴ ናይኬ፤ ዒዚ ዓሳኣፔ ቶኦኪ ማዓዛ ማታኒያና ዪዒዔኤሌና ቤናያ ዛሎና፡ ሃሣ ጊንሣ ዒ ዓሳኣፔ ዜርሢኬ፤

15 ያሃዚ ዔኤሌ፡- «ካኣቲዮ! ዒንሢ ሃይ ዪሁዳንታ ዬሩሳላሜንታ ዴራ ቢያ ዋይዙዋቲ፤ ናንጊና ናንጋ ጎዳ ሂዚ ጋዓኔ፤ ሃጊ ማዓ ዋዛ ቲቂፖቲ፤ ሃያ ዲቦ ያሎ ዓሶ ያላኒ ዒጊጨፖቲ፤ ያሎ ያኦሲ ያላንዳኔ፤ ዒንሢ ያላዓኬ፤

16 ዬያሮ ዚሮ ዔያታ ዓፄ ኮይሌና ዋላ ካኣሚ ዴንዳ ካሮ ሙካኣና ዔያቶ ያሉዋቲ፤ ዪሩዔኤሌ ኮይላ ዓኣ ዓሲ ናንጉዋ ዳውሎ ዓጮ ዔኪ ዴንዳ ዶኦጮኮ ጋፖይዳ ዒንሢ ዔያቶ ዴንቃንዳኔ።

17 ዬያ ያሎ ያላንዳሢ ዒንሢቲዋሴ፤ ቤሲ ሌሊ ዓርቂጋፓ ካፑዋቲ፤ ናንጊና ናንጋ ጎዳ ዒንሢ ባሺሳንቲ ዒንሢ ዛጋንዳኔ፤ ዪሁዳና ዬሩሳላሜ ዓሲዮቲ፤ ዓልቱዋያ ሃሣ ዒጊጨዋያ ዚሮ ዴንዳ ያያሉዋቲ፤ ናንጊና ናንጋ ጎዳ ዒንሢና ዋላ ማዓንዳኔ!» ጌዔኔ።

18 ዬካፓ ካኣቲ ዒዮሳፒፄና ዒዛና ዋላ ዓኣ ዪሁዳና ዬሩሳላሜናይዳ ናንጋ ዓሳ ቢያ ባሊቶ ሳያ ሄሊሲ ናንጊና ናንጋ ጎዳም ዚጌኔ፤

19 ዒማና ቄዓቲና ቆራሄ ቶኦኮ ማዔ፡ ሌዊ ዓሳ ዔቂ ዑኡዘ ፔኤኮ ዴጊዲ ናንጊና ናንጋ ጎዳ ማዔ ዒሰራዔኤሌ ያኣዛሢ ጋላቲኔ።

20 ዴራ ዚሮ ጉቲሎ ጉቲ ዓማ ዔቂ ቲቆዓ ጌይንታ ቤሲስኬኖኮ ኮይላ ዓኣ ዓሲ ናንጉዋ ዳውሎ ዴንዴኔ፤ ዬያ ጎይያ ዔያታ ዓኣዲያይዳ ዓኣንቲ ዒዮሳፒፄ ዔያቶም፡- «ዒንሢ ዪሁዳና ዬሩሳላሜና ዓሳ! ናንጊና ናንጋ ጎዳ ማዔ ዒንሢኮ ያኣዛሢ ጉሙርቁዋቲ፤ ዒዚ ዒንሢም ዋልቄ ዒንጋንዳኔ፤ ዒዛ ማሊያ ኬኤዛዘንሢ ዒንሢም ኬኤዛ ባኮዋ ጉሙርቁዋቲ፤ ዒንሢም ጊኢጋንዳኔ» ጌዔኔ።

21 ካኣቲ ዒዮሳፒፄ ዴሮና ዋላ ዘርቲስካፓ ናንጊና ናንጋ ጎዳ ቦንቾም ዓይናዳ ዓሳ ዴማዴ ቦንቾ ኬሎና ማይንታ ማኣዓሢ ማይንቲ፡- «ዒዛኮ ናሹማ ናንጊና ናንጋያታሢሮ ያኦሲ ጋላቲዋቲ!» ጌዒ ዓይናዲ ዓይናዲ ያሎ ዓሶኮ ቤርታ ቤርታ ዓኣዳንዳጉዲ ዓይሢኔ።

22 ዓይናዳ ዓሳ ዓይኑም ዓርቃእና ዔያቶ ያላኒ ሙኬ ዓሶይዳ ናንጊና ናንጋ ጎዳ ዔርቲባኣ ያልዚ ቡሌም ዓሳ ባሽንቴኔ፤

23 ዒማና ዓሞኦኔ ዓሶና ሞዓኦቤ ዓሶና ዔይኦሚ ዓሶኮ ያሎ ዓሶ ያሊ ዋዲ ኩርሴኔ፤ ዩካፓ ጊንሣ ዋሊዳ ጌሊ ዋሊም ሚጨንቴዋዎ ዋሊ ዋዲ ኩርሴኔ፤

24 ዪሁዳኮ ያሎ ዓሳ ዓሲ ናንጉዋ ዳውላ ጴዳ ዴጌ ቤዘ ሙኪ ዔያቶኮ ሞርካ ዓኣ ባንዖ ዛጋንቴ ዔያቶኮ ሞርካ ቢያ ጋፒ ሌሲ ሌሊ ዓኣኔ፤ ፔቴታዎ ቶሊ ሽምፔና ዓቴ ዓሲ ባኣሴ።

25 ዩካፓ ዒዮሳፒፄና ዒዛኮ ፖኦሊሶና ሞርኮኮ ዓኣ ባኮ ቢያ ዲዒ ዔካኒ ዴንዳዮ፡- ሚርጌ ባይ፡ ጋላንታ ያልዚ ዓንጋሞንታ ማእዖንታ ሻንቸናቴ ሚርጌ ሚኢሹ ኬሳንዳ ሚሌ ባኣዚ ዲቢ ዴንቄኔ፤ ዬያ ባኮ ዔያታ ቡኩሳኒ ሃይሆ ኬሊ ጉቤ ኩርሴኔ፤ ጋዓንቴ ዔያታ ዲዔ ባካ ኮሺ ሚርጌታሢር ቢያ ዔካኒ ዳንዳዒባኣሴ፤

26 ያይዳሳ ኬሎ ሃኖ ሄላንዳኣና «ዓንጅ ዶኦቺ» ጌይንታ ቤዛ ቡኪንቴኔ፤ ናንጊና ናንጋ ጎዳ ዔያቶም ማዴ ባኮ ዛሎዋ ቢያ ዔያታ ጋላቴኔ፤ ዬና ዶኦጩላ «ዓንጅ» ጌይንቲ ዔኤሊንቴሢ ዬያርኬ።

27 ናንጊና ናንጋ ጎዳ ሞርኮ ዔያቶ ባሺሴሢር ዒዮሳፒፄ ዪሁዳንታ ዬሩሳላሚ ዓሶ ቢያ ዔኪ ዋዛና ዬሩሳላሚ ማዒ ዴንዴኔ።

28 ዔያታ ዬሩሳላሚ ሄላዎ ዛዬና ሹሉንጎና ሚርጌ ሻኩ ዴንሢ ዋርቆ ጎኦሎዋ ዋርቂ ዋርቂ ዋሊ ጊንዖ ጎዒ ጌኡኩ ማእሪ ዴንዴኔ፤

29 ናንጊና ናንጋ ጎዳ ዒሰራዔኤሌኮ ሞርኮ ዋማይዲ ያሊ ባሹቴያ ዋይዜ ካኣታ ቢያ ዒጊጨ ካራ ባይዜኔ።

30 ዬያር ዒዮሳፒፄ ዓጮ ያልዚ ባኣያ ዋይሤኔ፤ ያኦሲ ቢያ ዛሎና ያልዚፓ ዒዛ ሃውሺሴኔ።

ዒዮሳፒፄኮ ካኣቱም ጋፒንዖ (1ካኣቶ. ማ 22:41-50)

31 ዒዮሳፒፄ ዪሁዳይዳ ካኣታዴሢ ሌዓ ዒዛኮ ሃይሢታሚ ደንጎ ማዓኣናኬ፤ ዒዚ ዬሩሳላሚይዳ ናንጊ ላማታሚ ደንጎ ሌዔ ዋይሤኔ፤ ዒንዳ ዒዛኮ ዓዙባ ጌይንታያ ሺሊሂ ናይኬ፤

32 ዒዮሳፒፄ ዒዛኮ ዓዶ፡ ዓኣሳጉዲ ናንጊና ናንጋ ጎዳ ቤርታ ኮሺ ማዔ ባኣዚ ቢያ ማዴኔ፤

33 ጋዓንቴ ጌሚርይዳ ዓኣ ሚሌ ዓሳ ፔ ያኦዘ ካኣሽካ ቤዘ ባይዚባኣሴ፤ ዴሪ ዔያቶኮ ቤርታኣ ዓዶንሢ ያኦዛሢ ማዔ ናንጊና ናንጋ ጎዳ ባንሢ ጉቤ ዒናፓ ሃጊ ማዒባኣሴ።

34 ዒዮሳፒፄ ካኣታዴሰካፓ ዓርቃዖ ዴንዲ ጋፓ ሄላንዳኣና ማዴ ሚሌ ባካ ቢያ ዒሰራዔኤሌ ካኣቶ ሃይሳ ፃኣፒንቴ ዓኣ፡ ሃናኒ ናኣዚ ዒዲ ፃኣፔ ማፃኣፖይዳ ፃኣፒንቴ ዓኣኔ።

35 ካኣቲ ዒዮሳፒፄ ሚርጌ ፑርታ ማዶ ማዶ ዒሰራዔኤሌ ካኣቲ ዓካዚያሴና ዋላ ፔቱሞ ጌኤሲ ጌሰቲ ቱኬኔ፤

36 ዔያታ ላምዓሢ ዋላ ዔዲዮንጋብሪ ጌይንታ ባዞ ዓጫ ዋኣዖ ካኣሚላ ዔቃ ቤዘይዳ ዴኤፖ ባዞ ቲቂ ዴንዳንዳ ዋኣሢ ካኣሚላ ዋላ ገኢጊሽኔ፤

37 ጋዓንቲ ማሬሻይዳ ሾይንቲ፥ ዶዳዋ ናኣዚ፥ ዔሊዔዘሪ ዒዮሳፒፄም፡- «ዓካዚያሴና ዋላ ፔቱሞ ጌኤዘ ጌሰቲ ዒንሢ ቱኬሢሮ ናንጊና ናንጋ ጎዳ ኔኤኒ ማዶ ባኮ ቢያ ባይዘንዳኔ» ጌዒ ያሕሲ ማሊሢ ኬኤዘኔ፤ ጌይንቲ ጎይዖ ዔያቶኮ ዋኣዖ ካኣሚላ ቢያ ሜቄኔ፤ ፔቲታዖ ባዞ ዑፃ ሃንቲ ማዳኒ ዳንዳዒባኣሴ፡፡

21

1 ዩካፓ ዒዮሳፒፄ ሃይቂ፥ ዳውቲ ካታማ ካኣታ ዶኡታ ቤዛ ዶኡቲኔ፤ ዒዛ ቤዛ ዒዛኮ ናኣዚ ዒዮራሜ ካኣታዴኔ፡፡

ዪሁዳ ካኣቲ ዒዮራሜ
(2ካኣቶ. ማ 8:17-24)

2 ዪሁዳ ካኣቲ፥ ዒዮሳፒፄ ናኣዚ ዒዮራሜኮ ላሆ ጌርሲንሢ ዓኣኔ፤ ዩያታ፡- ዓዛሪያሴ፥ ዪሂዔኤሌ፥ ዛካሪያሴ፥ ዓዛሪያሴ፥ ሚካዔኤሌንታ ሹፓዲያንታኬ፡፡

3 ዔያቶኮ ዓዴ ዔያቶም ሚርጌ ዎርቄንታ ቢራንታ፤ ዩያጉዲ ሻንቾቲ ሚርጌ ሚኢሽ ኬሳንዳ ዲማ ዲማ ባኣዚ ዒንጌኔ፤ ሃሣ ዙላ ኬልቂ ዲርቄንቲ ዪሁዳ ካታሞ ፔቲ ፔቲሢዳ ፔቲ ናይ ሱኡጌ ማሂ ዶኦሪ ዶኦሪ ጌሢኔ፤ ዒዮራሜ ቶይዶ ናዓሢ ማዔሢሮ ዓዴ ፔ ቤዛ ዒዛ ካኣታሢ፤

4 ዒዮራሜ ፔኤኮ ካኣቱሞ ዶዲሺ ዴዔሰካፓ ዒዛኮ ጌርሲንሢ ቢያ፤ ዩያጉዲ ፔቲ ፔቲ ዒሰራዔኤሌ ዓሶ ባኣካ ቢታንታ ዓኣ ዓሲያኣ ዎዴኔ፡፡

5 ዒማና ዒዮራሜ ሃይሢታሚ ላምዖ ሌዔና ካኣታዴኔ፤ ዒዚ ዩሩሳላሜይዳ ናንጊ ሳሊ ለዔ ዎይሢኔ፤

6 ጋዓንቲ ዒ ዓክዓቤኮ ዉዱሮ ናኣቶፓ ፔቲ ዔካዖ ካኣቲ ዓክዓቤንታ ሜሌ ዒሰራዔኤሌ ካኣታ ማዳ ፑርቶ ማዶ ማዶ ናንጊና ናንጋ ጎዳኮ ዓይሢዖ ሃሺ ጎማዴኔ፤

7 ያዲ ማዔቲያ ናንጊና ናንጋ ጎዳ ዳውቲ ዘርፃ ካኣታዲ ዴዑዋጉዲ ባይዘኒ ኮዒባኣሴ፤ ናንጊና ናንጋ ጎዳ ዩያይዳሢ ቤርታ ዳውቲና ዋላ ጫኣቄሢኬ፤ ሃሣ ገንሣ ዳውቲኮ ዘርፃ ካኣታዲ

ካኦታዲ ናንጋንዲያታሢ ሃጊ ማዓንዳ ዋዛ ዳውቴም ዒንጌሢርኬ።

8 ዒዮራሜ ካኦታዲ ዓኣ ዋዶና ዒዶኦሜ ዪሁዳም ዋይዞ ዒዒ ፔኤሮ ፔና ዳንዳዒ ካኦቲ ካኦታሢ፤

9 ዬያሮ ዒዮራሜ ፔኤኮ ያሎ ዓሶ ሱኡጎና ሳርጌሎ ያይቶና ዒኪ ዴንዲ ዒዶኦሜ ዓጮ ያላኒ ዴንዲ ጌሊ ዓርቄ፤ ዒማና ዒዶኦሜኮ ያሎ ዓሳ ዒያቶ ማንጌ፤ ጋዓንቲ ዒዮራሜና ያሎ ዓሶና ዬያ ማንጌ ዓሶ ያሊ ቶሊ ኬስኪ ዴንዴ፤

10 ካኦቲ ዒዮራሜ ዒዛኮ ቤርታኣ ዓዶንሢኮ ያኣዛሢ ማዒ ናንጊና ናንጋ ጎዳ ሃሼሢሮ ዬማፓ ዓርቃዖ ዒዶኦሜ ዪሁዳ ዴማፓ ኬስኪ ፔ ካኦቲ ዶኦሚ ዴዒ፤ ዒማና ሃሣ ሊቢና ካታማኣ ዪሁዳም ዋይዞ ዒዳ፤

11 ዒዮራሜ ማዴ ባካ ዬያ ሌሊቱዋንቲ ዪሁዳ ዓጮኮ ጌሜሮይዳ ጌሜሮይዳ ሜሌ ዴራ ፔ ያኦዞ ካኦሽካ ካኦዡ ቤዞ ማዢ፤ ሃሣ ዪሁዳንታ ዬሩሳላሜንታ ዴሮ ጎሜይዳ ዒኪ ጌልዚ ናንጊና ናንጋ ጎዳ ያዴሴ።

12 ዬካፓ ያሕሲ ማሊያ ኬኤዛ ዒኤሊያሴ ሂዚ ጋዓ ከኢታ ፃኣፒ ዒዮራሜም ዳኬ፡- «ናንጊና ናንጋ ጎዳ ማዒ ኔ ዓዶ ዳውቴ ያኣዛሢ ሂዚ ጋዓ፤ ኔ ዓዴ ዒዮሳፒፃ ማዴ ጎይ፤ ጊንሣ ሃሣ ኔ ማዒ፡ ዓኣሳ ማዴ ኮዡ ማዶ ጎይ፤ ኔ ማዲባኦ፤

13 ጋዓንቲ ኔኤኒ ዒሰራዒኤሌ ካኦታ ማዴ ፑርቶ ማዶ ጎይ፤ ማዴ ዓዳ ኔ ዓዶ ዓክዓቤንታ ዒዛ ቤዛ ካኦታዴ ካኦታ ዒሰራዒኤሌ ዴራ ናንጊና ናንጋ ጎዳም ጉሙርቂንቱዋጉዲ ማዴ ጎይ፤ ቢያ ኔኤኒያ ዪሁዳንታ ዬሩሳላሜንታ ዴሮ ናንጊና ናንጋ ጎዳም ጉሙርቂንቱዋጉዲ ማሄ፤ ዬያ ሌሊቱዋንቲ ኔ ጊዳፓ ኮሺ ማዒ፡ ኔ ዓዶ ማኦራ ሾይንቲ ኔ ጌርሲንሢ ኔ ዋዴ፤

14 ናንጊና ናንጋ ጎዳ ኔኤኮ ዴር፡ ኔኤኮ ናኣቶንታ ላኣሎንታይዳ ፑርታ ሜቶ ዓጋንዳ፤ ኔኤኮ ዓኣ ባካ ቢያ ባይቃንዳ፤

15 ኔኤኒያ ኔኤኮ ሩቁንቶይዳ ጌላንዳ ፑርታ ዶርዖና ሩቁንታ ጎቺንቲ ዙላ ኬስካንዳያ ሄላንዳኣና ኬላ ኬላ ቃሲንቲ ዴንዳያና ኔ ሜታዳንዳ።»

16 ባዞ ዓጮይዳ ናንጋ ዒቶጲዮ ዓሶ ኮይላ ፒሊስጻኤሜ ዓሶንታ ዓፌቤ ዓሶንታ ናንጋ፤ ናንጊና ናንጋ ጎዳ ዬያቶ ዒዮራሜይዳ ሞርኬ ማሂ ዒቂሴ፤

17 ዬያሮ ዬና ዓሳ ዪሁዳ ዓጮ ያላኒ ሙኪ ጌሊ ዓርቃያ ካኦቱሞ ማእር ቡሬኔ፤ ዒዮራሜኮ ጋፒንሢ ዓካዚያሴ ጎያሰኬማ ሃሻያ ዒዛኮ ላኣሎንታ ዓቲንቆ ናኣቶንታ ቢያ ቱኪ ዔኪ ዴንዴኔ።

18 ዬያ ቢያ ባኮኮ ጊንፃፓ ናንጊና ናንጋ ጎዳ ፖዓኒ ዳንዳዑዋ ሩቁንቲ ዶርያ ካኣቲ፥ ዒዮራሜይዳ ዓጌኔ፤

19 ዬይ ዶርዓሢ ላምያ ሌዔ ማዓያ ዶዲ ዶዲ ዓኣዴሢሮ ሩቁንታ ዙሌም ጎቺንቲ ኬሰኬም ዒዚ ሜታሳ ሃርጌና ሃይቄኔ፤ ዒዚ ዱኡኪንታ ዓባ ዴራ ዒዛኮ ቤርታኣ ዓዶንሢም ማዲንታ ጎይያ ዒዛ ቦንቺ ሃንፂሌ ኩሊ ታሚ ዔኤሢባኣሴ።

20 ዒዮራሜኮ ሌዓ ሃይሢታሚ ላምያ ማዓኣናኬ ዒዚ ካኣታዴሢ፤ ዒዚ ዬሩሳላሜይዳ ናንጊ ሳሊ ሌዔ ወይሢኔ፤ ዒዚ ሃይቃዛ ያኣኒያ ዒዛ ዛሎ ያዪባኣሴ፤ ዓሳ ዒዛ ዳውቱ ካታማ ዱኡኬኔ፤ ጋዓንቲ ዒዚ ካኣታ ዱኡታ ቤዛ ዱኡቲባኣሴ።

22

ዪሁዳ ካኣቲ ዓካዚያሴ

(2ካኣቶ. ማ 8:25-29፤ 9:21-28)

1 ዓሬቦ ዓሶና ዔያቶና ዋላ ዓኣ ዓሳ ያሎሮ ሙካያ ጉርዶ ያሊ ዳኮ ናያ ዓካዚያሴ ጌይንታማ ሃሻያ ካኣቲ ዒዮራሜኮ ዓቲንቆ ናኣቶ ቢያ ወዴኔ፤ ዬያሮ ዬሩሳላሜ ዴራ ዓካዚያሴ ዓዶ ቤዛ ካኣታሢኔ፤

2-3 ዓካዚያሴ ሌዓ ላማታሚ ላምያ ማዓኣና ካኣታዴኔ፤ ዒዚ ዬሩሳላሜይዳ ናንጊ ፔቲ ሌዔ ወይሢኔ፤ ካኣቲ ዓክዓቤኮ ናዎ፥ ዒሰራዔኤሌ ካኣቲ ያምሪኮ ናኣዚ ናዎ ማዔ ዓታሊያ ጌይንታ ዒዛኮ ዒንዳ ፑርታ ማዶ ዒ ማዳንዳጉዲ ዙራሢሮ ዒዚ ካኣቲ ዓክዓቤ ማዳ ፑርቶ ማዶ ጎይያ ማዴኔ፤

4 ዒዛኮ ዓዴ ሃይቄሰካፓ ዓክዓቤ ማኣሪ ዓሲ ማዔ ዓሳ ዒዛ ባይሰንታ ባንሢ ዙሪያታሢሮ ዔያቶጉዲ ጎሜ ማዲ ናንጊና ናንጋ ጎዳ ዒዚ ያዪሴኔ፤

5 ዔያቶ ዘሮ ዔኪ ሶኦሪያ ካኣቲ ዓዛሄሌ ያላኒ ዒሰራዔኤሌ ካኣቲ ዒዮራሜ ዴንዳኣና ዒዚ ዋላ ያሎሮ ዴንዴኔ፤ ዒማና ያላ ጌሌዓዴይዳ ዓኣ ራሞቲ ኮይላ ያሊንቲያታሢሮ ያሎይዳ ዒዮራሜ ማኣሳኔኔ፤

6 ዬያሮ ዒዮራሜ ማይሢንታኒ ማዒ ጊንሣ ዒይዚራዔኤሌ ካታማ ዴንዴኔ፤ ዒማና ዓካዚያሴ ዒዮራሜ ያኦጫኒ ዒኣካ ዓኣዴኔ።

7 ዓካዚያሴ ዒዮራሜ ያኦጫኒ ዴንዴሢ ዬማ ዒ ዴንዴ ቤዛ ዒዛኮ ባይቆ ኬሎ ማዓንዳጉዲ ናንጊና ናንጋ ጎዳ ዒይሢሢሮኬ፤ ዓካዚያሴ ዒኣካ ዴንዲ ዓኣንቲ ኒምሺ ናኣዚ ዒዩ ሙኬሢሮ ዓካዚያሴንታ ዒዮራሜንታ ዒዛ ጎይሣ ሞኦኪ ዔካኒ ኬሰኬኔ፤ ዬይ

ዒዩ ዓክዓቤ ዜርፃ ካኣታዲ ካኣታዲ ናንጉዋጉዲ ባይዘዎ ናንጊና ናንጋ ጎዳ ዶኦሜ ዓሲኬ፤

⁸ ዒዩ ዓክዓቤ ዜርፃ ካኣቱዋይዳ ናንጊና ናንጋ ጎዳ ዓጌ ዋጎ ኩንሢይዳ ዓኣዖ ዓካዚያሴና ዋላ ሙኬ፥ ዪሁዳ ሱኡጎንታ ዓካዚያሴኮ ዒጊኖ ቢያ ዒኢካ ዴንቂ ቢያሢ ዋዴ።

⁹ ዬካፓ ዓካዚያሴ ኮዒ ዴንዴ፤ ዒዛ ዓሳ ሳማሪያይዳ ፑኒንቲ ዓኣንቲ ዴንቂ ዓርቃዖ፥ ዒዩ ኮይላ ዔኪ ሙኪ ዋዴ፤ ዔያታ ዒዛ ዱኡኩዋዖ ሃሻኒ ጌዔዖ ፔኤዎ ዳንዳዒንቲ ጎይዖ ጎዳዎ ዓይሢንቲ ማዴ፥ ዒዛኮ ማዖ፥ ካኣቲ ዒዮሳፒፄ ቦንቺ ሌዞ ዒዛኮ ዱኡኬ።

ዓካዚያሴ ማኣር ዓሶይዳ ካኣቲ ማዓኒ ዳንዳዓ ዓሲ ፔቲታዖ ዓቲባኣሴ።

ዪሁዳይዳ ካኣታዴ ዓታሊያ ጎዖዞ
(2ካኣቶ. ማ 11:1-3)

¹⁰ ካኣቲ፥ ዓካዚያሴኮ ዒንዳ ዓታሊያ ፔኤኮ ናዓ ሃይቁሢ ዋይዜሰካፓ ኔጉዋዖ ዪሁዳ ካኣቲ ማኣር ዓሳ ጉቤ ዎዲንታንዳጉዲ ዓይሢ።

¹¹ ዓካዚያሴኮ ዪሆያዳዔ ጌይንታ ቄኤሴሰኬያዎ ለዔ ዪሆሼባዖ ጌይንታ ጌርሰኬና ዓኣኔ፤ ዒዛ ዓካዚያሴኮ ዓቲንቆ ናኣቶ ባኣካፓ ፔቲ ዒዮዓሴ ጎዖሰኬማ ሱኡጋ ዎዲኒ ዑኬንቲ ዴማና ቶሊሲ ዔኪ ዒማንታ ዒማ ዲቻ ዓሶማንታ ጌኤዢ ማኣር ኮይላ ዓኣ ቆልዓይዳ ዓኣቺ፤ ዬያይዲ ዓኣቺ ዓታሊያ ዒዛ ዎዲዋንቲ ዓይሴ፤

¹² ዓታሊያ ካኣታዲ ዓኣ ዎድና ዒዮዓሴ ጌኤዢ ማኣርይዳ ላሆ ለዔ ዓኣሺንቲ ናንጌ።

23

ካኣቴሎ ዓታሊያ ዒዲ ማድና ማድ
(2ካኣቶ. ማ 11:4-16)

¹ ላንካሳ ሌዖና ቄኤሳሢ፥ ዮዳሄ ፔቲ ባኣዚ ማዲኒ ማሌ፤ ዬያር ዒዚ ያሎ ዓሶኮ ሱኡጌ ማዔ ዶንጎሰኬንሢና ዋላ ጊኢጊ ጫኣቄ፤ ዬያታ ያሎ ዓሶ ሱኡጌ፡- ዪርሃሜ ናኣዚ ዓዛሪያሴ፥ ዬሆሃናኔ ናኣዚ ዒሰማዔኤሌ፥ ያቤዴ ናኣዚ ዓዛሪያሴ፥ ዓዳያ ናኣዚ ማዕሴያንታ ዚክሪ ናኣዚ ዔልሳፓፃንታኬ፤

² ዬያታ ዶንጎፖኦሊሶ ሱኡጌ ዪሁዳ ካታዎ ቢያ ዴንዲ ሌዊ ዓሶና ዱማ ዱማ ቶኦኮኮ ሱኡጎና ቢያ ዔኪ ዬሩሳላሜ ሙኬ።

3 ዬይ ዓሳ ቢያ ፔቱሞና ጌኤዡ ማእሮይዳ ቡኪ ካኣቲ ናኣዚ ዒዮዓሴና ዋላ ማዓሲ ጊኢጊ ጫኣቄኔ፤ ዒማና ቄኤሳሢ ዮዳሄ፡- «ናገረና ናገጋ ጎዳ ዳውቲም ሕ ናኣታ ካኣታዲ ካኣታዲ ናገጋንዳኔ» ጌዒ ጫኣቄ ጎይዖና ሃሢ ካኣታዳንዳያ ኮይሳሢ ዒዮዓሴኬ፤

4 ሃሢ ኑ ማዳንዳያ ኮይሳሢ ያዲኬ፤ ቄኤሶና ሌዊ ዓሶና ሃውሾ ኬሎ ማዶ ማዳሲ ሙካዖ ሃይሆ ቤሲ ማዒ ፓቂንቶንጎ፤ ዔያቶይዳፓ ፔቲ ቤዛ ፓቆና ዓሳ ጌኤዡ ማእሪ ጌሎ ካሮ ካፖንጎ፤

5 ለመ ሃሢ ፓቆና ዓሳ ጌኤዡ ማእሮ ካፖንጎ፤ ጋፒንፃ ሃይሆሶ ፓቆና ዓሳ ማእሮ ዓይዖ ዶቆና ካሮ ጌይንታዞ ካፖንጎ፤ ዴራ ቢያ ጌኤዡ ማእሮይዳ ዓሳ ቡካ ቤዛ ቡኪንቶንጎ፤

6 ማዶ ማዳ ቄኤሶና ሌዊ ዓሶናፓ ዓቲም ሜሌ ዓይጎ ዓሲያ ጌኤዡ ማእሪ ጌላንዳያ ኮይሱዋሴ፤ ቄኤሶና ሌዊ ዓሶና ጋዓንቲ ናገረና ናገጋ ጎዳም ዴማዴያታሢሮ ጌላኒ ዳንዳዓኔ፤ ዓቲ ሃንጎ ዓሳ ጋዓንቲ ናገረና ናገጋ ጎዳኮ ዓይሢዖ ኩንሢ ጌኤዡ ማእሮኮ ዙላ ማዖንጎ፡፡

7 ሌዊ ዓሳ ፔኤኮ ጨንቾ ዓፓሮ ቱጊ ዓርቂ ካኣቲ ኮይላ ዓቂ ካኣቲ ካፖንጎ፤ ካኣቲ ዓኣዳ ቤዛ ቢያ ዋላ ዴንድንጎ፤ ጌኤዡ ማእሪ ጌላኒ ኮዓ ዓይጎ ዓሲያ ቢያ ዋዖዶንጎ» ጌዔኔ፡፡

8 ዬያሮ ሌዊ ዓሶንታ ዪሁዳ ዓሶንታ ቄኤሳሢ፡ ዮዳሄ ዓይሢ ባኮ ቢያ ኩንሢኔ፤ ዮዳሄ ዒማና ፔኤኮ ማዶ ማዲ ሃውሾ ኬሎና ጉሪ ማዔ ሌዊ ዓሶ ፔ ማእሪ ዳኪባኣሴ፤ ፖኦሊሴ ማዒ ካፓ ዓሶንታ ካፒ ፔ ኬሎ ጋፒሴዖ ዓኣ ዓሳኣ ዒኢካታሢሮ ፖኦሊሶ ዓይሢ ዓሶኮ ጊዳ ዓሲ ዓኣኔ፤

9 ዒማና ዮዳሄ ጌኤዡ ማእሮይዳ ጌሢንቲ ዓኣ ካኣቲ ዳውቲኮ ዋርዖና ገቲሞና ዔኪ ፖኦሊሶ ሱኡጎም ዒንጌኔ፤

10 ጨንቾ ዓፓሮ ቱጊ ዓርቂ ዓኣ ፖኦሊሳ ቢያ ካኣቲ ዔኤቢ ሄሉዋጉዲ ካፖም ዖኦሲም ዒንጎ ባኮ ሺኢሾ ቤዛ ዛሊና ጌኤዡ ማእሮኮ ሆታ ዋሊ ገንዖ ዔቂሴኔ፡፡

11 ዬካፓ ዒዮዓሴ ዓኣ ቤዛፓ ኬሰኪ ካኣቶኮ ቶኣካ ዓጎ ባኮ ዓገኔ፤ ዒዚ ካኣታዳዖ ዛጊ ዋይሃንዳ ዋጎ ፃኣፖና ዒዛም ዒንጌኔ፤ ዬያይዲ ቄኤሳሢ፡ ዮዳሄንታ ናኣቶንታ ዒዮዓሴ ዶኦመ ካኣታሣኔ፤ ዒማና ዴራ ዑኡዞ ዴጊዲ፡- «ካኣቲ ናገረና ካኣታዶንጎ!» ጌዒ ፔኤኮ ዋዞ ዔርዘኔ፡፡

12 ዓጋሊያ ዴራ ካኣቲም ዒላሺ ዒላሺዖና ዒላቶ ዋይዛዖ ዴራ ቡኬ፡ ጌኤዡ ማእሮ ሩኡሪና ሙኬኔ፡፡

13 ዒኢካ ዒዛ ሙኪ ሄሊ ዓኮ ካኣታሢ ዳምቦ ጎይዖና ካኣቶም ኮይሳ፡ ጌኤዡ ማእሮኮ ጌሎ ካራ ዓኣ ቱርቱር ኮይላ ዒዛኮ ኮርይዳ

ፖኦሊሶ ሱኡጎና ዘያሢ ዋርቃ ዓሶና ዔቂ ዓኣንቴ ዴንቄኔ፤ ዴራ ቢያ ዒናፓ ዋዛዲ ዒላሻኔ፤ ዘያሢ ዋርቃ ዓሶኣ ዘያሢ ዋርቃኔ፤ ጌኤዡ ማእሮይዳ ዓይናዳ ዓሶ ፔኤኮ ዓይኑሞ ዓንጎ ዋርቂ ዋርቂ ዬያ ቦንቾ ዳሞቦ ኩንሢሳኔ፤ ዬያሮ ዓታሊያ ዲቃቲ ማእዓሢ ፔኤኮ ዳርዘያ፡- «ሃይ ታና ዒዲ ማዶ ጌኔ ማዶኬ! ጌኔኬ!» ጌይ ዒላቲኔ።

14 ጌኤዡ ማእሮ ዲሮ ጋራ ዓሶ ዓታሊያ ዋዳንዳጉዲ ዮዳሄ ኮይባኣሴ፤ ዬያሮ ፖኦሊሶ ሱኡጎ ዔኤላያ፡- «ሻውሎና ሚዘቆ ዘሎናይዳ ዋሊ ጊንፆ ዔቂ ካፓ ፖኦሊሶ ባኣኪና ዔኪ ኬሱዋቲ፤ ዒዛ ዓውሳኒ ማላ ዓሲ ጴዴቲ ዋዋዲዋቲ» ጌዒ ዓይሢኔ።

15 ዔያታ ዒዛ ዲውቺዲ ዓርቂ ካኣቱሞ ማኣሪ ዔኪ ዴንዲ ዒኢካ «ፓራሢ ጌላ ካሮ» ጌይንታ ቤዘይዳ ዋዴኔ።

ዮዳሄ ጊንሣ ኮሺ ባኮ

(2ካኣቶ. ማ 11:17-20)

16 ቄኤሳሢ፡ ዮዳሄ ፔኤሮ፤ ሃሣ ጊንሣ ካኣቲ ዒዮዓሴንታ ዴሮንታ ናንጊና ናንጋ ጎዳ ዴሬ ማዔሢ ላሚ ጊንሣ ዓካሲ ጫኣቂሴኔ፤

17 ዬካፓ ቢያሢ ፔቱሞና ዴንዲ ባዓኣሌ ጌይንታ ሜሌ ፆኦዘ ካኣሽኮ ማእሮ ሻሄኔ፤ ዬያ ፆኦዘሞ ዒንጎ ባኮ ዒንጎ ቤዘንታ ፆኦዘ ማሊሲ ኮሾና ባኮዋ ቢያ ማንሢኔ፤ ማኣታኣኔ ጌይንታ ዬያ ፆኦዘኮ ቄኤሳሢያ ዒንጎ ባኮ ሺኢሾ ቤዘኮ ቤርታ ዋዴኔ።

18 ዮዳሄ ቄኤሶንታ ሌዊ ዓሶንታ ጌኤዡ ማእሮይዳ ማዶ ማዶኮ ሱኡጌ ማሄኔ፤ ዬያቶኮ ማዳ ካኣቲ፡ ዳውቲ ዔያቶ ማዶሞ ዓይሢ ባኮ ማዲሢና ሙሴ ዋጎ ጎይፆና ናንጊና ናንጋ ጎዳሞ ዒንጊንታ ባኮ ሚቺሢኬ፤ ዬያጉዲ ሃሣ ዳውቲ ዓይሢ ጎይፆና ዓይኑሞ ዓይናዲሢና ቦንቾ ኬሊ ዳሞቤ ኩንሢሳሢ ዔያቶሞ ዒንጊንቲ ማዶኬ፤

19 ዓይጎ ዓሲያ ማዎሞ ፔና ጌኤሺባኣ ዓሲ ጌኤዡ ማኣሪ ጌሉዋጉዲ ጌኤዡ ማኣሪ ጌሉ ካሮ ካሮ ካፓንዳ ዓሲ ዮዳሄ ጌሢኔ።

20 ፖኦሊሶ ሱኡጋ፡ ዔርቲ ዓጮ ጨማ፡ ካኣቲ ዒንጌ ቢታንታ ዓኣ ዓሶንታ ሃንጎ ዴራ ጉቤ ዮዳሄና ዋላ ጌኤዡ ማኣራፓ ዴንዲ ካኣቱሞ ማኣሪ ሄላንዳኣና ዓኣዴኔ፤ ዔያታ ዒማና ካኣቱሞ ማኣሪ ጌሉ ዴኤፖ ካሮና ጌሌሞ ካኣቲ ፔኤኮ ካኣቱሞ ፆይታ ዴዔኔ፤

21 ዴራ ቢያ ዴኤፒ ዋዛ ዋዛዴኔ፤ ዓታሊያ ዋዳንቴሢሮ ካታሞይዳ ሜታ ባኣያ ኮሺ ማዔኔ።

24

ዪሁዳ ካኣቲ ዒዮዓሴ
(2ካኣቶ. ማ 12:1-16)

¹ ዒዮዓሴ ለንካይ ሌዔ ማዔያ ዳካ ናይ ዓኣዖ ዪሁዳይዳ ካኣታዳኔ፤ ዒዚ ዬሩሳላሜይዳ ናንጊ ያይዲታሚ ሌዔ ወይሄኔ፤ ዒዛኮ ዒንዳ ዪሲያ ጌይንታያ ቤርሳቤ ካታማ ሾይንቲያኬ፤

² ቁኤሳሢ ዮዳሄ ሼምፔና ዓኣ ወዶና ቢያ ዒዮዓሴ ናንጊና ናንጋ ጎዳ ዋዛሳ ማዶ ማዳኔ፤

³ ካኣቲ፡ ዒዮዓሴ ዔካንዳጉዲ ላምዖ ላኣሊ ዮዳሄ ዶኦሬም ዔኪ ዬንሢ ላኣሎፓ ዓቲንቁ ናይና ዉዱሮ ናይያኣ ሾዔኔ።

⁴ ዒዮዓሴ ካኣታዳሰካፓ ዳካ ጋዓዖ ጌኤዢ ማኣሮ ዓካሲ ማዢኒ ማሌኔ፤

⁵ ዬያሮ ቁኤሶና ሌዊ ዓሶና ፔቲይዳ ዔኤላዖ፡- «ዪሁዳ ካታዋ ቢያ ዴንዲ ያኣዛሢ ማኣሮ ሌዓ ሌዓ ዓካሲ ማዢንዶያ ጊዳ ሚኢሼ ዒሰራዔኤሌ ዴሮ ቢያሢፓ ዑኩና ኬሲሱዋቲ» ጌዒ ዓይሄኔ፤ ሌዊ ዓሳ ጋዓንቲ ዬያ ቦሃዖ ማሊያ ሃሺ ናጌኔ፤

⁶ ዒማና ካኣቲ፡ ዒዮዓሴ ሌዊ ዓሶኮ ሱኡጋሢ ዮዳሄ ዔኤላዖ፡- «ናንጊና ናንጋ ጎዳ ዓይላሢ፡ ሙሴ ያኦሲ ካኣሽከንታ ዓፒሎና ማዢንቲ ማኣሮይዳ ማዳንቶ ባኮኮ ማዓንዳያ ሚኢሼ ዒሰራዔኤሌ ዴራ ጊኢራንዳጉዲ ዓይሄሢ ሌዊ ዓሳ ዪሁዳና ዬሩሳላሜ ዴሮናፓ ኬሲሲ ዔኪ ዬዓንዳጉዲ ዓይጋ ኔ ዔያቶም ኬኤዙዋዖ ሃሼይ?» ጌዔኔ።

⁷ ዬኖ ዓታሊያ ጌይንታ ፑርቶ ላኣሌሎኮ ዓሳ ጌኤዢ ማኣሮ ፑርቲሴኔ፤ ጌኤዢ ማኣራ ማዳንቶ፡ ያኦሲም ዱማዴ ሜሆዋ ዓቲዋዖ ዔኪ ባዓኣሌ ጌይንታ ያኦዞ ካኣሽከያ ማሄኔ።

⁸ ካኣቲ፡ ዒዮዓሴ፡- «ሚኢሼ ዔኮንዶ ሳኣዲኔ ኮሺ ጌኤዢ ማኣሪ ጌሎ ዲሮ ካራ ዙለና ጌሠዋቲ» ጌዒ ሌዊ ዓሶ ዓይሄኔ፤

⁹ ዬካፓ ሌዊ ዓሳ ዬሩሳላሜና ዪሁዳ ዓጮ ቢያሢዳ ናንጋ ዓሳ ቢያ ናንጊና ናንጋ ጎዳ ዓይላሢ፡ ሙሴ ዓሲ ናንጉዋ ዶዉሎይዳ ፔቲ ጌዒ ዒሰራዔኤሌ ዴሮፓ ኬሲሲ ዔካንዳጉዲ ዓይሄ ጊኢሮ ናንጊና ናንጋ ጎዳም ዔኪ ዬዓዳንዳጉዲ ዓይሥሢ ዳኬኔ፤

¹⁰ ዬይ ዓይሢዖ ዴሮና ዴሮኮ ሱኡጎና ቢያ ዋዛሴሢሮ ሚኢሼ ዔኪ ሙኪ ሳኣዲኖ ዓጊ ኩንሄኔ።

¹¹ ዬያሮ ሌዊ ዓሳ ሳኣዲኖ ዔኪ ዔኪ ካኣቲ ቢታንቶ ዒንጌ ሱኡጎም ቢያ ኬሊ ዒንጋኔ። ዬይ ሚኢሻ ሳኣዲኖ ኩማማና ኩማማና ጌኤዢ

ማእራ ፃኣፖ ባኮ ፃኣፓሢና ቄኤሶ ሱኡጋሢ ዶኦሪ ጌሄም ዋላ ማዳ ዓሢና ሚኢሾ ዔኬሰካፓ ማሂ ገንሣ ሳኣዲኖ ቤዛ ጌሣኔ፤ ዬያይዲ ዔያታ ሚርጌ ሚኢሾ ቡኩሴኔ።

12 ካኣቲና ቄኤሳሢ ዮዳሄና ሚኢሾ ዔካዖ ጌኡዠ ማእሮ ዓካሳኒ ማዠሳ ሱኡጋም ዒንጋኔ፤ ዬያታ ሱኡጋ ዬያ ሚኢሾና ጌኡዠ ማእሮ ሹጮና ኮሻ ዓሶ፡ ሚዖና ማዠሩ ኮሻ ዓሶንታ ዲማ ዲማ ዓንጎና ኮሻ ዓሶዋ ዔኪ ማዲሻኔ፤

13 ዬይ ማዳ ዓሳ ዶዲ ማዲ ጌኡዠ ማእሮ ቤርታኣሲ ጎይዖማ ገንሣ ዓካሲ ኮሼኔ።

14 ዬይ ማዳ ጋፔሰካፓ ዓቲ ሚኢሾ ካኣቲ ዒዮዓሴና ቄኤሳሢ ዮዳሄናም ዒንጌኔ፤ ዔያታ ዬያ ዓቲሢና ጌኡዠ ማእሮይዳ ማዶ ማዲንቶ ሜሆና ዒንጎ ባካ ዒንገንታንዳጉዲ ዔቶ ሳኣናንታ ዲማ ዲማ ባኣዚያኣ ሻንቄኔ።

ዮዳሄ ዔኪ ዓኣዳ ጎይዖፓ ዔባ ላኣሚንቲሢ

ዮዳሄ ሹምፔና ዓኣ ዎዶና ቢያ ኬሊ ጌኡዠ ማእሮይዳ ናንጊና ናንጋ ጎዳም ዒንጎ ባካ ዒንገንታኔ፤

15 ዮዳሄ ገዳንዳያ ሄላንዳኣና ጋርቺ ሌዓ ዒዛኮ ጃኤታና ሃይሢታሚ ማዓዛ ሃይቄኔ፤

16 ዒዚ ዒሰራዔኤሌ ዴሮም፤ ሃሣ ገንሣ ያኦሲንታ ጌኡዠ ማእሮንታም ማዴ ማዶ ዛሎሮ ዳውቲ ካታማ ዓኣ ካኣታ ዲኡታ ቤዛ ዓሳ ዒዛ ዲኡኬኔ።

17 ዮዳሄ ሃይቄሰካፓ ጋዓንቲ ዪሁዳ ዓሶ ሱኡጋ ካኣቲ፡ ዒዮዓሴ ኮይላ ሙካዖ ዳዲ ባዒ ዔያታ ኮዓ ማሊዖ ኬኤዜኔ፤ ዒዚያ ዔያቶ ሃይሶና ዋላ ገኣኔኔ፤

18 ዬያሮ ዴራ ዔያቶኮ ቤርታኣ ዓዶንሢ ያኣዛሢ ማዔ ናንጊና ናንጋ ጎዳኮ ጌኡዠ ማእሮይዳ ዚጊዖ ሃሺ ዓሹራ ጌይንታ ላኣሎ ያኣዜሎ ማሊሲ ማዠና ባኮንታ ሜሌ ያኣዞማኣ ዚጊ ካኣሽከሢ ዓርቄኔ። ዴራ ዬያ ጎም ማዴሢሮ ያኦሲ ዪሁዳና ዬራሳላሜናይዳ ዳጋዲ ዔቄኔ።

19 ናንጊና ናንጋ ጎዳ ፔ ባንሢ ማዓንዳጉዲ ዴሮም ላቲ ኬኤዛንዳ፡ ያኦሲ ማሊሢ ኬኤዛ ዓሲ ዳኬኔ፤ ዬይ ዓሳ ኬኤዛዛ ዴራ ዔያቶሲ ዋይዚባኣሴ፤

20 ዬካፓ ያኦሲኮ ዓያና ቄኤሳሢ፡ ዮዳሄ ናኣዚ ዛካሪያሴይዳ ኬዴኔ፤ ዬያሮ ዒዚ ዴራ ዒዛ ዴንቃንዳ ዴጌ ቤሲዳ ኬሰኪ ዔቃዖ፡ «ያኦሲ ታኣኮ ዓይሢዖ ዒንሢ ዓይጎሮ ኩንሃ ሃሻይ? ዒንሢዳ ዒንሢሮ ዒንሢ ባይሲንታ ዓይጎሮ ዔኪ ሙካይ?» ጌይ ዒንሢ

ያኤጫኔ፤ ዓካሪ ሃሢ ሲንሢ ሲዛ ሃሼሢሮ ሲዚያ ሲንሢ ሃሼኔ!»
ጌዔኔ።

21 ዴራ ሲማና ዋላ ጫኣቂ ዔቂ፥ ካኣተያ ዔያቶ ዓይሣም ጌኤዢ
ማኣርይዳ ዴራ ቡካ ጳኦኮይዳ ሹቻ ዲይ ዛካሪያሴ ዋዴኔ።

22 ካኣተ፥ ሲዮዓሴ ዛካሪያሴኮ ዓዴ ዮዳሄ ሲዛም ማዴ ኮዢ ማዴ
ማሉዋዮ ዛካሪያሴ ዋዴሼኔ፤ ዛካሪያሴ ሃይቃኒ ሳዛ ጋሽኪቤቃ፡-
«ናንገና ናንጋ ጎዳ ሃያ ጌኖ ማዶ ኔኤኮ ዛጌ ኔ ጌዳ ፑርታ ማቶ
ዓጎም!» ጌዔኔ።

ሲዮዓሴኮ ካኣታቶ ጋፒንዮ

23 ዬኖ ሌዖኮ ሲላ ዓገኒ ማዓኣና ሶኦሪያ ዓጮ ዖሎ ዓሳ ዪሁዳና
ዬሩሳላሜ ዓጮና ዖሊ ሱኡጎ ቢያ ዋዴኔ፤ ዑሣ ዓኣዴ ሚርጌ ባኣዚያ
ዲዒ ዒኪ ዴማሰቆ ማዒ ዴንዴኔ፤

24 ሲማና ሶኦሪያ ዓሶኮ ዖሎ ዓሶንሢ ዳካኬ፤ ጋዓንቴ ሚርጌ ዲቢ
ማዔ ዪሁዳኮ ዖሎ ዓሶ ባሻንዳጉዲ ናንገና ናንጋ ጎዳ ዓይሣኔ፤ ዬይ
ያዲ ማዔሢ ዪሁዳ ዓሳ ዔያቶኮ ቤርታኣ ዓዶንሢ ዖኣዛሢ ማዔ
ናንገና ናንጋ ጎዳ ሃሼሢሮኬ፤ ያዲ ማዒዖና ሲዮዓሴይዳ ፒዜ ዋጌ
ዋጊንቴኔ።

25 ሲዚ ሲማና ዖሎይዳ ማኣሳኒ ኪፃዴኔ፤ ሞርኮኮ ዖሎ ዓሳ ማዒ
ዴንዳዛ ዒዛኮ ዶንዛ ማዒ ዓኣ፥ ሲዚ ቢታንቶ ሲንጌ ዓሶፓ ዛላ ዓሲ
ዋላ ጌኔ ማዳኒ ማሊ ቁኤሳሢ ዮዳሄ ናኣዚ ሱጉዖ ማሂሢሮ ሻኣላ
ላሂ ዓኣንቴ ሲዛ ዋዴኔ፤ ሲዚ ዳውቴ ካታማ ዱኡቴኔ፤ ጋዓንቴ ካኣታ
ዱኡታ ቤዛ ዱኡቲባኣሴ።

26 ዬያይዲ ጌኔ ማሊሢና ካኣቲ ዋዴ ዓሳ ሺምዓቶ ጌይንታ
ዓሞኦይይዳ ሺይንቴ ዓሲሰኬኖ ናኣዚ ዛባዴና ሺምሪቶ ጌይንታ
ሞዓኣቤይዳ ሺይንቴሰኬኖ ናኣዚ ዪሆዛባዴናኬ።

27 ሲዮዓሴ ናኣቶ ሃይሶንታ ሲዮዓሴም ኬኤዚንቴ ያሕሴ
ማሊዖንታ ሲዮዓሴ ጌኤዢ ማኣር ዋዲ ዓካሲ ማከፍቴያ ካኣቶ
ሃይሳ ፃኣፒንቲ ዓኣ ማፃኣፓ ፃኣፒንቲ ዓኣኔ፤ ሲዛ ቤዛ ሲዛኮ ናኣዚ
ዓሜሲያሴ ካኣታዴኔ።

25

ዪሁዳ ካኣቲ ዓሜሲያሴ
(2ካኣቶ. ማ 14:2-6)

1 ዓሜሲያሴኮ ሌዓ ላማታሚ ደንጎ ማዓዛ ካኣታፎኔ፤ ዒዚ ዩሩሳላሚያዳ ናንጊ ላማታሚ ታዞጳ ሌዒ ወይሄኔ፤ ዒዛኮ ዒንዳ ዪሆዓዲኖ ጌይንታያ ዩሩሳላሚያዳ ሾይንቴያኬ፤

2 ዓሜሲያሴ ናንጊና ናንጋ ጎዳ ወዛሳ ባኣዚ ማፌኔ፤ ጋዓንቴ ፔቴ ፔቴና ዒ ማዳ ባኮ ዒናፓ ማዲዋሴ፤

3 ዒዚ ካኣቱሞ ፔኤኮ ዶዲሺ ዴዔስካፓ ኔጉዋየ ዒዛኮ ዓዶ ዋዴ፥ ቢታንቶና ዓኣ ዓሶ ጉቤ ዋዴኔ፤

4 ጋዓንቴ ዬያ ዓሶኮ ናኣቶ ዋዲባኣሴ፤ ዓይጎሮ ጌዔቶ ናንጊና ናንጋ ጎዳ ሙሴ ዛሎና ዒንጌ ዋጎይዳ፡- «ሾዔ ዓሳ ናኣታ ማፌ ዳቢንቴና፤ ናኣታ ጊንሣ ሾዔ ዓሳ ማፌ ዳቢንቴና ዋዲንቶፓ። ዓሲ ዋዲንታኒ ኮይሳሢ ፔኤሮ ማፌ ዳቢንቴና ሌሊኬ» ጌይ ኬኤዜ ቃኣሎ ቦንቺኬ።

ዒዶኦሚ ዓሶ ያሎናሢ (2ካኣቶ. ማ 14:7)

5 ካኣቲ ዓሜሲያሴ ዪሁዳንታ ቢኢኒያሚንታ ፃፅ ማዔ ዓቲንቆ ቢያ ቶኦኮና ቶኦኮና ፓቂ፥ ፓቆና ዓሶሞ ሺያ ዓሲ ዓይሣያና ጄኤታ ዓሲ ዓይሣ ሱኡጌ ዶኦሪ ጌሣኔ፤ ዬያ ፓቆና ዓሶኮ ሌዓ ላማታሚና ዬያፓ ዑሣ ማዔ ዓቲንቆ ቢያ ማዓዛ ሚርጉማ ዔያቶኮ ሃይሦ ጄኤታ ሺያኬ፤ ዔያታ ያልዘሞ ጊኢጊንቴያ፥ ዋርሢና ጊቲማና ዓርቆ ጎይሢ ዔሬያ ዔርቲ ፖኦሊሴኬ፤

6 ዓሜሲያሴ ሃሣ ሃይሦ ሺያና ያይዶ ጄኤታ ኪሎ ማዓ ሹቺ ቢራና ዒሰራዔኤሌ ፃፅፓ ጄኤታ ሺያ ፖኦሊሴ ሻንቄኔ፤

7 ጋዓንቴ ፔቴ ያኦሲ ማለሢ ኬኤዛሰኬይ ዓሜሲያሴ ኮይላ ሙኪ፡- «ሃኣቶ ዒሰራዔኤሌ ፖኦሊሶ ዔኪ ያሎ ኬሰኪፖ፤ ዓይጎሮ ጌዔቴ ናንጊና ናንጋ ጎዳ ዒሰራዔኤሌ ዓሶ ማዔ ዔፕሬኤሚ ዓሶፓ ዓይጎ ዓሲናኣ ዋላቱዋሴ፤

8 ኔኤኒ ሃያ ያላ ያሎና ዒሰራዔኤሌ ፖኦሊሳ ታና ማኣዳንዳኔ ጌዒ ኔ ማላኣ ናንዳኔ፤ ጋዓንቴ ባሻያና ባሻንቴያ ኔና ማሃሢ ያኦሲ ሌሊኬ፤ ዬያሮ ሃሢ ዒዚ ኔ ሞርካ ኔና ባሻንዳጉዲ ማሃንዳኔ» ጌዔኔ።

9 ዓሜሲያሴ ያኦሲ ማለያ ኬኤዛሢ ኮይላ፡- «ቤርታዲ ታ ጨጌ ሚኢሻሾ? ዬያ ቢያ ታ ዋዋዳንዳይ?» ጌይ ያኦጩኔ።

ያኦሲ ማለያ ኬኤዛሢ፡- «ናንጊና ናንጋ ጎዳ ዬያ ሚኢሻፓ ባሻ ኔኤሞ ዒንጋኒ ዳንዳዓኔ» ጌዔኔ።

10 ዬያሮ ዓሜሲያሴ ሻንቂ ዔኮና ፖኦሊሶ ፔኤኮ ናንጋ ቤዛ ቤዛ ዓኣዳንዳጉዲ ዳኬም፥ ዔያታ ዪሁዳ ዳሮይዳ ሚርጌና ዳጋዲ ጎሪንቲ ፔኤኮ ናንጎ ቤዛ ዓኣዳኔ።

11 ዬካፓ ዓሜሲያሴ ጫርቂ ዔቂ ፔኤኮ ፖኦሊሶ ዔኪ ሶኦጌ ዶኦቹ ዴንዴኔ፤ ዒኢካ ዒዛኮ ፖኦሊሶ ዔዶኦሜ ያሎ ዓሶ ያሊ ታጾ ሺያ ፖኦሊሴ ወዴኔ፤

12 ዒማና ሜሌ ታጾ ሺያ ፖኦሊሴያኣ ዲዒ ዔኬኔ፤ ዬያቶ ቱኪ ዔኪ ሴላዔ ጌይንታ ካታሞ ኮይላ ዓኣ ማጎ ቶኦኮ ዔኪ ኬሳዖ ሂዒ ዳኬኔ፤ ቢያሢ ማጎኮ ዴማ ዓኣ ላላ ኬዲ ጳዲንቲ ሃይቂ ጋፔኔ።

13 ዓሜሲያሴ ዒዛና ዋላ ያሎ ዓኣዳንዳጉዲ ኮዒባኣ ዒሰራዔኤሌ ፖኦሊሶ ሳማሪያና ቤትሆርኔ ባኣካ ዓኣ ዪሁዳ ካታሞ ያላዖ ሃይሆ ሺያ ዓሲ ወዲ፥ ዑሣ ዓኣዴ ሚርጌ ባኣዚ ዲዒ ዔኬኔ።

14 ዓሜሲያሴ ዔዶኦሜ ዓሶ ያሎና ባሺ ማዓዖ ዔያቶኮ ካኣሽኮ ሜሌ ያኦዞ ዔኪ ሙኬኔ፤ ዬያ ካኣሽኮ ያኦዞ ማሂ ዔቂሲ ዘጊ ዬያቶ ካኣሽኬኔ፤ ዑንጂያ ጩቢሺኔ፤

15 ዬይ ባካ ናንጊና ናንጋ ጎዳ ዳጋሴም ጎዳ ፔ ማሊያ ኬኤዛ ዓሲ ዓሜሲያሴ ኮይላ ዳኬኔ፤ ዬይ ዓሢ ዓሜሲያሴ ኮራ፥ «ፔ ዓሶ ኔ ኩጫፓ ዓውሳኒ ዳንዳዒባኣ ሜሌ ያኦዞ ዓይጋ ኔ ዘጊ ካኣሽካይ?» ጌይ ያኦጩኔ።

16 ዬይ ጌኤዞ ጋፒሱዋንቲ ዓሜሲያሴ፡- «ሃሢ ካኣቲኮ ዙራ ዶንዛ ማሂ ዓይዲ ኔና ኑ ዶኦሬዖ? ዬያ ጌኤዞ ሴካ ሃሼ፤ ሃንጎ ታ ኔና ወዳንዳኔ!» ጌዔኔ።

ዬይ ያኦሲ ማሊያ ኬኤዛሢ ጌሰታ ጌኤዞ ዳካሮ ሃሼሰካፓ፡- «ሃያ ቢያ ኔ ማዴሢ፤ ሃሣ ታ ዘሮዋ ዋይዞ ኔ ዒፃሢ ያኦሲ ኔና ባይዛኒ ማላሢርታሢ ዓኣሪ ታ ዔሬኔ» ጌዔኔ።

ዒሰራዔኤሌ ዓሶ ያሎና ያልዚ

(2ካኣቶ. ማ 14:8-20)

17 ዬካፓ ካኣቲ ዓሜሲያሴና ዒዛኮ ዶንዛ ዒሰራዔኤሌ ዓሶም ጌኔ ማዶ ማዳኒ ዘርቲኔ፤ ዓሜሲያሴ ዒማና ዒዩኮ ናኣዚ ናዖ፥ ዒዩዋካኣዜ ናኣዚ ማዔ ዒሰራዔኤሌ ካኣቲ ዮዓሴም፡- «ሂንዳ ሃኒ ሙኬ ኑ ዋሊ ዛጎም!» ጌዒ ኪኢታ ዳኪ ያልዚም ዔቂሴኔ፤

18 ካኣቲ፥ ዮዓሴ ጋዓንቲ፡- «ለባኖኦሴ ዲኮይዳ ዓኣ ፔቲ ጋውዲ ዓንጊሢሰኬና ለባኖኦሴ ዚቢቆ ኮይላ፥ ታ ናዓሢም ኔኦኮ ዉዳሮ ናዔሎ ዒንጌ» ጌይ ኪኢታ ዳኬኔ፤ ጋዓንቲ ለባኖኦሴ ዲኮይዳ ዓኣ ፔቲ ቦዖ ዒኢና ዴንዲቤቃ ቶኪና ሄርቃዛ ዬና ጋውዴላ ሃይቄኔ» ጋዓኔ።

19 «ዔኤዛይ ዓሜሲያሴ! ኔኤኒ ዔዶኦሚ ዓሶ ያሎና ባሼሢሮ
የቶርቂ ሺራ? ኔ ባሼ ባሼያማና ኔ ማኣራ ኔ ዴዒ ዚቲ ጌዔቲ ቃራኬ፤
ኔናንታ ኔ ዴርንታ ባይዛንዳ ባኣዚ ዓይጋ ኔ ዓገሢ ሺራይ?» ጌዔኔ።

20 ዓሜሲያሴ ጋዓንቲ ዮዓሴ ዬያ ጌዔሢ ዔኤቢኬ ጌይባኣሴ፤
ዬይ ያዲ ማዔሢ ዓሜሲያሴ ዔዶኦሚ ዓሶ ያኦዛሢ ካኣሽኬሢሮ ዒ
ያሎና ባሼንታንዳጉዲ ያኦሲ ጌዔሢሮኬ፤

21 ዬያር ካኣቲ ዮዓሴ ፔኤኮ ፖኦሊሶ ዔኪ ዓሜሲያሴ ያላኒ
ዴንዳየ ዪሁዳይዳ ዓኣ ቤትሼሜሼ ጌይንታ ቤዛ ያሎ ዓርቄ፤

22 ዒማና ዪሁዳ ዓሳ ባሼንቲ፤ ፖኦሊሳኣ ቢያ ጳሽኪ ፔ ማኣሪ
ማኣሪ ዴንዴ።

23 ዮዓሴ ዒማና ዓካዚያሴኮ ናኣዚ ናየ፡ ዓሜሲያሴ ሸምፔና
ዓኣንቲ ዓርቄ ዔኪ ዬሩሳላሚ ሄላኒ ዴንዴ፤ ዒኣካ ሄሄላየ
ዔፕሬኤሚ ኬኤሎ ዲያ ካራፓ ዓርቃየ ዴንዲ «ዋላ ካኣማ ኬኤሎ
ዲያ ካር» ጌይንታ ቤዛ ሄላንዳኣና ያዶሱማ ያይዶ ጄኤታ ዋዳ ማዓ
ኬኤሎ ዲያ ዶይሴ።

24 ዒኣካፓ ዒ ዴንቄ ዋርቆንታ ቢርንታ ቢያ፡ ያቤድዔዶኦሚ
ዓሳ ካፓ ጌኤኮ ማኣርይዳ ካኣኮ ካኣሽኮ ባኮ ቢያሢንታ ካኣቱሞ
ማኣርይዳ ዓኣ ባኮ ቢያ ጫኣኒ ሳማሪያ ማዒ ዴንዴ፤ ዓይሢ ማሂ
ዒዚ ዲዔ ዓሶሞ ዔኪ ዓኣዴ።

25 ዒሰራዔኤሌ ካኣቲ፡ ዒዮዓካኣዜ ናኣዚ፡ ዮዓሴ ሃይቄሰካፓ
ዪሁዳ ካኣቲ ዮዓሴ ናኣዚ ዓሜሲያሴ ታጳ ዶንጎ ለዔ ዴዔ፤

26 ዓሜሲያሴ ማዴ ሜሌ ባካ ቢያ ዪሁዳ ካኣቶንታ ዒሰራዔኤሌ
ካኣቶ ሃይሳ ፃኣፒንታ ማፃኣፓ ፃኣፒንታ ዓኣ።

27 ዓሜሲያሴ ናንገና ናንጋ ጎዳሞ ዓይሢንቲያ ዒፃ ዋዳፓ ዓርቃየ
ዒዛ ዋዳኒ ዬሩሳላሚይዳ ዓሲ ዋላ ዘርቱሢሮ ዒዚ ፑኒ ላኪሼ
ካታሞ ዴንዴ፤ ዒዛኮ ሞርካ ጋዓንቲ ገንያ ዓሲ ዳኪ ዒኣካ ዒዛ
ዋዲሼ፤

28 ዬካፓ ሌዛ ዒዛኮ ፓርና ጫኣኒንቲ ዬሩሳላሚ ሙኬ፤
ጋፒንያይዳ ዳውቲ ካታማ ካኣታ ዴኡታ ቤዛ ዒ ዴኡቲ።

26

ዪሁዳ ካኣቲ ያዚያ

(2ካኣቶ. ማ 14:21-22፤ 15:1-7)

1 ዪሁዳ ዴራ ቢያሢ ታጳ ላሆ ለዔ ማዔ፡ ዓሜሲያሴ ናኣዚ፡
ያዚያ ዓዶ ቤዛ ካኣታዳንዳጉዲ ዶኦሜ።

2 [ያዚያ ዔላቲ ካታሞ ያሊ ገንሣ ማሂ ዓርቄ ዓካሲ ማዠሢ ዓዴ
ዓሜሲያሴ ሃይቄሰካፓኬ።]

3 ያዚያ ታጽ ላሆ ሌዔ ማዓኣና ካኣታዳኔ፤ ዒዚ ዩሩሳላሜይዳ ናንጊ ዶንጊታሚ ላምዖ ሌዔ ወይሄኔ፤ ዒንዳ ዒዛኮ ዪኮሊያ ጌይንታያ ዩሩሳላሜይዳ ሾይንቲያኬ።

4 ያዚያ ዒዛኮ ዓዴ ማዴ ጎይዖ ኮሺ ማዶ ማዲ ናንጊና ናንጋ ጎዳ ዋዛሴኔ፤

5 ያሕሲ ባኣዚ ዛላ ዒዛ ዘራ፥ ዛካሪያሴ ሽምፔና ዓኣ ወዶማና ያዚያ ያሕሲም ጉሙርቂንቲ ማዴኔ፤ ናንጊና ናንጋ ጎዳ ማዔ ያኣዛሢ ዒዛ ዓንጃኔ።

6 ዒማና ያዚያ ፒሊስጻኤሜ ዓሶ ያሊ ጋኣቲ፥ ያብኔንታ ዓሽዶዴ ካታሞንታኮ ኬኤሎ ዲያ ሻሄኔ፤ ዓሽዶዴ ኮይሎይዳ፥ ሃሣ ጊንሣ ፒሊስጻኤሜ ዓጮይዳ ዙላ ኬልቂንቲ ዲርቂንቲ ካታማኣ ማዢኔ።

7 ዒዚ ፒሊስጻኤሜ ዓሶንታ ጉርባዔሌይዳ ናንጋ ዓሬቦ ዓሶንታ ሜዑና ዓሶንታ ያሊ ባሻንዳጉዲ ያሕሲ ማኣዴኔ።

8 ዓሞኦኔ ዓሳኣ ዒዛም ጊኢሬኔ፤ ዒዚ ዑሣ ዓኣዴ ዋልቃዲ ዋልቃዲ ዴንዴሢር ዒዛኮ ሱንፃ ጊብፃ ዓጮ ሄላንዳኣና ዋይዚንቲኔ።

9 ያዚያ ኬኤሎ ዲያ ዋላ ካኣማ ካሮንታ ዶኤጮ ኬኤሎ ዲር ካሮንታ ኬኤሎ ዲያ ቃሳዲ ሽራሢዳ ዒኢካ ዔቂ ካፖንዶ ሹቺ ማኣሪ ማዢ ዩሩሳላሜኮ ዋርዲዮ ማዓ ኬኤሎ ዲያ ዶዲሼኔ፤

10 ዓባ ጌላ ዛሎይዳ ጌሜር ዴማ ዓኣ ቦኣሎይዳ ሚርጌ ባይ ዒዛኮ ዓኣሢር ካታሞኮ ዙላ ቦኣሎይዳ ዔቂ ካፖ ዴጌ ቤሲ ሹቺና ማዢኔ፤ ሚርጌ ቦቆሊያኣ ቦኣኬኔ፤ ዒዚ ጎሺ ጎሽከሢ ናሽካሢር ጌሜራዳ ዓጮንታ ማሊ ማዔ ዓጮንታይዳ ወይኔ ቱካ ዓሲና ጎሺ ጎሽካ ዓሲያኣ ዒዛኮ ዓኣኔ።

11 ያዚያኮ ያልዚም ጊኢጊንቲያ ዲቢ ያልዚ ዓሲ ዓኣኔ፤ ዬያ ዓሶኮ ሱንፃ ካኣቱሞ ማኣራ ፃኣፖ ባኮ ፃኣፓ ዪዒዔሌሌና ማዕሴያና ፃኣፓኔ፤ ዔያቶኮ ሱኡጋሢ ካኣቱሞ ማኣርይዳ ማዳ ዓሶ ባኣካ ዓኣ ሃናኒያኬ።

12 ዒዛኮ ያሎ ዓሶ ሱኡጋ ላምዖ ሺያና ላሆ ጻኤታ ማዓ ዲማ ዲማ ቶኣኮኮ ሱኡጌ ማዔያኬ፤

13 ዬያቶኮ ዴማ ካኣቲኮ ሞርኮ ያሊ ቃዛኒ ጊዳ ዔራቶ ዓኣ ሃይሦ ጻኤታና ላንካይ ሺያና ዶንጎ ጻኤታ ዔርቲ ፖኦሊሴ ዓኣኔ፤

14 ያዚያ ዒዛኮ ያሎ ዓሶም ቢያ ጌቲማንታ ዋርሢንታ ያሎር ቶኣኮና ዲዶናይዳ ዓጎ ባኮንታ ሂኢሺንታ ቆኦሲንታ ዋራንታ ዋራ ሹቺያ ጊኢጊሺ ዒንጌኔ፤

15 ካኣቲ ያዚያ ዩሩሳላሜይዳ ሃኣሚ ማዔ ዓሶ፡- ጊዒ ዴዒ ካፓኒ ሹጮና ዴጊዲ ማዢ ቤዘንታ ካታሞኮ ኬኤሎ ዲያ ዋላ ካኣማ ካርይዳ ሂኢሺንታ ዴኤፒ ዴኤፒ ሹቺ ዋራኒና ዴካኒያ ዳንዳዓ

ዓንጋሞ ኮሺሴኔ፤ ናንጊና ናንጋ ጎዳ ዒዛ ማእዳሢሮ ኮሺ ዒኢኒ ደዳኔ፤ ዑሣ ዓኣዴ ዋልቃዲያ ማዔኔ፤ ሱጎፃኣ ዒዛኮ ቢያ ቤዛ ዋይዚጎቴኔ።

ዖዚያ ሄርሺንቶና ፔ ጊዳ ዒኪ ሙኬ ሜታሢ

16 ካኣቲ ዖዚያ ካኣቱሞ ዶዲሻዖ ዖቶርቄኔ፤ ዬይ ዖቶርሙማ ዒዛ ዒኪ ሎንሣኔ፤ ዒዚ ናንጊና ናንጋ ጎዳሞ ዑንጆ ጨቢሾ ቤዛ ጨቢሻኒ ጌኤዡ ማእሪ ጫርቂ ጌሊ ያሕሲ ያዩሴኔ፤

17 ዒማና ቄኤሳሢ፤ ዓዛሪያሴንታ ዒዛና ዋላ ዒናፓ ደዲ ማዳ ሳሊታሚ ቄኤሴ ዬያ ማዶሮ ዒዛ ጎራኒ ካኣቲ ጊንዖ ጌኤዡ ማእሪ ጌሊኔ።

18 ዒያታ ዒዛ ኮራ፡- «ዖዚያ! ኔኤኒ ናንጊና ናንጋ ጎዳሞ ዑንጆ ጨቢሻኒ ኮይሱዋሴ፤ ዬያ ማዳኒ ጌሢንቱሢ ናንጊና ናንጋ ጎዳሞ ደማዴ ዓኣሮኔ ዜርዖ ማዔ ቄኤሶ ሌሊኬ፤ ዬያሮ ሃያ ናንጊና ናንጋ ጎዳሞ ደማዴ ቤዛፓ ኬሰኬ፤ ናንጊና ናንጋ ጎዳ ማዔ ያኣዛሢ ኔኤኒ ያዩሴኔ፤ ሃይ ኔኤዮ ማዳ ያኣሲዳፓ ቦንቾ ኔኤሞ ጴዲሳያቱዋሴ» ጌዔኔ።

19 ዖዚያ ዑንጆ ጨቢሻኒ ጨቢሾ ባኮ ዓርቂ ጌኤዡ ማእሮ ጋሮይዳ ጨቢሾ ባኮ ጨቢሾ ቤዛ ኮይላ ዒቂ ዓኣዖ ቄኤሶይዳ ዳጋዲ ጎሪንቱኔ፤ ዒማና ኔጉዋዖ ዒዛኮ ባሊቶይዳ ዑፃ ኬሰካ ዶርዒሢ ኬሰኪ ጴዴኔ፤

20 ዬያሮ ዓዛሪያሴንታ ሜሌ ቄኤሶንታ ኮሺ ዲቃታዖ ካኣቲኮ ባሊቶ ጊዡ ጌይ ዛጌኔ፤ ጌኤዡ ማእራፓኣ ዒዛ ዑካሲ ኬሴኔ፤ ዒዚያ ናንጊና ናንጋ ጎዳ ዒዛይዳ ሜቶ ዓጌሢ ዒሪ ኬሰካኒ ሩኡሬኔ።

21 ካኣቲ ዖዚያ ሃይቃንዳያ ሄላንዳኣና ዬይ ዑፃ ኬሰካ ዶርዒሢ ዒዛ ሃሽባኣሴ፤ ዬያሮ ዒዚ ደማ ኬኤሢዳ ናንጌኔ፤ ዬካፓ ማይ ጌኤዡ ማእሪ ጌላኒ ዒ ዳንዳዒባኣሴ፤ ዒዛኮ ናኣዚ ዒዮዓታሜ ካኣቱሞ ማእሮይዳ ሱኡጌ ማዒ ዓጮ ዋይሢኔ።

22 ካኣቲ ዖዚያ ካኣታዴ ዋዶና ማዴ ሜሌ ባካ ቢያ ዓሞፄ ናኣዚ፤ ያሕሲ ማሊዖ ኬኤዛሢ፤ ዒሲያሴ ፃኣፔ ሃይሶይዳ ዓኣኔ።

23 ዬካፓ ዖዚያ ሃይቂ፤ ካኣታ ደኡታ ቤዛ ኮይላ ዓኣ ኬሰካ ደኡቱኔ፤ ዒዚ ካኣታ ደኡታ ቤዛ ደኡቱባኣሢ ዑፃ ኬሰካ ዶርዒሢ ዒዛ ዓርቄሢከ፤ ዒዛ ቤዛይዳ ዒዛኮ ናኣዚ ዒዮዓታሜ ካኣታዴኔ።

27

ጴሁዳ ካኣቲ ዒዮዓታሚ
(2ካኣቶ. ማ 15:32-38)

1 ዒዮዓታሚኮ ሌዓ ለማታሚ ዶንጎ ማዓኣና ካኣታዴኔ፤ ዒዚ ዬሩሳላሜይዳ ናንጊ ታጾ ላሆ ሌዒ ወይሄኔ፤ ዒንዳ ዒዛኮ ዪሩሻ ጌይንታያ ሳዶቄ ናዎኬ።

2 ዒዮዓታሚ ዓዴ ማዴ ጎይያ ናንጊና ናንጋ ጎዳ ዋዛሳ ባኣዚ ማዴኔ፤ ዓዴ ጌኤኩ ማኣሮይዳ ዑንጆ ጨቢሺ ማዴ ጎሞ ማዲባኣሴ፤ ዴራ ጋዓንቴ ጎሞ ማዲያ ሃሾ ዒፄኔ።

3 ዒዮዓታሚ ጌኤኩ ማኣሮኮ ኬዶ ዛሎ ካሮ ለሚ ዓካሲ ኮሼኔ፤ ሃሣ ገንሣ ያፔሌ ጌይንታ ጌሜራዳ ቤዙ ዙሎ ኬልቂ ዲርቂ ሚርጌ ማዴ ማዴኔ፤

4 ዬያጉዲ ሃሣ ጴሁዳ ዓጫ ጌሜራ ዓኣ ካታሞ፥ ዴኤሎ ካያ ሚርጌ ዓኣ ቤዙኮዋ ዋርዲያንታ ኬኤሌ ዲሢያ ኮሼኔ።

5 ዒዚ ዒማና ዓሞኦኔ ካኣቲንታ ያሎ ዓሶዋ ያሊ ባሼኔ፤ ዬያሮ ዓሞኦኔ ዓሳ ሃይሣ ሌዒ ጉቤ ሌዓ ሌዓ ሃይሣ ሺያና ያይዶ ፄኤታ ኪሎ ማዓ ሹቺ ቢራ፤ ፔቲ ሚሎኔ ኪሎ ማዓ ዛርጌና ፔቲ ሚሎኔ ኪሎ ማዓ ዔልዓኣ ጊኢራኔ።

6 ዒዮዓታሚ ናንጊና ናንጋ ጎዳ ማዒ ፔኤኮ ያኦዛሢሞ ጉሙርቂንታ ማዒሢሮ ዋልቂ ዴንቂ ዶዲ ዶዲ ዓኣዴኔ።

7 ዒዮዓታሚ ካኣታዴ ዋዶና ማዲንቲ ሜሌ ባካ ቢያ፥ ዒ ያሌ ያሎንታ ዒ ወይሄ ወይሢያ ቢያ ዒሰራዒኤሌንታ ጴሁዳንታ ካኣቶ ሃይሳ ፃኣፒንታ ማፃኣፓ ፃኣፒንቲ፤

8 ዒዮዓታሚ ካኣታዳኣና ሌዓ ዒዛኮ ለማታሚ ዶንጎኬ፤ ዒዚ ዬሩሳላሜይዳ ናንጊ ታጾ ላሆ ሌዒ ወይሄኔ፤

9 ዬካፓ ዒዚ ሃይቂ፥ ዳውቲ ካታማ ዴኡቲኔ፤ ዒዛ ቤዛ ዒዛኮ ናኣዚ ዓኣኣዜ ካኣታዴኔ።

28

ጴሁዳ ካኣቲ ዓኣኣዜ
(2ካኣቶ. ማ 16:1-4)

1 ዓኣኣዜ ሌዓ ዒዛኮ ለማታሚ ማዓኣና ካኣታዴኔ፤ ዒዚ ዬሩሳላሜይዳ ናንጊ ታጾ ላሆ ሌዒ ወይሄኔ፤ ዒዛኮ ማዒ፥ ዳውቲ ማዴ ኮኩ ማዴ ማዲያ ሃሺ ናንጊና ናንጋ ጎዳ ያዩሳ ባኣዚ ማዴኔ፤

2 ዒዚ ዒሰራዒኤሌ ካኣታ ማዳ ፑርቶ ማዴ ማዴኔ፤ ባዓኣሌ ጌይንታ ያኦዙ ማላ ባኣዚ ዓንጊ ሺኤሺ ኮሼኔ፤

3 ሄኖሜ ዶኤጮይዳ ዑንጃ ጩቢሼኔ፤ ቤርታ ዒሰራዔኤል ዓሳ ዓጮ ሃጊ ጌላኣና ናንጊና ናንጋ ጎዳ ዒኢካፓ ዳውሲ ኬሴ ዴዳ ማዳ ሻኣካ ማዶ ማዳ ፔኤኮ ዓቲንቆ ናኣቶዋ ሚቺ ዒንጎ ዒንጊሢ ማሂ ሜሌ ያኦዞም ሺኢሼኔ።

4 ጌሜር ዑያይዳ ዓኣ፥ ሜሌ ዓሳ ፔያኦዞ ካኣሸካ ቤዞይዳ፤ ጊንሣ ሃሣ ሚሢኮ ሺቢዳ ሺቢዳ ዒንጎ ዒንጊሢ ዬያ ያኦዞም ዒንጌኔ፤ ዑንጃያ ጩቢሼኔ።

ሶኦሪያና ዒሰራዔኤል ዓሶና ዓካኣዜ ያሌሢ (2ካኣቶ. ማ 16:5)

5-6 ካኣቲ ዓካኣዜ ጎሜ ማዳሢሮ ሶኦሪያ ካኣቲ ያሎና ዒዛ ባሻንዳጉዲ፤ ሃሣ ሚርጌ ዓይሁዶ ዓሲያኣ ቱኪ ዔኪ ዴማሰቆ ዴንዳንዳጉዲ ናንጊና ናንጋ ጎዳ ዓይሣኔ፤ ዬያጉዲ ጊንሣ ሬማሊያ ናኣዚ፥ ዒሰራዔኤል ካኣቲ ፓቁሄ ዓካኣዜ ያሊ ባሻንዳጉዲና ያሎና ኮሺ ዔርቲያ ማዔ ዪሁዳ ፖኦሊሳፓ ፔቲ ኬሊ ያኤታና ላማታሚ ሺያ ዋዳንዳጉዲ ናንጊና ናንጋ ጎዳ ዓይሣኔ፤ ዔያቶኮ ቤርታኣ ዓዶንሢ ያኦዞሢ ማዔ ናንጊና ናንጋ ጎዳ ዬያ ማዲሼሢ ዪሁዳ ዓሳ ዒዛ ሃሼሢሮኬ።

7 ዒማና ዚክሪ ጌይንታ ፔቲ ዒሰራዔኤል ፖኦሊሴሰኬይ ካኣቲ ዓካኣዜኮ ናኣዚ፥ ማዕሴያንታ ካኣቱም ማኣሮ ዓሶ ሱኡጌ ማዒ ዋይሣ ዓዝራቃሜንታ ካኣቲኮ ዴማ ሄሊሲ ቢታንቶ ዓኣ ሂልቃናኣ ዋዳኔ፤

8 ዬያ ሌሊቱዋንቲ ዓይሁዶ ዓሳ ዔያቶኮ ዒጊኒ ማዔቲያ ዒሰራዔኤል ፖኦሊሳ ላምያ ያኤታ ሺያ ናይንታ ላኣሊንታ ቱኪ ዔኪ ሚርጌ ባኣዚያ ዋላ ዲዒ ሳማሪያ ዴንዴኔ።

ያኦሲ ማሊያ ኬኤዛ ያዴዴ

9 ያኦሲ ማሊያ ኬኤዛ፥ ያዴዴ ጌይንታ ዓሲሰኬይ ሳማሪያ ካታማ ናንጋኔ፤ ዒሰራዔኤሌኮ ያሎ ዓሳ ዓይሁዶ ዓሶ ቱኪ ዔኪ ሳማሪያ ካታም ጌሊያይዳ ዓኣንቲ ዒዚ ዔያቶ ባንሢ ኬሰካዖ፡- «ዒንሢኮ ቤርታኣ ዓዶንሢ ያኦዞሢ ማዔ ናንጊና ናንጋ ጎዳ ዪሁዳ ዴርይዳ ዳጋዴሢሮ ዒንሢ ዔያቶ ያሎና ባሻንዳጉዲ ማሄኔ፤ ዒንሢ ጋዓንቲ ዓይሁዶ ዓሶ ሚጨንቱዋያ ዋዳ ኩርሰኔ፤

10 ዬይ ዒንሢሞ ጊዶ ዒፃዛ ዬሩሳላሜንታ ዪሁዳ ዓጮንታኮ ዓቲንቆና ላኣሎና ቢያ ዒንሢ ዓይሌ ማሂ ዔካኒ ማሌኔ፤ ዒንሢ ዬያይዲያና ዔያቶጉዲ ጎሜ ማዲ ዒንሢኮ ያኦዞሢ ማዔ ናንጊና ናንጋ ጎዳ ያዩሲባኣዓዳ?

11 ሃሢ ዋይዙዋቲ! ናንጊና ናንጋ ጎዳኮ ዳጋ ዒንሢዳ ዒኤቴሢሮ ሃኣቶ ዒንሢ ቴኪ ዒኪ ዩዒ፥ ዒንሢኮ ዒሸንሢንታ ጌርንሢንታ ዒያታ ናንጋ ቤዞ ዓኣዳንዳጉዲ ሃሹዋቲ» ጌዒኔ።

12 ዩያጉዲ ሃሢ ዩሆሃናኔ ናኣዚ ዓዛሪያሴ፥ ሜሺሌሞቼ ናኣዚ ቤሬኪያ፥ ሻሉሜ ናኣዚ ዪሂዚቂያንታ ሃድላዬ ናኣዚ ዓማሳ ጌይንታ ዒርቲ ያይዶ ዒፕሬኤሜ ዓጮ ዋይሣ ሱኡጌሰኬንሢ ዩይ ያሎ ዓሳ ማዳ ማዳ ዒዲ ማኬኔ፤

13 ዒያታ ዒማና፡- «ሃኣቶ ቴኡዞ ዓሶ ሃይካ ዒኪ ዩይፖቲ! ሃያኮ ቤርታ ጎሜ ማዲ ናንጊና ናንጋ ጎዳ ኑ ያዪሴሢሮ ዒዛኮ ጎሪንታ ኑና ሄሌኔ፤ ሃሢ ዳቢንቲዳ ዳቢንቲ ኑ ማዳንዳጉዲ ዒንሢ ኮዓ?» ጌዒኔ።

14 ዩያሮ ያሎ ዓሳ ቴኡዞ ዓሶንታ ዲዒ ዒኪ ሙኮና ባኮዋ ዴሮና ዒያቶኮ ሱኡጎናሞ ዒንጌኔ።

15 ዩካፓ ዩንሢ ያይዶ ዓሶንሢ ቴኡዞ ዓሶሞ ዲዒ ዒኪ ሙኮና ባካፓ ኮይሳ ባኣዚ ቢያ ዒንጋንዳጉዲ ዓይሢንቲኔ፤ ዩያሮ ዩንሢ ዓሳ ካሎ ማዒ ቴኡዞ ዓሶሞ ማኣጎንታ ዲርሲንታ፤ ዩያጉዲ ሃሢ ጊዳ ሙኡዚንታ ዋኣሢያ ዒንጌኔ፤ ዒያቶኮ ኪያይዳኣ ሪሚቶ ዛይቶ ዋሂ ዒያቶ ማኣዴኔ፤ ቶኪና ሃንታኒ ዳንዳዒባኣ ላቤ ዓሶ ሃሬ ቶጊሴኔ፤ ዩካፓ ቴኡዞ ዓሶ ቢያ ዪሁዳይዳ ሜኤፄ ዲቢ ዓኣ፥ ዒያርኮ ካታሞ ጊንሢ ዒኪ ዓኣዳዛ ዩንሢ ዓሳ ፔ ናንጋ ካታሞ ሳማሪያ ማዒ ሙኬኔ።

ዓካኣዜ ዓሶኦሬ ካኣቲ ዒዛ ማኣዳንዳጉዲ ሺኢቄሢ (2ካኣቶ. ማ 16:7-9)

16-17 ዒድኣሜ ዓሳ ዪሁዳ ዓጮ ላሚ ጊንሢ ጌሊ ዓርቂ ሚርጌ ዓሲ ዲዒ ዒኪ ዓኣዴኔ፤ ዩያሮ ካኣቲ ዓካኣዜ ዒዛ ማኣዳንዳጉዲ ዓሶኦሬ ካኣቲ፥ ቲግላት ፔሌሴሬ ሺኢቄኔ።

18 ዒማና ፒሊሰፄኤሜ ዓሳ ዓባ ጌላ ዛላ ዓኣ ጌሜሮ ዴሞንታ ደኣሎ ዛሎይዳ ዓኣ ዪሁዳኮ ዳኮ ዳኮ ካታሞ ጌሊ ዓርቄኔ፤ ዩንሢ ካታማ፡- ቤትሺሜሼ፥ ዓያሎኔ፥ ጌዴሮቲ፥ ሶኮ፥ ቲሚናንታ ጊሞዞ ጌይንታ ካታሞ ኮይላ ዓኣ ጉርዶንታ ያሊ ባሺ ዓርቂ ዒኣካ ናንጌኔ።

19 ዪሁዳ ካኣቲ፥ ዓካኣዜ ዓጮይዳ ፑርታ ማዶ ማዳሢሮ ሃሢ ናንጊና ናንጋ ጎዳሞ ጉሙርቂንቲፆዋ ፓጪሴሢሮ ናንጊና ናንጋ ጎዳ ዪሁዳ ዓጮይዳ ማቶ ዒኪ ዩዒኔ።

20 ዓሶኦሬ ካኣቲ፥ ዓካኣዜ ማኣዶ ዒዲ ዒዛሞ ሜቶ ማኬኔ፤

21 ዩያሮ ዓካኣዜ ናንጊና ናንጋ ጎዳኮ ጌኡዞ ማኣራፓ፥ ካኣቲሞ ማኣሮንታ ዴሮ ሱኡጎንታፓ ሚርጌ ዋርቄ ዒኪ ዩያ ካኣቲ ጌሻኒ ዳኬኔ፤ ጋዓንቲ ዩይ ዒዛ ማኣዴ ባኣዚ ባኣሴ።

ዓካኣዜ ማዳ ጎሞ

22 ዓካኣዜ ሜታ ዒዛይዳ ዑሣ ዓኣዳ ዲቢ ዲቢ ዓኣዳሢሮ ፔቶ ጎሜ ማዳሢና ናንጊና ናንጋ ጎዳ ያዩሴኔ።

23 ዓካኣዜ ሶኦሪያ ዓሳ ባሻገዳጉዲ ዔያቶ ማኣዴ፥ ሶኦሪያ ዓሶ ያኣዛሢሞ ዒንጎ ባኣዚ ሺኢሼኔ፤ ዬያ ዒ ማዳሢ፡- «ሶኦሪያ ዓሶ ያኣዛ ሶኦሪያ ዓሶ ማኣዴኔ፤ ታኣኒ ዒንጎ ባኣዚ ዒንገቴ ታናኣ ማኣዳንዳኔ» ጌይ ማሊኬ፤ ዬይ ማዳ ዒዛና ዒዛኮ ዓፄፍይዳ ባይሲንታ ዔኪ ዬዔኔ፤

24 ቃሲ ሃሣ ዓካኣዜ ጌኡዠ ማኣሮኮ ሜሆ ቢያ ዔኪ ኬሲ ሜንሣዎ ጌኡዠ ማኣሮ ካሮ ዎዴኔ፤ ዬሩሳላሜይዳ ዱማ ዱማ ቤስካ ሜሌ ያኣዞሞ ዒንጎ ባኣዚ ዒንጎ ቤሲ ኮሼኔ፤

25 ዪሁዳ ካታሞ ቢያሢዳ ዓኣ ሜሌ ያኣዞሞ ዑንጆ ጨቢሾ ቤዞ ጌሜሮይዳ ኮሼኔ፤ ዬያይዲ ዓካኣዜ ዒዛኮ ቤርታኣ ዓዶንሢ ያኣዛሢ ማዔ ናንጊና ናንጋ ጎዳኮ ጎሪንቶ ፔ ጊዳ ዔኪ ሙኬኔ።

26 ዓካኣዜ ካኣታዳማፓ ዓርቃዎ ጋፖ ሄላንዳኣና ማዳንቲ ሜሌ ባካ ቢያ ዪሁዳና ዒሰራዔኤሌ ካኣቶናኮ ሃይሳ ፃኣፒንታ ማፃኣፓ ፃኣፒንቲ ዓኣኔ፤

27 ዬካፓ ካኣቲ ዓካኣዜ ሃይቂ፥ ዬሩሳላሜይዳ ዱኡቴኔ፤ ጋዓንቲ ካኣታ ዱኡታ ቤዛ ዱኡቲባኣሴ፤ ዒዛ ቤዛ ዒዛኮ ናኣዚ ሂዚቂያሴ ካኣታዴኔ።

29

ዪሁዳ ካኣቲ ሂዚቂያሴ

(2ካኣቶ. ማ 18:1-3)

1 ሂዚቂያሴኮ ሌዓ ላማታሚ ዶንጎ ሌዔ ማዓኣና ካኣታዴኔ፤ ዒዚ ዬሩሳላሜይዳ ናንጊ ላማታሚ ታዞጸ ሌዔ ዎይሢኔ፤ ዒዛኮ ዒንዳ ዓቢያ ጌይንታያ ዛካሪያሴ ናዎኬ፤

2 ዒዛኮ ማዔ፥ ዳውቲ ማዳ ጎይዎ ሂዚቂያሴ ኮሺ ማዶ ማዲ ናንጊና ናንጋ ጎዳ ዎዛሴኔ።

ናንጊና ናንጋ ጎዳኮ ጌኡዠ ማኣሮ ጊንሣ ጌኡሾናሢ

3 ሂዚቂያሴ ካኣታዴ ሌዎኮ ቤርታሳ ዓጊኖና ናንጊና ናንጋ ጎዳኮ ጌኡዠ ማኣሮ ካሮ ቡሊ ኬኤዎ ጊንሣ ዓካሲ ዒዚ ኮሼኔ፤

4 ቂኤሶና ሌዊ ዓሶና ዓሳ ኬሰካ ዛሎና ዓኣ ጌኡዠ ማኣሮይዳ ዓሳ ቡካ ቤዛ ዒ ቡኩሲ፡-

5 «ዒንሣ ሌዊ ዓሳ! ዒንሣ ናንጊና ናንጋ ጎዳም ደማሲ፤ ሃሣ ጊንሣ ዒንሣኩ ቤርታኣ ዓደንሣ ፆኦዛሣ ማዕ ናንጊና ናንጋ ጎዳኩ ጌኡዢ ማኣሮ ጌኡሻንዳያ ኮይሳኔ፤ ጌኡዢ ማኣሮ ዒኢሴ ባኮ ቢያ ጌኡዢ ማኣራፓ ባይዛንዳያ ዒንሣም ኮይሳኔ።

6 ኦኡኮ ቤርታኣ ዓደንሣ ናንጊና ናንጋ ጎዳ ማዕ ኦ ፆኦዛሣም ጉሙርቂንቲፆፓጪሲ ዒዛ ፆዴሴኔ፤ ዒዛ ሃሺ፥ ዒ ናንጋ ማኣሮ ማዕ ቤዛፓ ፔ ዓኣፖ ካሮ ዔያታ ሺርሼኔ፤

7 ጌኡዢ ማኣሮ ካሮዋ ቢያ ዔያታ ዋዴኔ፤ ፖፖዋ ዔያታ ባይዘኔ፤ ናንጊና ናንጋ ጎዳ ማዕ ዒሰራዔኤሌ ፆኦዛሣኩ ጌኡዢ ማኣሮይዳ ዑንጃ ጩቢሺፆንታ ዒንጎ ባኮ ሺኢሺፆዋ ሃሺኔ፤

8 ዬያሮ ናንጊና ናንጋ ጎዳኮ ዳጋ ዪሁዳና ዬሩሳላሜናይዳ ሙኬኔ፤ ዔያቶይዳ ሄሌ ባይሲንታ ቢያሣ ዒጊቻያና ዲቃሣያ ማዕኔ፤ ዒንሣ ዬያ ቢያ ኮሺ ዔራኔ፤

9 ኦ ዓደንሣ ፆልዚና ሃይቄኔ፤ ኦኡኮ ላኣሎና ናኣቶና ቱኡሲ ዓሲ ማዕ ዲዒንቲ ዔውቲኔ።

10 «ማይ ናንጊና ናንጋ ጎዳኮ ዳጋ ኦና ሄሉዋጉዲ ሃሣ ታኣኒ ናንጊና ናንጋ ጎዳ ማዕ ዒሰራዔኤሌ ፆኦዛሣና ዋላ ጫኣቃኒ ማሌኔ፤

11 ታ ናይዮቲ! ዒዛኮ ቤርታ ዔቂ ዒዛም ዒንሣ ማዳንዳጉዲና ዒዛም ማዳ ዓሲ ዒንሣ ማዳንዳጉዲ፤ ዒንጎ ባኮዋ ዒንጋንዳጉዲ ናንጊና ናንጋ ጎዳ ዒንሣ ደኦሬሣሮ ዓካሪ ቤልዳራፖቲ» ጌዔኔ።

12-14 ዬያ ማዳ ማዳንዳጉዲ ጌይንቲ ዓሳ ሃካፓ ዴማ ሱንዓ ፓይዲንቲ ሌዊ ዓሶኬ፡-

ቂዓቲ ቶኦካፓ፡- ዓማሳዬ ናኣዚ ማሃቲና ዓዛሪያሴ ናኣዚ ዒዩዔኤሌ፤

ሜራሪ ቶኦካፓ፡- ዓብዲ ናኣዚ ቂሼና ዪሃልዔኤሌ ናኣዚ ዓዛሪያሴ፤

ጌርሾኔ ቶኦካፓ፡- ዚማ ናኣዚ ዮዓሄና ዮዓሄ ናኣዚ ዔዴኔ፤

ዔሊፃፓኔ ቶኦካፓ፡- ሺምሪና ዪዒዔኤሌና፤

ዓሳኣፔ ቶኦካፓ፡- ዛካሪያሴና ማታኒያና፤

ሄማኔ ቶኦካፓ፡- ዪሃዔኤሌና ሺምዒና፤

ዪዲቲኔ ቶኦካፓ፡- ሺማዒያና ዑዚዔኤሌናኬ።

15 ዬያታ ዓሳ ሌዊ ዓሶ ማዕ፥ ፔ ዒጊኖ ቡኩሲ ቢያሣ ጎዳ ዋጎ ጎይዖና ፔና ጌኡሼኔ፤ ዬካፓ ካኣቲ ዓይሣ ጎይዖና ሌዊ ዓሳ ናንጊና ናንጋ ጎዳ ዋጎ ጎይዖና ጌኡዢ ማኣሮ ጊንሣ ጌኡሼኔ፤

16 ዒማና ቄኤሳ ጌኡዢ ማኣሮ ጌኡሻኒ ጋሮ ጌሌኔ፤ ዳምቦ ጎይዖና ጌኡሽኪባኣ ባኮ ቢያ ጌኡዢ ማኣሮይዳ ዓሳ ቡዛ ቤዛ ዔኪ ኬሴኔ፤ ዬካፓ ሌዊ ዓሳ ዬያ ባኮ ካታሜሎኮ ዙላ ዔኪ ኬሲ ቂድሮኦኔ ደኦጫ ኬኤሬኔ።

17 ዬይ ጌኤሽያ ማዳ ቤርታሳ ዓጊኖኮ ያኤራፓ ዓርቃያ ሳላሳ ኬሎና ጌኤዡ ማኣሪ ጌሎ ካራ ዓኣ ቆልዖንታ ቢያ ጌኤሽኪ ጋፔኔ፤ ዬካፓ ጌኤዡ ማኣሪይዳ ካኣዡ ዳምቦ ጊኢጊሻኒ ሄሊ ዓኣ ሳላሳ ኬሎይዳ፤ ጌይፃ፡- ዓጊና ያኤራንቴ ታጽ ላሃሳ ኬሎ ሄላንዳኣና ዔያታ ማዳኔ።

ጌኤዡ ማኣራ ላሚ ጊንሣ ያኦሲም ዲማዴያ ማዔሪህ

18 ሊዊ ዓሳ ማዳንቴ ማዳ ዛሎ ካኣቴ ሂዚቂያሴም፡- «ሚቺ ዒንጎ ባኮ ናንጊና ናንጋ ጎዳም ዒንጎ ቤዘንታ ያኦሲም ዲማዴ ካሦ ጌሦ ዴጌ ሎኦዡ ያይቶንታ፤ ዬያቶና ዋላ ማዳንቶ ሜሌ ሚሆንታ ጌኤዡ ማኣሪ ዳምቦ ጎይያና ቢያ ኑ ጌኤሽኔ፤

19 ዬያጉዲ ካኣቴ ዓካኣዜ ናንጊና ናንጋ ጎዳም ጉሙርቁንቴዋያ ማዒ ናንጌ ሌያይዳ ጌኤዡ ማኣራፓ ዔኬ ሚሆ ቢያ ጊንሣ ማሂ ዔኬ ሙኪ ያኦሲም ዲማዴያ ኑ ማሄኔ፤ ዬይ ሜሃ ጉቤ ናንጊና ናንጋ ጎዳም ዒንጎ ባኮ ዒንጎ ቤዘኮ ቤርቶ ዛላ ዓኣኔ» ጌዒ ኬኤዜኔ።

20 ዚሮ ጉቴሎ ጉቴ ዓማ ካኣቴ ሂዚቂያሴ ካታምኮ ቢቶ ማዓ ዓሶ ቡኩሲ ዔያቶና ዋላ ጌኤዡ ማኣሪ ዴንዴኔ፤

21 ዔያታ ካኣቴ ማኣሪ ዓሶንታ ዪሁዳ ዴሮንታኮ ጎሞ ጌኤሻንዳጉዲ፤ ዬያጉዲ ሃሣ ጌኤዡ ማኣሪ ጌኤሽያ ዳምቦም ዒንጊሢ ማዒ ናንጊና ናንጋ ጎዳም ዒንጊንታንዳጉዲ ላንካይ ዚያ ጌማይ፤ ላንካይ ዓዴ ማራይ፤ ላንካይ ማራናይ ዓዴና ላንካይ ዳካ ኮላናይና ዔኬ ሙኬኔ፤ ካኣቴ ዓኣሮኔ ዜርያ ማዒ ቁኤሳ ዬያ ቆልሞ ያኦሲም ዒንጎ ቤዘይዳ ዒንጊሢ ማሂ ሹኪ ሽኢሻንዳጉዲ ዓይሣኔ፤

22 ዬያሮ ቁኤሳ ቤርታዲ ዚኖ ጌማቶ፤ ሄሊሳያ ዓዴ ማራቶ፤ ጋፒንያይዳ ማራናኣቶ ሹኪ ፔቴ ፔቴ ቆልሞኮ ሱጉያ ዒንጎ ባኮ ዒንጎ ቤዘይዳ ፑጩኔ፤

23 ዬካፓ ካኣቴንታ ቡኪንቴ ዓኣ ዓሶንታም ዋናቶንሢ ሸኢሻዛ ዓሳ ኩጮ ዬንሢ ዑፃ ጌሣኔ።

24 ካኣቴ ዒሰራዔኤሌ ዴሮ ጉቤሢ ዛሎ ሚቺ ዒንጎ ዒንጊያና ጎሞ ጌኤሻኒ ዒንጎ ዒንጊያም ማዓንዳ ባኮ ዒንጋንዳጉዲ ዓይሣሢሮ ቁኤሳ ዓይሣንቴ ጎይያ ዋናቶንሢ ሹኪ ሱጉያ ዒንጊሢ ማሂ ዒንጎ ባኮ ሸኢሻ ቤዘይዳ ዋሄኔ።

25 ካኣቴ ሂዚቂያሴ ያኦሲ ማሊያ ኬኤዛ ጋኣዴና ናኣታኔ ዛሎና ካኣቴ ዳውቴም ኬኤዜሢንታ ዳውቴ ማዲ ኩንሣ ዓይሢያ ጎይያ ማዲ ዲቦ ሻዡና ዋርቆ ጎኦሎንታ ሂቻሢንታ ፔቴ ሻዡና ዋርቆ ጎኦሎዋ ዋርቂ ዔሬ ሊዊ ዓሶ ጌኤዡ ማኣራ ማዳንዳጉዲ ጌሣኔ፤

26 ዬያሮ ሊዊ ዓሳ ዬያ ዳውቴ ማዲሻ ዓይኑም ዓንጋም ዔኪ፤ ቁኤሳ ዛዬ ዔኪ ዒኢካ ጌኤዡ ማኣሪ ጋራ ዔቁኔ፤

27 ዒማና ካኣቲ ሂዚቂያሴ ሚቺ ዒንጎ ባኮ ናንጊና ናንጋ ጎዳም ሸኢሾ ቤዘይዳ ዒንጋንዳጉዲ ዓይሄኔ፤ ዒንጊያ ዓርቃኣና ዴራ ጋላታ ዓይኑም ዓይናዴኔ፤ ዓይኑም ዓይናዳ ዓሳ ዛዬ ዋርቂ፤ ሃሣ ዳውቴኮ ዓይኑም ዓንጋሞዋ ዋርቂ ዋርቂ ዓይናዲሢ ዓርቂኔ፤

28 ዒኢካ ዓኣ ዴራ ቢያ ዎሊ ዑፃ ያኦሲም ዚጌኔ፤ ዒንጎ ባካ ቢያ ጋፒ ሚቺንታንዳያ ሄላንዳኣና ዓይኑም ዓይናዳ ዓሳ ዓይናዴኔ።

29 ዒንጎ ባኮ ያኦሲም ዒንጊ ጋፔሰካፓ ካኣቲ ሂዚቂያሴንታ ዒኢካ ዓኣ ዴራ ቢያ ጉምዓቲ ናንጊና ናንጋ ጎዳም ዚጌኔ።

30 ካኣቲንታ ዴርኮ ሱኡጎ ቢያሢንታ ዳውቴና ያኦሲ ማሊያ ኬኤዛ ዓሳኣፔና ኬሴ ጋላቶ ዓይኑም ያኦሲ ቦንቾም ዓይናዳንዳጉዲ ለዊ ዓሶ ዓይሄኔ፤ ዬያር ቢያሢ ጉምዓቲ ዚጊያይዳ ዓኣያ ዴኤፒ ዎዛና ዓይናዴኔ።

31 ካኣቲ፡ ሂዚቂያሴ ዴር ኮይላ፡- «ዓካሪ ዒንሢ ናንጊና ናንጋ ጎዳም ዒንሢ ዴማሴሢር ናንጊና ናንጋ ጎዳም ጋላታ ሸኢሸኒ ዒንሢ ዒንጋ ባኮ ቢያ ያኦሲኮ ጌኤዢ ማኣሪ ዔኪ ሙኩዋቲ!» ጌዔኔ፤ ዔያታ ካኣቲ ዔያቶ ዓይሢ ጎይያ ማዴኔ፤ ፔቴ ፔቴ ዓሳ ፔ ሸኔና ሚቺ ዒንጎ ዒንጊሢ ማዓንዳ ቆልሞ ዔኪ ሙኩኔ፤

32 ዬያይዲ ዴራ ናንጊና ናንጋ ጎዳም ሚቺ ዒንጎ ዒንጊሢ ማዓንዳጉዲ ዔኪ ሙኩ ቆልሞኮ ሚርጉማ ላንካይታሚ ዚያ ጌማይ፡ ፔቴ ዌኤታ ዓዴ ማራይና ላምዖ ዌኤታ ዓዴ ማራይናኬ፤

33 ሃሣ ጊንሣ ፔቱሞና ዒንጎ ዒንጊያም ዴማሶና ቆልሞኮ ዲቡማ ላሆ ዌኤታ ዚያ ጌማይና ሃይሣ ሸያ ዓዴ ማራይናኬ፤

34 ዬያ ቢያ ቆልሞ ቲቂ ሹካኒ ጊዳ ቄኤሴ ባኣሢር ማዳ ጋፓንዳያ ሄላንዳኣና፤ ሃሣ ዳምቦ ጎይያና ጌኤሸኬ ቄኤሴ ጴዳንዳያ ሄላንዳኣና ለዊ ዓሳ ዔያቶ ማኣዳኔ፤ ዎጋ ዓይሣ ጎይያና ዳምቦና ጌኤሸኪያ ዛሎኮ ቄኤሳፓ ባሺ ለዊ ዓሳ ቢያ ዎዴ ጊኢጌያኬ።

35 ሚቺ ዒንጎ ዒንጊያንታ ፔቱሞና ዒንጎ ዒንጊያኮ ማሎንታ ዑዢ ዒንጊያንታ ዒንጊንቲሢ ኮሺ ዲቤኔ።

ዬያይዲ ጌኤዢ ማኣርይዳ ማዲንታ ካኣዢ ዳምባ ጊንሣ ዓርቂንቲኔ፤

36 ካኣቲ ሂዚቂያሴና ዴርና ዬይ ቢያ ዑኩና ማዲንታንዳጉዲ ያኦሲ ዔያቶ ማኣዴሢር ኮሺ ዎዛዴኔ።

30

ዑሣ ዓኣዲያ ቦንቾ ቦንቻኒ ጊኢጊንቶናሢ

1-3 ዋሳ ጎይያ ፔና ጌኤሼ፥ ጌዳ ቄኤሴ ባኣሢሮ፤ ሃሣ ዩሩሳላሜይዳ ሚርጌ ዴሬ ቡኪባኣሢሮ ዴራ ዑሣ ዓኣዲያ ቦንቾ ቤርታ ማዲንታ ጎይያ ቤርታሳ ዓጊኖና ቦንቻኒ ዳንዳዒባኣሴ፤ ዩያሮ ካኣቲ ሂዘቂያሴንታ ዒዛኮ ዶንዞ ማዔ ቢታንታ ዓኣ ዓሶንታ ዩሩሳላሜ ዴርንታ ዑሣ ዓኣዲያ ቦንቾ ላሞዓሳ ዓጊኖና ቦንቻኒ ዋላ ጌሰቲ ዔቂሴኔ፤ ያዲ ማዔሢሮ ካኣቲ ዒሰራዔኤሌና ዪሁዳ ዴሮ ጉቤሢሞ፤ ዩያጉዲ ጊንሣ ዔፕሬኤሜንታ ሚናኣሴ ዴርንታ ናንጊና ናንጋ ጎዳ ማዔ ዒሰራዔኤሌ ያኦዛሢ ቦንቻኒ ዑሣ ዓኣዲያ ቦንቾ ዩሩሳላሜይዳ ዓኣ ጌኤዢ ማኣሪ ሙካንዳጉዲ ኪኢታ ዋርቃታ ዳኬኔ፤

4 ካኣቲንታ ዴርንታ ዩያ ማሊያና ዋዛዴ።

5 ናንጊና ናንጋ ጎዳ ማዔ ዒሰራዔኤሌ ያኦዛሢኮ ዑሣ ዓኣዲያ ቦንቾ ሚርጌ ዋይይዳ ዲቢ ዓሲ ሙኪ ቦንቾ ቤቂባኣሢሮ ኬዶ ዛለና ዳኣኔፓ ዓርቃያ ዶኦሎ ዛለና ዴንዲ ቤርሳቤ ሄላንዳኣና ዓኣ ዒሰራዔኤሌ ዓሳ ቢያ ቤርታ ቡኪንታ ቡኪንቶይዳፓ ቢያ ባሼ ዋሳ ጎይያ ሚርጌና ሙኪ ዑሣ ዓኣዲያ ቦንቾ ቦንቻንዳጉዲ ዔያታ ዔኤሊሢ ዳኬኔ።

6 ካኣቲንታ ዒዛኮ ዶንዞ ማዔ ቢታንታ ዓኣ ዓሳ ዓይሢ ዓይሢያና ኪኢቶ ዓሳ ዪሁዳና ዒሰራዔኤሌ ዓጮ ጉቤ ዓኣዴ።

ዔያታ ዔኪ ዓኣዴ ኪኢታ፡- «ዒሰራዔኤሌ ዓሲዮቲ! ዓሶኦ ካኣቲ ዲዒይይዳፓ ዓቲ ዓሶ፤ ዒንሢ ባንሢ ዒዚ ማዓንዳጉዲ ዓሰራሃሜንታ ዩሳኣቂንታ ያይቆኦቤንታኮ ያኦሲ ባንሢ ማዑዋቲ፤

7 ናንጊና ናንጋ ጎዳ ማዔ ዔያቶኮ ያኦዛሢ ጉሙርቂንቲባኣ ዒንሢኮ ቤርታኣ ዓዶንሢንታ ዒንሢ ዒጊኖ ዒሰራዔኤሌ ዓሶጉዲ ማዒፖቲ፤ ዒንሢ ዔራሢጉዲ ናንጊና ናንጋ ጎዳ ዔያቶ ባይሲንታም ዓኣሢ ዒንጌኔ፤

8 ናንጊና ናንጋ ጎዳም ዓይሢንታያ ማዓንዳኣፓ ዓቲም ዔያቶጉዲ ዒና ባይቂ ዶጪያ ማዒፖቲ፤ ዒንሢ ያኦሲም ዋርቃያ ማዑዋቲ፤ ናንጊና ዒዛሮ ማሂ ዒ ዴማሴ፤ ዩሩሳላሜይዳ ዓኣ ጌኤዢ ማኣሪ ሙኩዋቲ፤ ሃካፓ ሴካ ናንጊና ናንጋ ጎዳኮ ዳጋ ዒንሢ ሄሉዋጉዲ ዒዛ ሌሊ ካኣሽኩዋቲ፤

9 ዒንሢ ናንጊና ናንጋ ጎዳ ባንሢ ማዔቲ ዩያታ፤ ዒንሢኮ ናኣቶንታ ዒጊኖንታ ዲዒ ዔኪ ዓሳ ዔያቶም ሚጪንቲ ዔያታ ናንጋ ቤዞ ማዒ ሙካንዳንጉዲ ዳካንዳኔ፤ ናንጊና ናንጋ ጎዳ ማዔ ዒንሢኮ ያኦዛሢ ኮሺ፤ ሃሣ ዓቶም ጋዓያ ማዔሢሮ ዒንሢ ዒዛ ባንሢ ማዔቲ ዒዚ ዒንሢ ዔካንዳኔ» ጋዓያኬ።

10 ኪኢቶ ዓሶንሢ ዔፕሬኤሜንታ ሚናኣሴ ፃጰ ዓጮይዳ ዓኣ ካታሞ ቢያ፤ ዴንዲ ዛብሎኦኔ ፃጰ ዓጮኮ ኬዶ ዛሎ ሄላንዳኣና ዓኣዴኔ፤ ዬይ ዓሳ ጋዓንቲ ዔያቶ ቦሂ ሚኢጨኑ፤

11 ጋዓንቲ ናንጊና ናንጋ ጎዳም ሼሌዒ ዬሩሳላሜ ሙካኒ ዔኤዔ ዓሲ ዓሴኤሬፓ፡ ሚናኣሴንታ ዛብሎኦኔንታ ፃጰፓ ፔቲ ፔቲ ዓኣኔ፤

12 ዪሁዳ ዴሮም ናንጊና ናንጋ ጎዳ ሚርጌ ባኣዚ ማዳሢሮ ካኣቲንታ ቢታንታ ዓኣ ዓሶንታ ዓይሢ ዓይሢ ዓኤዒ ኩንሣኒ ፔቲ ማሊሢና ዔኤዓንዳጉዲ ያኦሲ ዪሁዳ ዴሮ ዔቂሴኔ።

ዑሣ ዓኣዲያ ቦንቻ ቦንቺንቲሢ

13 ላምዓሳ ዓጊኖና ላኣዶ ሙዒ ቦንቻ ኬሎ ቦንቻኒ ሚርጌ ዴሬ ዬሩሳላሜይዳ ቡኬኔ፤

14 ዬሩሳላሜይዳ ሜሌ ያኦዘም ዒንጎ ባኮ ዒንጋኒና ዑንጆዋ ጊዳ ጌሢ ጨቢሽ ባኮ ቢያ ዔኪ ቁድሮኦኔ ዶኦጫ ዓሳ ኬኤሬኔ፤

15 ላምዓሳ ዓጊና ፄኤሬንቲ ታጰ ያይዳሳ ኬሎና ማራናኣቶ ዑሣ ዓኣዲያ ቦንቻ ኬሎም ዔያታ ሹኬኔ፤ ዒማና ዳምቦ ጎይያና ፔና ጌኤሺባኣ ሌዊ ዓሶንታ ቁኤሶንታ ኮሺ ቦርሲንቲኔ፤ ዬያሮ ዔያታ ፔና ናንጊና ናንጋ ጎዳም ዲማሴሰካፓ ጌኤዡ ማኣሮይዳ ሚቺ ዒንጎ ባኮ ያኦሲም ዒንጋኒ ዳንዳዔኔ።

16 ያኦሲ ዓሢ፡ ሙሴ ዓይሢ ዳምቦ ጎይያጉዴያ ጌኤዡ ማኣሮይዳ ዔያቶ ማዶንጎ ጎያና ቤዛ ዔያታ ዔቄኔ፤ ሌዊ ዓሳኣ ዒንጎና ባኮኮ ሱጉያ ቁኤሶም ዔኪ ሺኢሻዛ፡ ቁኤሳ ዬያ ሱጉያ ዒንጎ ባኮ ዒንጎ ቤዛ ዑፃ ፑጨኔ፤

17 ዴሮ ባኣካ ሚርጌ ዓሲ ዋጎ ጎይያና ፔና ጌኤሺባኣያ ማዔሢሮ ዑሣ ዓኣዲያ ቦንቻ ኬሎም ማዓ ማራቶ ሹካኒ ዔያታ ዳንዳዑዋያ ማዔኔ፤ ዬያሮ ሌዊ ዓሳ ዔያቶ ዛሎ ማራናኣቶ ሹኪ ናንጊና ናንጋ ጎዳም ሺኢሹኔ፤

18 ሃሣ ገንሣ ዔፕሬኤሜፓ፡ ሚናኣሴፓ፡ ዪሳኮኦሬንታ ዛብሎኦኔንታ ፃጰፓ ሙኬ ሚርጌ ዓሲ ዋጎ ጎይያና ፔና ጌኤሺባኣታያ ዑሣ ዓኣዲያ ቦንቻ ሙዔኔ፡ ጋዓንቲ ኮይሳሢ ጎይያ ቦንቺባኣሴ፤ ዬያሮ ካኣቲ፡ ሂዚቂያሴ ዔያቶ ዛሎ፡-

19 «ዔያቶኮ ቤርታኣ ዓዶንሢ ያኦዛሢ ማዔ ናንጊና ናንጋ ጎዳሢያ! ዋዚ ሃይ ዓሳ ዋጎ ጎይያና ፔና ጌኤሺባኣያ ማዔቲያ ሃኣዛጌ ዔያታ ሃሢ ጉቤ ዒኔፓ ኔና ካኣሽካኔ፤ ዬያሮ ኔ ኮሹሞና ዓቶንጎ ዔያቶም ጌዔ!» ጌይ ሺኢቄኔ፤

20 ናንጊና ናንጋ ጎዳ ሂዚቂያሴኮ ሺኢዲያ ዋይዚ ዓቶም ጌዔኔ፤ ፔቲታያ ሜቶ ዓሶይዳ ሄሊሲባኣሴ።

21 ዲማና ዬሩሳላሜይዳ ቡኪንቴ ዴራ ላንካይ ኬሊ ጉቤ ላኦዶ ሙዒ ቦንቾ ቦንቾ ዴኤፒ ዋዛና ቦንቹኔ፤ ሌዊ ዓሶንታ ቁኤሶንታ ቢያ ኬሊ ዓይኑሞ ዓንጋሞ ዋርቂ ዋርቂ ዓይናዲሢና ያኦሲ ጋላቴኔ፤

22 ሂዘቂያሴያ ሌዊ ዓሳ ናንጊና ናንጋ ጎዳ ካኦሽኮ ካኦዡ ዳምቦ ኩንሢሲያ ዔራቶና ማዴሢሮ ዔያቶ ጋላቴኔ፡፡

ዲማና ዴራ ዔያቶኮ ቤርታኦ ዓድንሢ ያኦዛሢ ማዔ ናንጊና ናንጋ ጎዳ ቦንቹ ላንካይ ኬሊ ፔቱሞና ዒንጎ ዒንጊያ ዒንጊ ማዔሰካፓ፡

23 ቃሲ ጊንሢ ላንካይ ኬሊ ቦንቻኒ ፔቱሞና ዋላ ጌሰቲ ዔቂሲ ቦንቾ ዋዛና ቦንቹኔ፡፡

24 ካኦቲ ሂዘቂያሴ ዲማና ፔቱ ሺያ ዚያ ጌማይ፡ ላንካይ ሺያ ማራይና ዋኦሪና፤ ሃሣ ዒዛኮ ዶንዞ ማዔ ቢታንታ ዓኦ ዓሳ ፔቱ ሺያ ዚያ ጌማይ፡ ታጻ ሺያ ማራይና ዋኦሪና ዴራ ሹኪ ሙዓንዳጉዲ ዒንጊኔ፤ ፓይዳ ዑሣ ዓኦዳ ሚርጌ ቁኤሴያኦ ዋጎ ጎይያና ፔና ናንጊና ናንጋ ጎዳሞ ዲማሴኔ፤

25 ዬያሮ ዪሁዳ ዴራ፡ ቁኤሳ፡ ሌዊ ዓሳ፡ ኬዶ ዛሎ ዓጫፓ ሙኬ ዓሳ፡ ዒሰራዔኤሊንታ ዪሁዳ ዓጮንታይዳ ሙኬ ዓሲ ማዒ ናንጋ ዴራ ቢያ ኮሺ ዋዛዴኔ፡፡

26 ዳውቴ ናኦዚ ሴሎሞኔ ዋዳፓ ዓርቂ ዒማ ሄላንዳኦና ዬያጉዴ ቦንቾ ዬሩሳላሜይዳ ቦንቹንቲ ቤቂባኦሢሮ ዬሩሳላሜ ካታሞ ዴራ ኮሺ ዋዛዴኔ፡፡

27 ቁኤሶና ሌዊ ዓሶና ዔቂ ያኦሲኮ ዓንጃ ዴሮም ማዓንዳጉዲ ሺኦቁኔ፤ ያኦሲያኦ ዒዚ ናንጋ፡ ፔኤም ዲማዴ ማኦሮ፡ ጫሪንጮይዳ ዓኦያ ሺኢጲያ ዔያቶኮ ዋይዘኔ፡፡

31

ካኦቲ ሂዘቂያሴ ያኦሲ ባኦዚ ማዶ ማዶ ዓካሴሢ

1 ቦንቾ ኬላ ጋፔሰካፓ ዒሰራዔኤሌ ዴራ ዪሁዳ ካታሞ ጉቤ ዓኦዲ ሹጮና ሜሌ ያኦዞ ማሊሲ ኮሾና ዳኦሶ ሜንሣኔ፤ ዓሽራ ጌይንታ ላኦሎ ያኦዞሎ ሱንያና ማዡና ባኮዋ ቲቂ ኬኤሬኔ፤ ዒንጎ ባኮ ዒንጎ ቤዘንታ ሜሌ ዓሳ ዚጊ ፔ ያኦዞ ካኦሽካ ቤዘዋ ዶይሲ ባይዘኔ፤ ዬያጉዲ ዪሁዳ፡ ቢኢኒያሜንታ ዔፕሬኤሜንታ ሚናኦሴንታ ዓጫ ዓኦ ሜሌ ያኦዞም ዚጎ ቤዘና ዒንጎ ባኮ ዒንጎ ቤዘዋ ሻሄኔ፤ ዬካፓ ዔያታ ናንጋ ቤዘ ቤዘ ማዒ ዴንዴኔ፡፡

2 ካኦቲ ሂዘቂያሴ ቁኤሶና ሌዊ ዓሳ ፔቱሞና ማዶ ማዶንዳ ዳምቦ ጊንሢ ጊኦጊሺኔ፤ ዬያ ፔቱሞና ማዶ ማዶንዳ ፔቱ ፔቱ ቁኤሶና ሌዊ ዓሶናኮ ዲማ ማዶ ዓኦኔ፤ ዬይ ማዶ፡- ሚቹ ዒንጎ ዒንጊያንታ

ፔቱሞና ዒንጎ ዒንጊያንታ ጌኤዡ ማኣርይዳ ማዲንታ ካኣዡ ዳሞቦ ኩንሢሲሢንታ ጌኤዡ ማኣርይዳ ሜሌ ዱማ ዱማ ፓቆና ቤዘይዳ ጋላቲሢና ሄርሺሢ ዓይኑሞ ዓይናዲሢንታኬ፤

3 ቢያ ዎዴ ጉቴና ዒባኒና ሚቹ ዒንጎ ዒንጊያሞ፥ ሃውሾ ኬሎ ዳሞቦሞ፥ ዓጊኖ ጃኤርንታ ያኦሲ ዎጋ ዓይሣ ሜሌ ቦንቾ ኬሎሞ ዒንጊንታ ዒንጊያኮ ካኣቲ ሂዚቂያሴ ፔ ቆሎ ማዔ ማራቶና ባኣቶናፓ ዒንጋኔ።

4 ቃሲ ሃሣ ቄኤሶና ለዊ ዓሶና ቢያ ኬላ ያኦሲኮ ዎጋ ማዶሞ ጋዓሢጉዲ ዔያታ ማዲንዳጉዲ ዔያቶሞ ዒንጋኒ ኮይሳ ባኮ ቢያ ዩሩሳላሜ ዳራ ዔኪ ሙካንዳንጉዲ ካኣቲ ዓሶ ዓይሢኔ፤

5 ዒሰራዔኤሌ ዓሳ ዩያ ካኣቲ ዓይሢያ ዋዋይዛያ ዔያቶኮ ሃኣኮንታ ዎይኖ ዑዡንታ ሪሚታፓ ኮሾ ዛይቶንታ ዔኤዘና ሜሌ ዔያቶኮ ጎዡይዳፓ ቢያ ቤርቶ ዒንጊሢ ማሂ ሸኢሸኔ፤ ዔያቶኮ ዓኣ ቆሎይዳፓ ቢያ ኮሺ ማዔ ባኮኮ ታጳይዳፓ ፔቱማ ኬሲ ኬሲ ዔያታ ዒንጊኔ፤

6 ዪሁዳ ካታማ ናንጋ ዳራ ቢያ ዔያቶኮ ባኣቶና ማራቶናኮ ታጳይዳፓ ፔቱ ኬሲ ኬሲ ዒንጊኔ፤ ዩያጉዲ ሃሣ ናንጊና ናንጋ ጎዳ ማዔ ዔያቶኮ ያኣዛሢሞ ዔያታ ዱማሴ ዒንጊያ ዔኪ ሙኪ ቡኩሴኔ፤

7 ዩያ ዔያታ ዒንጋ ባኮ ዔኪ ሙኮ ዓርቄሢ ማኣላ ቡሪንታ ሃይሣሳ ዓጊኖና ማዓዛ ጋፑዎ ያይዶ ዓጊኒ ኩሙሢ ዔኪ ሙኪ ሙኪ ቡኩሲ ላንካሳ ዓጊኖና ጋፑሴኔ፤

8 ዩካፓ ካኣቲ ሂዚቂያሴና ዒዛኮ ዶንዞ ማዔ ቢታንታ ዓኣ ዓሳ ሙኪ ዩያ ሚርጌ ዔኪ ሙኪ ቡኩሶና ባኮ ዛጌ ዎዶና ናንጊና ናንጋ ጎዳ ጋላቲኔ፤ ሃሣ ዒዛኮ ዒጊኖ ማዔ ዒሰራዔኤሌ ዓሶዋ ዔያታ ዓንጃ።

9 ካኣቲ ዳርይዳፓ ዒንጊንቲ ቡኩሶና ባኮ ዛሎ ቄኤሶና ለዊ ዓሶና ያኦጤኔ፤

10 ዒማና ሳዶቄ ዜርሢ ማዔ፥ ቄኤሶ ቢያኮ ዑዓሢ፥ ዓዛሪያሴ ካኣቲሞ፡- «ዳራ ታጳሢዳፓ ፔቱማ ናንጊና ናንጋ ጎዳ ማኣሪ ዔኪ ሙኮ ዓርቄማፓ ሃንጋ ሃሢ ኑኡሞ ጊዳ ሙኡዚ ዓኣኔ፤ ዩያ ሌለቱዋንቲ ኑኡሞ ጊዲያኣ ሚርጌ ዓቲኔ፤ ናንጊና ናንጋ ጎዳ ዳር ዓንጃሢር ሃሢ ሃያ ቢያ ሚርጌና ኑ ዳንቄ» ጌዔ።

11 ዩያሮ ካኣቲ ሂዚቂያሴ ጌኤዡ ማኣር ዓጫ ሜሂ ጌሦንዶ ማኣሪ ማዢንቲ፥

12 ዬይ ታጾይዳፓ ፔቲማ ዒንጎሣንታ ሜሌ ዒንጎ ባኮዋ ቢያ ዒኢካ ዛጊ ጌሣንታንዳጉዲ ዓይሣኔ፤ ሃሣ ጊንሣ ኮናኒያ ጎዖ ለዊ ዓሣ ሚሆ ጌሦ ማኣርኮ ሱኡጌ ማዒ ዶኦሪንታዛ ዒዛኮ ጌርሲ ሺምዒ ዒዛ ማኣዳያ ማዒ ዶኦሪንታኔ፤

13 ዔያቶኮ ዴማ ማዒ ማዳንዳጉዲ፡- ዪሂዔኤሌ፥ ዓዛዝያ፥ ናሃቲ፥ ዓሳሂሌ፥ ዪሪሞቲ፥ ዮዛባዴ፥ ዒለዒኤሌ፥ ዩሰማኪያ፥ ማሃቲና ቤናያ ጌይንታ ታጾ ለዊ ዓሲ ጌሣንታኔ። ዬያቶ ቢያ ዶኦሪሣ ካኣቲ ሂዘቂያሴና ቄኤሶኮ ዑፃሣ ማዒ ዓዛሪያሴናኬ፤

14 ጌኤዡ ማኣርኮ ዓባ ከሰካ ዛሎና ዓኣ ካሮ ካፓ ዓሶኮ ሱኡጋሣ ማዒ ለዊ ዓሣ ዩሚና ናኣዚ፥ ቆሬሜ ናንጊና ናንጋ ጎዳም ዓሳ ፔ ማሊሣና ናሽኪ ዒንጋ ዒንጊዖ ቢያ ዒካንዳጉዲና ፓቂ ፓቂ ጊሽካንዳጉዲ ሱኡጌ ማሂ ዒያታ ዶኦሪኔ።

15 ቄኤሳ ናንጋ ሜሌ ካታሞይዳ ቆሬሜም ጉሙርቂንታያ ማዒ ዒዛ ማኣዳዘንሣ፡- ዒዴኔ፥ ሚንያሚኔ፥ ዒዴሱ፥ ሺማዒያ፥ ዓማሪያንታ ሺካኒያ ጌይንታዘንሣኬ፤ ዒያታ ፔኤኮ ማዶ ጎይዖና ሙዖ ዒያቶኮ ዒጊና ማዒ ለዊ ዓሶም ፒዜና ጊሽካኔ።

16 ቃሲ ሃሣ ዴማ ዴማ ኬላ ኬላ ዒያቶም ማዶንጎ ጎዖና ባኮ ማዳኒ ጌኤዡ ማኣሪ ጌላ፥ ለዓ ሃይሦና ዬካፓ ዑሣ ማዒ ዓቲንቆም ማዶም ጌሦናሣጉዴያ ጉዴያ ዒያቶም ሄላ ባኮ ባኮ ዒንጋኔ፤

17 ቄኤሳ ማዳንዳጉዲ ጌይንታሣ ፔ ቶኦኮና ቶኦኮና ማዓዛ ለዓ ለማታሚና ዬካፓ ዑሣ ማዒ ለዊ ዓሶ ማዳ ጋዓንቲ ዒያታ ማዳ ማዶ ጎይዖጉዴያ ማዓኔ፤

18 ዬንሣ ቄኤሶና ለዊ ዓሶና ያኦሲም ዴማዴ ማዶ ማዳኒ ዋማ ዋዴና ማዒቶዋ ጊኢጌያ ማዓኒ ኮይሳሣሮ ዒያታ ፃኣፒንታኣና ዒያቶኮ ላኣላ፥ ናኣቶንታ ዒያቶኮ ዴማ ማዒ ዋርቃ ዓሶንታ ቢያ ዋላኬ፤

19 ዓኣርኔ ዜርዖም ጌይንቲ ካታሞና ካታሞኮ ኮይላ ቆልማ ሄንቃ ቤዘናይዳ ናንጋ ቄኤሶ ባኣኮይዳ ቄኤሶ ማኣር ዓሶና ለዊ ዓሶ ፃጶኮ ሱንፃ ፃኣፒንቲ ዓኣ ቤዘይዳ ፃኣፒንቲ ዓቲንቆም ቢያ ሙዖ ጊሽካንዳጉዲ ዶኦርና ዓሲ ዓኣኔ።

20 ካኣቲ ሂዘቂያሴ ዪሁዳ ዓጮ ጉቤይዳ ኮሺ ማዒ ባኣዚና ናንጊና ናንጋ ጎዳ ማዒ ዒዛኮ ያኣዛሣ ዋዛሳ ባኣዚ ቢያ ማዴኔ፤

21 ያኦሲኮ ጌኤዡ ማኣርይዳ ማዶሣታቲያ ሃሣ ያኦሲኮ ዋጎና ዓይሣያና ኩንሣኒ ዒ ማዴ ባካ ቢያ ጎኔ ዒናፓ ፔ ያኣዛሣም ጉሙርቂንታያ ማዒሣር ዒዛም ቢያ ባካ ጊኢኔ።

ዓሶኦሬ ዓሳ ዩሩሳላሜ ያላኒ ዚርቁሢ
(2ካአቶ. ማ 18:13-37፤ 19:14-19፤35-37፤ ዒሲ. 36:1-22፤
37:8-38)

1 ካኣቲ ሂዚቂያሴ ናንጊና ናንጋ ጎዳም ጉሙርቂንቲ ሚርጌ ባኣዚ ማዴሰካፓ ዓሶኦሬ ካኣቲ ሴናክሬሜ ዪሁዳ ዓጮ ያላኒ ኬስኬኔ፤ ዒማና ዒዚ ያሎና ባሻንዳሢ ጉሙርቂ ኬልቂ ዲርቆና ካታሞ ማንጋዖ ዒዛኮ ያሎ ዓሳ ካታሞኮ ኬኤሎ ዲሮ ዶይሲ ጌላንዳጉዲ ዓይሢ።

2 ሴናክሬሜ ዬያይዲ ዩሩሳላሜ ያላኒ ማሌሢ ካኣቲ ሂዚቂያሴ ዔራዖ፤

3-4 ዒዛና ዒዛኮ ዶንዞ ማዔ ቢታንታ ዓኣ ዓሳ ካታሜሎኮ ዙላ ዓኣ ዓልቃ ዋኣዖና ዳዋሢ ዋኣዖ ዔኪ ዋቶ ጎይዖ ዲርቂ ባይዛኒ ዘርቲኔ፤ ዬያሮ ዔያታ ዒዛ ማኣዴኔ፤ ዬያ ዔያታ ማዴሢ ዓሶኦሬ ዓሳ ዩሩሳላሜ ባንሢ ሙካዖ ፔቲታዖ ዋኣሢ ዴንቁዋጉዲ ጌይኬ፤ ዬያሮ ቢታንታ ዓኣ ዓሳ ሚርጌ ዴሬ ዔኪ ዴንዲ ዓልቃ ዋኣዖይዳፓ ዋኣሢ ዋቲዋጉዲ ማሂ ዬንሢ ዓልቃ ዋኣዖንሢ ቢያ ሲንሢ ባይዘኔ።

5 ካኣቲ ሂዚቂያሴ ዲሮ ዓካሲ ዑያይዳ ካፖንዶ ማኣሪ ሹቹና ማዢ ዲሮኮ ዙሎ ዛሎና ሜሌ ዲርሲ ኮሺሢና ካታሞ ካፖንዶ ቤዞ ዶዲሺኔ፤ ጊንሣ ሃሣ ሚና ቤርታ ዩሩሳላሜኮ ዓባ ኬሰካ ባንዖና ዓኣ ባኣሲንቲ ቤዞይዳ ኮሾና ካፖ ቤዞዋ ዓካሴኔ፤ ሚርጌ ዋርሢንታ ጊቲማንታኣ ኮሺኔ።

6 ካታሜሎይዳ ናንጋ ዓቲንቆ ቢያ ያሎ ዓሶ ሱኡጎ ቢታንቶኮ ዴማ ዔያታ ማዓንዳጉዲ ማሃዖ ካታሞ ዲሮኮ ጌሎ ካራ ዓኣ ፔጎ ጰኦካ ቡኩሴኔ፤ ዬካፓ፡-

7 «ዶዲ ዒኔና ኩሙሢ ማዑዋቲ፤ ዓሶኦሬ ካኣቲታቶዋ ዒዚ ዔኪ ያሊሳ ያሎ ዓሶዋ ዒጊጨፓቲ፤ ዒዛና ዋላ ዓኣ ዋልቃፓ ዑሣ ዓኣዴ ኑኡና ዋላ ዓኣ ዋልቃ ባሻያኬ፤

8 ዒዛና ዓኣ ዋልቃ ዓሲ ዋልቁኬ፤ ኑኡና ዋላ ማዒ ኑና ማኣዳሢና ኑ ዛሎ ያልታሢ ጋዓንቲ ናንጊና ናንጋ ጎዳ ማዔ ኑ ያኦዛሢኬ» ጌዒ ዶዲሻዛ፤ ዴራ ካኣቲ ዬያ ኬኤዜ ሃይሶና ዶዴኔ።

9 ዬካፓ ዳካ ዋርቃዖ ካኣቲ ሴናክሬሜና ያሎ ዓሶና ሃጊ ላኪሼ ጌይንታ ቤዛ ዓኣዖ ሂዚቂያሴና ዩሩሳላሜናይዳ ዓኣ ዪሁዳ ዴሮም፡-

10 «ታኣኒ ዓሶኦሬ ካኣቲ ሴናክሬሜ፤ ታኣኮ ያሎ ዓሶና ታ ማንጊሴ ዩሩሳላሜይዳ ዒንሢ ዴዒኒ ማሌሢ ዖና ዒንሢ ጉሙርቂታቶዋ ዔራኒ ታ ኮዓኔ፤

11 ሂዚቂያሴ፤ ናንጊና ናንጋ ጎዳ ማዔ ኑ ያኦዛሢ ዓሶኦሬ ዓሶ ኩጫፓ ኑና ዓውሳንዳኔ» ዒንሢሞ ጋዓኔ፤ ጋዓንቲ ዒዚ ሂዚ ጋዓ

ሃይሴና ዒንሢ ጌሺ ጌሺ ናዮና ዋእፆ ዴኤቦና ዒንሢ ኩዳንዳጉዲ ዒንሢ ዒ ማሃኒኬ፤

12 ሃያኮ ቤርታ ናንጊና ናንጋ ጎዳም ዲማዴ ዒዛ ካእሽኮ ቤዞና ዒዛም ዒንጎ ባኮ ዒንጎ ቤዞዋ ሻሄሢ፤ ሃሣ ዪሁዳና ዬሩሳላሜና ዴራፔቲ ያኦሲም ዒንጎ ቤሰካ ሌሊ ዑንጆ ጨቢሺ ጨቢሺ ናንጋንዳጉዲ ማሄሢያ ሂዚቂያሴኬ፤

13 ታኦኮ ቤርታኦ ዓዶንሢንታ ታናንታ ሜሌ ዓጮ ዴሮይዳኦ ማዴ ባኮ ዒንሢ ዒሩዋዓዳ? ዬያ ሜሌ ዴሮይዳፓ ፔኤኮ ዴሮ ዓሶኦሬ ካኦቲ ኩጫፓ ዳቂሺ ዓይሴይ ዒያቶኮ ካእሽኮ ያኦዛፓ ፔቲታዎ ዓኦ?

14 ታ ዓዶንሢ ባይዜ፤ ዬያ ዓጮኮ ካእሽኮ ያኦዛ ዳቂሺ ዓይሴ ዓጪ ዓኦ? ዓካሪ ዒንሢ ያኦዛሢ ታ ኩጫፓ ዒንሢ ዋይቲ ዓውሳኒ ዳንዳዓንዳይ?

15 ዬያሮ ሂዚቂያሴ ዒንሢ ዬያ ጌይ ጌሾፓ! ዳቢንቲ ባንሢያ ዒኪ ዓኦዶፓ! ፔቲታዎ ዒዛሲ ጉሙርቂፖቲ፤ ዓይጎሮ ጌዔቲ ዋኖ ዴሮዋ ማዎም ዒያታ ካእሽካ ሜሌ ያኦዛሢ ፔኤኮ ዴሮ ዓሶኦሬ ዓጮ ካኦቶ ኩጫፓ ዳቂሺይ ባኦሴ፤ ዓካሪ ሃሢ ዒንሢ ያኦዛሢያ ዒንሢ ዳቂሺንዲዋሢ ዒንሢም ዒርቲያ ማዎንጎ» ጋዓ ኪኢታ ዳኬ።፡

16 ዬያ ሌሊቱዋንቲ ዓሶኦሬ ዓሶኮ ቢታንታ ዓኦ ዓሳኦ ናንጊና ናንጋ ጎዳ ማዔ ያኦዛሢና ዒዛም ማዳ ዓይላሢ ሂዚቂያሴናይዳ ዬያፓ ባሼ ፑርታ ባኦዚ ጌዒ ጌሰቲ፤፤

17 ዬይ ዓሶኦሬ ካኦቲ ፃኦፔ ዋርቃታ፡- «ሜሌ ዴሮኮ ካእሽኮ ያኦዛ ታ ኩጫፓ ፔኤኮ ዴሮ ዓውሲባኦኬ፤ ሃሢ ሂዚቂያሴ ያኦዛሢ ፔ ዴሮ ታ ኩጫፓ ፔቲታዎ ዓውሳኒ ዳንዳዑዋኦኬ» ጋዓያ፤ ናንጊና ናንጋ ጎዳ ማዔ ዒሰራዒኤሌ ያኦዛሢ ቦሃያኬ፤

18 ዬያ ሄርሺንቶ ሃይሶ ዓሶኦሬ ዓሶኮ ቢታ ዒብሬ ዓሶ ሙኡቺና ኬኤሎ ዲያ ዑፃ ዓኦ ዬሩሳላሜ ዓሶም ዑኡዞ ዴጊዲ ኬኤዜ፤ ዬያ ዒያታ ማዴሢ ዴራ ዒጊጪ ካራ ባይዜም ዒያታ ካታም ሜታ ባኦያ ጌሊ ዓርቃኒ ማሊኬ።፡

19 ዓሲ ኩቺና ኮሺንቲ ሜሌ ዴራ ካእሽካ ያኦዛ ዑፃ ጫርቂ ዒያታ ጌሰታ ጎይያ ዬሩሳላሜ ያኦሲዳኦ ጌሰቲ።፡

20 ዬዛፓ ካኦቲ ሂዚቂያሴና ያኦሲ ማሊያ ኬኤዛ፤ ዓሞፆ ናኦዚ ዒሲያሴና ያኦሲ ሺኢቄ፤ ዒያቶ ማኦዳንዳጉዲ ዶዲሺ ዒዛ ባንሢ ዒያታ ዒላቲ፤፤

21 ናንጊና ናንጋ ጎዳ ዒማና ኪኢታንቻሢ ዳኪ ዓሶኦሬኮ ፖኦሊሶና ያሎ ዓሶዋ ዓይሢ ሱኡጎ ባይዜ፤ ዬያሮ ዓሶኦሬ ካኦቲ ቦርሲንቲ ፔ ዓጮ ማዔ፤ ዒኢካ ፔቲ ኬሊ ዒ ፔኤኮ ካእሽኮ ያኦዛ ዘጊ ካእሽኮ ቤዛ ዓኦንቲ ዒዛኮ ሾዖና ናኦታ ጨንቻ ዓፓሮና ዒዛ ዋዴ።፡

22 ናንጊና ናንጋ ጎዳ ይያይዱ ካኣቲ ሂዚቂያሴና ዩሩሳላሜ ዳሮ ዓሶኦሬ ካኣቲ ሴናክሪማና ሜሌ ዔያቶኮ ሞርኮ ኩጫፓ ኬሲ ዓውሴኔ፤ ዩካፓ ዔያቶኮ ዓሺኖ ማዔ ዳሮና ቢያ ዋላ ኮሺ ናንጊሴኔ፤

23 ሚርጌ ዳሬ ዒማና ናንጊና ናንጋ ጎዳም ዒንጎ ባኣዚ፤ ዩያጉዲ ሃሣ ካኣቲ ሂዚቂያሴማኣ ዒንጎ ባኣዚ ዔኪ ዩሩሳላሜ ሙኬኔ፤ ዩማፓ ዓርቃዖ ዳራ ቢያ ሂዚቂያሴ ዳጊዲ ቦንቺ ዛጊሢ ዓርቄ።

ሂዚቂያሴኮ ሃርጊንቲያና ዒዛኮ ሄርሺንቶና

(2ካኣቶ. ማ 2:1-3፤12-19፤ ዒሲ. 38:1-3፤ 39:1-8)

24 ዩኖ ዋዶና ካኣቲ ሂዚቂያሴ ሃርጊንቲ ሃይቃኒ ዑካዖ ናንጊና ናንጋ ጎዳ ሺኢቃዛ፤ ዒዚ ዒዛ ዓውሳንዳሢ ማላታና ዳዌኔ፤

25 ያዲ ማዔቲያ ሂዚቂያሴኮ ዒና ዖቶርሙሞና ኩማሢር ናንጊና ናንጋ ጎዳ ዒዛም ሚጨንቲ ማዴ ባኮር ቢያ ኮይሳሢጉዲ ጋላቲባኣሴ፤ ዩያር ዒዛንታ ዪሁዳና ዩሩሳላሜናይዳኣ ዶዲ ሜታ ሄሌኔ።

26 ጋዓንቲ ጋፒንፆዳ ሂዚቂያሴንታ ዩሩሳላሜ ዳራ ፔና ሹሌዒሲሢሢና ዔያታ ፔ ቶኦኮ ሂርኪዳሢር ሂዚቂያሴ ሃይቃንዳያ ሄላንዳኣና ናንጊና ናንጋ ጎዳ ፔ ዳሮ ሜታሲባኣሴ።

ሂዚቂያሴኮ ዖርጎቹሞና ዔርቲ ዓሲ ማዒያና

27 ካኣቲ ሂዚቂያሴ ሚርጌና ዖርጎጩኔ፤ ዳራኣ ቢያ ዒዛ ቦንቺኔ፤ ዒዚ ዒዛኮ ዋርቃ፤ ቢራ፥ ሚዛፆ ሹጫ፥ ሳውቃ ዴኤሻ፥ ጊቲሞንታ ማሌ ጴዲሞያ ማዔ ባኮ ጌሦንዶ ሜሄ ማኣሪያ ማገፍኔ፤

28 ቃሲ ሃሣ ዒዛኮ ሃኣኮና ዋይኖ ዑዠና ሪሚቶ ዛይቶና ጌሦንዶ ሜሄ ማኣሪንታ ባኣቶና ማራቶናኮዋ ባርታ ደርቄኔ፤

29 ዩያ ሌለቱሞንቲ ዖኦሲ ዒዛም ሚርጌ ባይና ማራይ ቆሎንታ፤ ዩያጉዲ ሃሣ ሜሌ ሚርጌ ባኣዚ ዒንጌሢር ሚርጌ ካታማ ዒ ማገፍኔ፤

30 ኬዶ ዛሎና ዓኣ ጊዮኔኮ ዓልቃ ዋኣፃ ኬሰካ ካር ቃዚ፤ ዋኣፃ ዳዎና ዔኪ፤ ዩሩሳላሜኮ ዓባ ጌላ ባንያና ሳዖ ዳሚና ዎታንዳጉዲ ማሄሢ ሂዚቂያሴኬ፤ ሂዚቂያሴ ማዴ ሜሌ ባካ ቢያ ዒዛም ጊኣጊኔ፤

31 ጋዓንቲ ዓጮይዳ ዖኦሲ ዋልቄና ማዲንታ ዓኮ ባኮ ዛሎ ዖኦጫንዳጉዲ ባብሎኔ ዓጮኮ ሱኡጋ ዳኬ ኪኢቶ ዓሳ ሙኪ ዓኣንቲ ናንጊና ናንጋ ጎዳ ሂዚቂያሴኮ ዒኖ ዛጋኒ ዒዛ ሃሼኔ።

ሂዚቂያሴ ካኣቱሞኮ ጋፒንፆ

(2ካኣቶ. ማ 20:20-21)

32 ካኣቲ ሂዚቂያሴ ማዴ ሜሌ ባካ ቢያ፥ ዖኦሲ ዛሎ ዒዛኮ ዓኣ ሚጨንታ ዖኦሲ ማሊያ ኬኤዛ ዓሞፄ ናኣዚ ዒሲያሴም ዖኦሲ ፔጋሲ

ዳዊ ባካ ፃኣፒንቴ ማፃኣፖና ዪሁዳና ዒስራዔኤል ዓሶናኮ ሃይሳ ፃኣፒንቴ ማፃኣፓ ፃኣፒንቴ ዓኣኔ።

³³ ሂዚቂያሴ ሃይቂ፥ ኬዶ ዛሎና ዳውቴ ናኣታ ዱኡታ ካኣቶ ዱኡፖ ቤዛ ዱኡቴኔ፤ ዒማና ዪሁዳንታ ዬሩሳላሜ ዴሮንታ ቢያ ዴኤፒ ቦንቸና ዒዛ ዱኡኬኔ፤ ዬካፓ ዒዛ ቤዛ ዒዛኮ ናኣዚ ሚናኣሴ ካኣታዴኔ።

33

ዪሁዳ ካኣቲ ሚናኣሴ
(2ካኣቶ. ማ 21:1-9)

¹ ሚናኣሴ ዪሁዳ ዓጮይዳ ካታዳኣና ለዓ ዒዛኮ ታጾ ላምዖኬ፤ ዒዚ ዬሩሳላሜይዳ ዴዒ ዶንጊታሚ ዶንጎ ለዔ ወይሄኔ፤

² ዒስራዔኤል ዓሳ ዔያቶም ዒንጎና ዓጮሎ ጌላ ወደና ናንጊና ናንጋ ጎዳ ዔያቶኮ ቤርታፓ ዳውሲ ኬሴ ሜሌ ዴሮኮ ቫኣካ ማዶ ማዳሢና ሚናኣሴ ማዶ ጎማ ናንጊና ናንጋ ጎዳ ዖዴሴኔ፤

³ ሚናኣሴ ዒዛኮ ዓዴ ሂዚቂያሴ ቫሄ፥ ሜሌ ዓሳ ዚጊ ካኣሽካ ቤዛ ጊንሣ ኮሼኔ፤ ዬይያኣ፡ ባዓኣሌ ጌይንታ ሜሌ ዖኦዞም ዒንጎ ቤዛንታ፤ ሃሣ ዓሼራ ጌይንታ ላኣሎ ዖኦዞሎኮዋ ማላቶ ዶቄኔ፤ ጊንሣ ጫሪንጮ ዦኦጋሢያ ዚጊ ካኣሽኬኔ፤

⁴ ናንጊና ናንጋ ጎዳ ናንጊና ካኣሽከንታንዳጉዲ ዓይሄ ቤዛ ጌይፃ፡ ዬሩሳላሜ ጌኤዦ ማኣሮይዳ ሜሌ ዓሳ ፔ ዖኦዞም ዒንጋ ቤሲ ኮሼኔ፤

⁵ ጌኤዦ ማኣሮኮ ዓሳ ቡካ ላምዖ ጰኦኮይዳ ጫሪንጮ ዦኦጋሢያም ዒንጎ ባኣዚ ዒንጎንዶ ቤሲ ኮሼኔ፤

⁶ ዬያ ሌሊቱዋንቴ ፔኤኮ ዓቲንቆ ናኣቶ ሄኖሜ ዶኦጮይዳ ሚቺ ዒንጎ ዒንጊሢ ማሂ ሸኢሸኔ፤ ዒ ፔኤሮ ጫኣቃያ ማርሻ ዓሲ ማዒ ዦዋና ጎርዋይቶና ኮራ ዦኦቻያ ማዔኔ፤ ዬያ ቢያና ዴኤፒ ጎሜ ማዳሢና ናንጊና ናንጋ ጎዳ ዒ ዳጋሴኔ።

⁷ ጌኤዦ ማኣሮ ጋሮይዳ ሜሌ ዖኦዞኮ ማላሢ ዶቄኔ፤ ዬይ ጌኤዦ ማኣሮ ናንጊና ናንጋ ጎዳ ዳውቴና ዒዛኮ ናኣዚ ሴሎሞኔናም፡ «ሃይ ዬሩሳላሜይዳ ዓኣ ጌኤዦ ማኣራ ታ ሱንፃ ዔኤለንታንዳጉዲ ታጾ ላምዖ ዒስራዔኤል ፃጾ ዓጫፓ ቢያ ታ ዶኦሬ ታኣም ዴማዴ ቤሲኬ፤

⁸ ዒስራዔኤል ዓሳ ሙሴ ዛሎና ታ ዔያቶ ዓይሄ ታኣኮ ዋጎንታ ዳምቦንታ ሃሣ ታኣኮ ዓይሄዖዋ ቢያ ዚጊ ዔያታ ካፔያታቶ

ዔያቶኮ ቤርታኣ ዓደንሢሞ ዒንገ ዓጫፓ ላሚ ታ ዔያቶ ዳውሲንቲ ኬሰካንዳጉዲ ማሂንዲዋሴ» ገዔሢኬ።

9 ዒሰራዔኤሌ ናኣታ ዔያቶም ዒንጎና ዓጮሎ ገላ ዋዶና ናንገና ናንጋ ጎዳ ዔያቶኮ ቤርታፓ ዳውሴ ዴራ ማዳሢዳፓ ባሽ ፑርታ ጎሜ ማዳንዳጉዲ ዪሁዳንታ ዬሩሳላሜንታ ዴር ሚናኣሴ ዔኪ ጎሜይዳ ገልዜኔ።

ሚናኣሴ ፔ ማዳ ጎሞ ዔሪ ያዬሢ

10 ናንገና ናንጋ ጎዳ ዒማና ሚናኣሴና ዴርናም ዶዲሺ ላቲ ኬኤዚማኣ ዔያታ ዋይዞ ዒፄኔ፤

11 ዬያር ናንገና ናንጋ ጎዳ ዓሶኦሬኮ ያሎ ዓሳ ዪሁዳ ኬሰኪ ያላንዳጉዲ ማሂኔ፤ ዬይ ያሎ ዓሳ ሚናኣሴ ዲዒ ዒዛኮ ሲኢዶይዳ ዓንገ ኪሬ ዓኣሢ፤ ካኒ ቢራታና ቱኪ ዔኪ ባብሎኔ ዓኣዴኔ።

12 ዒኢካ ሚናኣሴ ሜታዳዖ ፔ ቶኦኮ ሄርኪዲ ሸሌዑሞና ናንገና ናንጋ ጎዳ ማዔ ያኣዛሢ ባንሢ ማዔኔ፤ ያሕሲ ዒዛ ማኣዳንዳጉዲያኣ ዒ ሺኢቄኔ፤

13 ናንገና ናንጋ ጎዳ ሚናኣሴኮ ሺኢጲያ ዋይዚ፤ ዒ ላሚ ገንሣ ዬሩሳላሜ ማዒ ዋይሣንዳጉዲ ማሂኔ፤ ናንገና ናንጋ ጎዳ ጎኔ ያሕሲ ማዔሢ ዬያና ሚናኣሴ ዔሬኔ።

14 ዬካፓ ሚናኣሴ ዳውቲ ካታሞኮ ዓባ ኬሰካ ባንያና ዓኣ፤ ዙሎ ኬልቂ ዲርቆ ዲር ለካ ዳገዲ ያዶሲ ዲርቄኔ፤ ዬይ ኬኤሎ ዲራ ዶኦጫዳ ቤዞ፤ ገዮኔ ዋኣፃ ዓልቃሢኮ ዓባ ኬሰካ ዛሎና ገዒ ኬዶ ዛሎኮ ዴንዲ ሞላሢ ኬኤሎ ዲር ካር ሄላንዳኣና ማዓዛ ካታሞኮ ኮይላ ዓኣ ያፔሌ ገይንታ ቤዞዋ ገዲ ቃሳኔ፤ ዬያጉዲ ሃሣ ሚናኣሴ ኬልቂ ዲርቄ ዪሁዳኮ ፔቲ ፔቲ ካታሞም ቢያ ፔቲ ፔቲ ያሎ ዓሶ ዓይሣ ሱኡገ ገሢኔ።

15 ዒማና ሚናኣሴ ሜሌ ያኦዞና ዒዚ ፔኤር ገኤዢ ማኣርይዳ ደቄ ካኣሽኮ ባኮ ማላሢ ገኤዢ ማኣራፓ ሺኢሺ ኬሴኔ፤ ዬያጉዲ ሃሣ ዬሩሳላሜይዳ ገኤዢ ማኣር ማዢና ገሜርና ሜሌ ቤዞይዳ ዓኣ ያኦዞም ዒንጎ ቤዞ ቢያ ዶይሲ ባይዚ ዬያ ቢያ ዔኪ ካታሞኮ ዙላ ኬሲ ኬኤሬኔ፤

16 ናንገና ናንጋ ጎዳም ዒንገ ካኣሽኪንታ ቤዞ ገንሣ ዓኣሲ ዒኢካ ፔቱሞና ዒንጎ ዒንገያንታ ጋላታ ዒንገሢያ ሺኢሺኔ፤ ናንገና ናንጋ ጎዳ ማዔ ዒሰራዔኤሌ ያኣዛሢ ካኣሽካንዳጉዲ ዪሁዳ ዴር ጉቤ ዒ ዓይሢኔ።

17 ዎዚ ዒማና ዴራ ዴማ ዴማ ካኣሽኮ ቤዘይዳ ዒንጎ ባኮ
ዒንጊያ ሃሽባኣቶዎ ዔያታ ዒንጋ ባኮ ሸኢሻሢ ናንጊና ናንጋ ጎዳ
ማዔ ያኦሲም ሌሊኬ።

ሚናኣሴ ካኣቱዎኮ ጋፒንያ
(2ካኣቶ. ማ 21:17-18)

18 ሚናኣሴ ማዴ ሜሌ ባካ ቢያ፥ ዒ ፔኤኮ ያኦዛሢ ሸኢቄ
ሸኢጲፍ፥ ያኦሲ ማሊሢ ኬኤዛ ዓሳ ናንጊና ናንጋ ጎዳ ማዔ
ዒሰራዔኤሌ ያኦዛሢ ሱንያና ዒዛም ኬኤዜ ሃይሳኣ ዓቱዎ
ዒሰራዔኤሌ ካኣቶ ሃይሶ ማፃኣፓ ፃኣፒንቲ ዓኣኔ፤

19 ካኣቲ ሚናኣሴ ያኦሲ ሸኢቄ ሸኢጲፍ፥ ያኦሲ ዒዛኮ ሸኢጲፍ
ዎይዚ ማሄሢ፥ ዒዚ ፔ ዳቢንቶ ዔሪ ያያንዳሢኮ ቤርታ ዒ ማዴ
ጎማ ቢያ፥ ጌይፃ፥ ዒ ዴማ ዴማ ማዴ ፑርቶ ማዳ፥ ዒዚ ፔ ቶኦኪና
ኮሼ ሜሌ ዓሳ ካኣሽካ ቤዘንታ ዓሼራ ጌይንታ ላኣሎ ያኦዜሎ
ማላቶንታ፥ ዒዚ ካኣሽካ ሜሌ ባካ ቢያ ያኦሲ ማሊያ ኬኤዛ ዓሶ
ሃይሶ ማፃኣፓ ፃኣፒንቲ ዓኣኔ።

20 ጋፒንያ ዒዚ ሃይቂ፥ ዒዛኮ ካኣቱዎ ማኣሮ ዓጫ ዓኣ ቤዛ
ዴኡቴም ዒዛ ቤዛ ዒዛኮ ናኣዚ ዓሞኦኔ ካኣታዴኔ።

ዪሁዳ ካኣቲ ዓሞኦኔ
(2ካኣቶ. ማ 21:19-26)

21 ዓሞኦኔኮ ሌዓ ላማታሚ ላምዎ ማዓዛ ዪሁዳይዳ ካኣታዴኔ፤
ዒዚ ዬሩሳላሜይዳ ናንጊ ላምዎ ሌዔ ዎይሢኔ፤

22 ዒዚ ፔ ዓዶ ሚናኣሴጉዲ ጎሜ ማዲ ናንጊና ናንጋ ጎዳ ያዪኤኔ፤
ዒዛኮ ዓዴ ካኣሽካ ሜሌ ያኦዘ ካኣሽኬኔ፤ ዔያቶም ዒንጎ ባኣዚያ
ሸኢሸኔ።

23 ዓዴ ዒዛኮ ማዴ ጎይያ ቢያ ፔና ሂርኪዲ ሸሌዑሞና ናንጊና
ናንጋ ጎዳ ባንሢ ማዒያ ሃሽ ዓዶይዳፓ ባሼ ጎሜ ማዴኔ።

24 ዓሞኦኔኮ ደንዘ ማዔ፥ ቢታንታ ዓኣ ዓሳ ዒዛም ዎይዘ ዒፃ
ዒዛኮ ካኣቱዎ ማኣራ ዒዛ ዎዴኔ፤

25 ዪሁዳ ዴራ ዒማና ዓሞኦኔ ዎዴ ዓሶ ዎዴ ዒዛ ቤዛ ናኣዚ
ዒዛኮ ዒዮሲያሴ ካኣታሢኔ።

34

ዪሁዳ ካኣቲ ዒዮሲያሴ
(2ካኣቶ. ማ 22:1-2)

1 ዒዮሲያሴ ዪሁዳይዳ ካኣታዳ ዋደና ሌዓ ዒዛኮ ሳሊኬ፤ ዒዚ ዪሩሳላሜይዳ ናንጊ ሃይሂታሚ ፔቲ ሌዒ ዋይሄኔ።

2 ዒዮሲያሴ ናንጊና ናንጋ ጎዳ ዋዛሳ ባኣዚ ማዴኔ፤ ዒዛኮ ማዒ፤ ካኣቲ ዳውቲ ማዴ ኮዦ ማዴ ማላቶጉዲ ማዴ ያኦሲኮ ዋጎ ቢያ ዛጊ ካፔኔ።

ዒዮሲያሴ ሜሌ ያኦዞ ካኣሽኮ ቤዞ ባይዚሂ

3 ዒዮሲያሴ ካኣታዳ ሳላሳ ሌዖና ሃጊ ናይ ዓኣዖ ዒዛኮ ማዖ፤ ዳውቲ ያኦዞሂ ካኣሽከሂ ዓርቄኔ፤ ያይዶ ሌዒኮ ጊንፃፓ ሜሌ ዓሳ ፔ ያኦዞ ካኣሽካ ቤዞ፤ ዓሽራ ጌይንታ ላኣሎ ያኦዞሎ ማላቶንታ ሜሌ ካኣሽኮ ያኦዞ ቢያ ዪሩሳላሜና ዪሁዳናይዳፓ ባይዚሂ ዓርቄኔ፤

4 ባዓኣሌ ጌይንታ ያኦዞም ዒንጊ ካኣሽኮ ቤዞንታ ዬያ ኮራ ዓኣ ዑንጆ ጨቢሾ ቤዞዋ ዒ ዓይሄም ዒዛ ሳሳ ሜንሄኔ፤ ዓሽራ ጌይንታ ላኣሎ ያኦዞሎ ማላሂና ሜሌ ካኣሽኮ ያኦዞም ቢያ ሲላሊ ማዓንዳኣና ሜንሂ ጋኣጨኔ፤ ዬዛፓ ዬያ ሲላሎ ዒኪ ዬያ ካኣሽኮ ባኮም ሚቺ ዒንጎ ዒንጊያ ሺኢሻ ዓሶኮ ዱኡፖ ዑፃ ላኣሌኔ፤

5 ዒዮሲያሴ ሜሌ ዓሶ ቄኤሶኮ ሜጌያ ቢያ ዒያታ ዘጊ ካኣሽካ ሜሌ ያኦዞም ዒንጎ ባኮ ሺኢሾ ቤዞይዳ ሚቺኔ፤ ዬያ ቢያ ማዲያና ዪሁዳና ዪሩሳላሜና ላሚ ጊንሂ ዳምቦና ጌኤሽካንዳጉዲ ማሄኔ፤

6 ኬዶ ዛሎና ዴንዲ ኒፕታኣሌኤሜ ሄላንዳኣና ዓኣ ሚናኣሴ፤ ዒፕራኤሜና ሲዋኦኔና ዓጮይዳ ዓኣ ካታሞ፤ ዬያጉዲ ሃሃ ዒ ባይዚ ጉርዳይዳኣ ዒማ ጎይያ ማዴኔ።

7 ዬያ ሌሊቱዋንቲ ዒሰራዒኤሌ ዓጮ ጉቤይዳ ዓኣ ሜሌ ያኦዞም ዒንጎ ባኮ ሺኢሾ ቤዞንታ ዓሽራኮ ማላቶዋ ቢያ ሜንሄኔ፤ ካኣዦም ኮሾና ሜሌ ያኦዞም ሲላሊ ማዓንዳያ ሄላንዳኣና ጋኣጨኔ፤ ዑንጆ ጨቢሾ ቤዞንታ ሜሌ ያኦዞም ዒንጎ ባኮ ሺኢሾ ቤዞ ሜንሂ ኬኤሬኔ፤ ዬያይዳሰካፓ ዒ ዪሩሳላሜ ማዒ ዴንዴኔ።

ያኦሲኮ ዋጎ ማፃኣፓ ጴዳሂ

(2ካኣቶ. ማ 22:3-20)

8 ዒዮሲያሴ ካኣታዴንቲ ታጾ ሳላሳ ሌዖና ሜሌ ዓሶኮ ካኣዦ ባይዚ፤ ዓጮሎንታ ጌኤዦ ማኣሮንታ ጌኤሽሰካፓ ናንጊና ናንጋ ጎዳ ማዒ ያኦዞሂኮ ዬያ ጌኤዦ ማኣሮ ዓካሲ ኮሻንዳጉዲ ዓፃሊያ ናኣዚ ሳፓኔና ዪሩሳላሜ ካታሞ ዋይሃያ ማዒ ማዕሴያና ዒዮዓሃዜ ናኣዚ ካታሞኮ ፃኣፓሂ ዮዓሄና ዳኬኔ፤

9 ጌኤዡ ማኣሮ ካፓ ሌዊ ዓሳ ጌኤዡ ማኣሮይዳ ቡኩሴ ሚኢሻ ጉቤ ቁኤሶ ቢያሢኮ ዑፃሢ ሂልቂያም ዒንጊንቴኔ፤ ዬይ ሚኢሻ ቡኩሴንቴሢ ዒፕሬኤሚይዳ፤ ሚናኣሴና ሃንጎ ዒሰራዔኤሌ ዴሮና፤ ዬያጉዲ ሃሣ ዪሁዳይዳ፤ ቢኢኒያሚና ዬሩሳላሜ ዴሮና፤

10 ዬይ ሚኢሻ ጌኤዡ ማኣሮ ዓካሲ ኮሺሳ ሱኡጎ ማዔ ዬንሢ ሃይሣ ዓሶንሢም ዒንጊንቴኔ፤ ዔያታ ሃሣ ፔ ዛሎና ዬያ ሚኢሻ ማዶ ማዶ ዓሶና፤

11 ዪሁዳ ካኣታ ሻሂሴ ሹጮና ማዡና ማኣሮ ማዡም ማዓንዳ ሹቲና ሚሢና ሻንቃንዳጉዲ ሚፆና ማኣሮ ማዡ ዓሶና ሹጮና ማዡ ዓሶም ዒንጊኔ፤

12 ዬያ ማኣሮ ሚፆና ማዡ ዓሶና ሹጮና ማዡ ዓሳ ማዶ ጉሙርቂንታያ ማዒ ማዶኔ፤ ዬያ ዓሶ ዛጊ ማዶሻሢ ሜራሪ ቶኦካፓ፡- ሃሃቴና ያባዲያና፡ ቁዓቴ ቶኦካፓ ዛካሪያሴና ሜሹላሜ ጌይንታ ያይዶ ሌዊ ዓሲኬ፤ [ሌዊ ዓሳ ቢያ ዓይኑም ዓንጋሞና ዓይናዲኒ ኮሺ ዔራቶ ዓኣ ዓሲኬ፤]

13 ሃንጎ ሌዊ ዓሳ ሚሆ ኬዳዞንሢና ዲማ ዲማ ማዶም ጌሢንቴ ማዶ ዓሶኮ ሱኡጎና ዛጊ ማዶሻ ዓሶ ማዓዛ፡ ዛላ ጊንሣ ዔኤቢ ፃኣፓናና ጌኤዡ ማኣሮ ካፓናኬ፡፡

14 ዒንጊንቴ ሚኢሻ ጌሣ ማኣራፓ ኬሳ ዎድና ቁኤሶ ቢያኮ ዑፃሢ ሂልቂያ ናንጊና ናንጋ ጎዳ ሙሴም ዒንጌ ያሕሲኮ ዎጎ ማፃኣፖ ዴንቄኔ፤

15 ዒዚ ዒማና ዔቦ ፃኣፓ፡ ሳፓኔም፡- «ናንጊና ናንጋ ጎዳኮ ዎጎ ማፃኣፖ ሃይካ ጌኤዡ ማኣራ ታ ዴንቄኔ» ጌይ ማፃኣፓሢ ዒንጊኔ፤

16 ሳፓኔ ማፃኣፓሢ ዔካዖ ካኣቲም፡- «ኔ ኑና ዓይሢ ባኮ ቢያ ኑ ማዶኔ፤

17 ጌኤዡ ማኣሮይዳ ጌሢንቴ ዓኣ ሚኢሻ ኑ ዔኪ ማዶ ማዶ ዓሶና ዔያቶ ዛጊ ማዶሻ ዓሶም ዒንጊኔ» ጌዔኔ፤

18 ሃሣ ዒ ኬኤዛዎ፡- «ሂልቂያ ታኣም ዒንጌ ማፃኣፓሢ ሃይሻ ታ ኩጫ ዓኣኔ» ጌዒ፡ ማፃኣፓሢ ካኣቲም ናባቤኔ፡፡

19 ካኣቲ ዒማና ማፃኣፓ ዒዛም ናባቤንታሢ ዋይዛዖ ያዪ ፔኤኮ ማኣዓሢ ዳርዘኔ፤

20 ዬካፓ ሂልቂያም፡ ሳፓኔ ናኣዚ ዓሂቃም፡ ሚኪያሴ ናኣዚ ዓብደኔም፡ ካኣቶ ማኣሮኮ ፃኣፓሢ ሳፓኔና ካኣቲም ማዶያ ማዔ ዓሳያም ካኣቲ ሂዚ ጌዒ ዓይሢ፡-

21 «ዴዲጋፓ ታኣና፤ ዬያጉዲ ሃሣ ዒሰራዔኤሌና ዪሁዳይዳ ዓቲ ዓሶ ዛሎ ናንጊና ናንጋ ጎዳ ያኣጩዋቴ፤ ሃኖ ማፃኣፖይዳ ዓኣ ባኮዋ ዔሩዋቴ፤ ኑኡኮ ቤርታኣ ዓድንሢ ናንጊና ናንጋ ጎዳ ቃኣሎም

ዓይሢንቲያ ዒፃሢሮ፡ ሃይ ማፃኢፓ ዒያቶ ማድንጎ ጋዓ ባኮ ቢያ ዒያታ ማዲ ኩንሢባኣሢሮ ናንገና ናንጋ ጎዳኮ ዳጋ ኑ ገዳ ኬዴኔ።»

22 ዬያሮ ሂልቂያና ዬሮ ዓሶና ካኣቲ ዒያቶ ዓይሢ ጎይያ ዬሩሳላሜ ካታሞ ጉርዶኮ ፔቲዘይዳ ናንጋ ሁልዳ ጌይንታ ያኦሲ ማሊያ ኬኤዛዘ ኮራ ዴንዲ ዒያቶ ዳኮና ባኮ ዛሎ ያኦጮኔ፤ ዬሮ ያኦሲ ማሊያ ኬኤዛዘሎኮ ዓናሢ ሻሉሜ ጌይንታ ቲቐዋ ናይ፡ ሃርሃሴኮ ናኣዚ ናይ ማዓዛ ዒዚ ጌኤዢ ማኣሮይዳ ማይንቶ ማኣዓሢ ካፓ ሱኡጋሢከ፤ ዬንሢ ከኢቶና ሙኬ ዓሶንሢ ዬሮ ያኦሲ ማሊያ ኬኤዛዘሞ ዒሶ ፓይዲ ፓይዲ ኬኤዘኔ፤

23 ዒዛ ማሃያ፡ «ታ ባንሢ ዒንሢ ዳኬ ካኣቲ ኮይላ ማዒ ዓኣዲጋፓ፡ ናንገና ናንጋ ጎዳ ማዒ ዒሰራዒኤሌ ያኦሲ ጌዒ ባኮ ካኣቲሞ ኬኤዘዋቲ» ጌዒኔ።

24 ዬይ ያኦሲ ኬኤዘ ባካ፡ «ዪሁዳ ካኣቲሞ ናባቢንቲ ማፃኣፖይዳ ዓኣ ጋዳሞ ዬሩሳላሜና ዴሮናይዳ ቢያ ታ ሄሊሳንዳኔ፤

25 ዒያታ ታና ሃሺ ሜሌ ያኦዘሞ ዒንጎ ባኮ ሺኢሺኔ፤ ዬይ ዒያታ ማዴ ዳቢንታ ዳጎ ታኣኮ ዒቂሴኔ፤ ዓካሪ ዬሩሳላሜይዳ ታኣኮ ዒቂ ዳጋ ማዲንቲ ኩማንዳፓኣዓቲሞ ሸሚንዲዋሴ፤

26 ዬያሮ ታኣኒ ናንገና ናንጋ ጎዳ ማዒ ዒሰራዒኤሌ ያኦዛሢ ካኣቲሞ ሂዚ ጋዓኔ፡ ሕኤኒ ዬያ ማፃኣፖይዳ ኬኤዘንቲ ቃኣሎ ዋይዘኔ፤

27 ታኣኒ ዬሩሳላሜና ዒዛኮ ዴሮዋ ዋዲ ባይዛንዳቲያ ኔ ዋይዘ ዋዶና ኔ ቶኦኮ ሂርኪዲ ያዩ፡ ማኣዓሢ ኔኤኮ ዳርዘ፡ ዬኤኪ ጎሞ ኔኤኮ ኔ ቡኡፃኔ፤ ዬያሮ ታ ኔኤኮ ሺኢጲያ ዋይዘኔ።

28 ዓካሪ ኔኤኒ ሸሞፔና ዓኣንቲ ታኣኒ ዬሩሳላሜይዳ ሜቶ ሄሊሳዓከ፤ ኔ ኮሺና ሃይቃንዳጉዲ ታ ማሃንዳኔ፡ ጋዓኔ ጎዑዋቲ» ጋዓያከ።

ዬያሮ ዬንሢ ከኢቶ ዓሶንሢ ዬያ ከኢቶ ዋይዘ ካኣቲ ዒዮሲያሴ ባንሢ ማዒኔ።

ዒዮሲያሴ ናንገና ናንጋ ጎዳሞ ዓይሢንታኒ ጫኣቂሢ (2ካኣቶ. ማ 23:1-20)

29 ካኣቲ ዒዮሲያሴ ዪሁዳና ዬሩሳላሜናኮ ዒርቲ ጋርቾ ቢያ ዒኤሊሲ ፔቲይዳ ቡኩሴኔ፤

30 ዬያ ዒኤሊንቲ ዓሶንታ ካኣቲንታ ቄኤሶ፡ ለዊ ዓሶ፤ ሃንጎ ዴር ጌይፃ፡ ያርጎጮንታ ማንቆንታ ቢያ ዋላ ዒከ ጌኤዢ ማኣሪ ዓኣዴኔ፤ ዒኢካ ቤርታ ባይቂያ ጴዴ፡ ዴራ ናንገና ናንጋ ጎዳና ዋላ ጫኣቂ ማፃኣፖይዳ ፃኣፒንቲ ባኮ ጉቤ ዴሮሞ ካኣቲ ናባቤኔ፤

31 ካኣቲ ዒማና ቱርቱራሢ ኮይላ ዒቃዖ ጉቤ ዒኔና ማሊሢና ናንጊና ናንጋ ጎዳ ጎይዖ ሃንታኒና ዓይሢዖ ዒዛኮ ካፓኒ፤ ሃሣ ዬዖ ማፃኦፖይዳ ፃኣፒንቲ ጫኣቁሞ ዓይሢንቲ ኩንሣኒ ናንጊና ናንጋ ጎዳ ቤርታ ዬዖ ጫኣቁሞ ገንሣ ዓካሴ።

32 ዬካፓ ቢእኒያሜ ዴሮና ዬሩሳላሜ ሙኬ ሃንጎ ዓሳ ቢያ ያኦሲና ጫኣቁ ጫኣቁሞ ካፓንዳጉዲ ጫኣቁሴ፤ ዬያይዲ ዬሩሳላሜ ዴሩ ዒያቶኮ ቤርታኣ ዓድንሢኮ ያኦዛሢና ዎላ ዒያታ ጫኣቁ ጫኣቁማ ዒያቶ ማዳንዳጉዲ ጋዓ ባኮ ቢያ ዒያታ ማዲ ኩንሣ፤

33 ካኣቲ ዒዮሲያሴ ዒሰራዒኤሌ ዓጫ ዓኣ ሻኣካ፣ ካኣሽኮ ባኮ ቢያ ባይዚ ዴራ ናንጊና ናንጋ ጎዳ ማዒ ዒያቶኮ ያኦዛሢ ማዳንዳጉዲ ማሄ፤ ዬያ ሌሊቱዋንቲ ዒ ካኣታዲ ዓኣ ዎዶና ቢያ ዴራ ናንጊና ናንጋ ጎዳ ማዒ ዒያቶኮ ቤርታኣ ዓድንሢ ያኦዛሢ ሃሺ ሺኢከባኣሴ።

35

ዒዮሲያሴ ዑሣ ዓኣዲዖ ቦንቾ ኬሎ ቦንቼሢ
(2ካኣቶ. ማ 23:21-23)

1 ካኣቲ ዒዮሲያሴ ናንጊና ናንጋ ጎዳ ቦንቾም ዑሣ ዓኣዲዖ ቦንቾ ኬሎ ዬሩሳላሜይዳ ቦንቼ፤ ቤርታሳ ዓጊና ጄኤሬንቲ ታጳ ያይዳሳ ኬሎና ዴራ ዑሣ ዓኣዲዖ ቦንቾ ኬሎም ሹኮ ማራቶ ሹኬ፤

2 ቄኤሳ ጌኤዡ ማኣሮይዳ ማዳ ማዳ ኮይሳሢጉዲ ኬላ ኬላ ማዶም ካኣቲ ዒያቶ ዶዲሺ፤

3 ዬያጉዲ ሃሣ ፔና ናንጊና ናንጋ ጎዳም ዴማሴ፣ ዒሰራዒኤሌ ዓሶ ጉቤሢኮ ዒርዛዞንሢ ማዒ ሌዊ ዓሶም፡- «ናንጊና ናንጋ ጎዳም ዴማዴ ጫኣቁሞ ሳኣፂኖ ዳውቲ ናኣዚ ካኣቲ ሴሎሞን ማዢሴ ጌኤዡ ማኣሮይዳ ጌሡዋቲ፤ ሃካፓ ሴካ ዒንሢያ ናንጊና ናንጋ ጎዳ ማዒ ዒንሢኮ ያኦዛሢና ዒዛኮ ዴሮ ዒሰራዒኤሌ ዓሶም ማዳንዳኣፓዓቲም ጫኣቁሞ ሳኣፂኖ ዒንሢኮ ጌኤታ ኬዲ ፔቲ ቤዛፓ ማሌ ቤሲ ዒኪ ዓኣዳንዳያ ኮይሱዋሲ፤

4 ካኣቲ ዳውቲና ዒዛኮ ናኣዚ፣ ካኣቲ ሴሎሞን ዒንሢ ዓይሢ ጎይዖና ቶኦኮና ቶኦኮና ማዒ ጌኤዡ ማኣሮይዳ ዒንሢኮ ማዳ ቤዛ ቤዛ ዓርቁዋቲ፤

5 ዒንሢ ሌዊ ዓሳ፡- ፔቲ ፔቲ ዒሰራዒኤሌ ዓሶ ማኣሮ ማኣሮ ማኣዳኒ ፓቂንቲ ፓቂንቲ ናንጊና ናንጋ ጎዳም ዴማዴ ቤዛይዳ ዒንሢ ቤዛ ቤዛ ዒንሢ ጌኢሺሹዋቲ።

6 ዲንሢኮ ዲጊኖ ማዕ ዲሰራዔኤሌ ዓሶም ናንጊና ናንጋ ጎዳ ሙሴ ዛሎና ዲንጌ ዳምቦ ዛጊ ዔያታ ማዳንዳጉዲ ዋጎ ጎይያና ዲንሢ ቶኦኮ ጌኤሺጋፓ ዑሣ ዓኣዲያ ቦንቾ ኬሎም ሹኮ ማራቶ ሹኮዋቱ» ጌይ ዓይሣኔ።

7 ካኣቲ ዲዮሲያሴ ዲማና ዬኖ ዑሣ ዓኣዲያ ቦንቾ ኬሎይዳ ሙኬ ዓሳ ናንጊና ናንጋ ጎዳም ዲንጊሢ ማሂ ሺኢሻንዳጉዲ ፔ ቆሎ ማዕ ባኣቶይዳፓ፤ ዬያጉዲ ሃሣ ማራቶና ዋኣሮናፓ ሃይሢታሚ ሺያ ዓዴ ማራናይና ኮላናይና፤ ሃይሣ ሺያ ዚያ ጌማይ ዲንጌ፤

8 ካኣቲኮ ዶንዘ ማዕ ቢታንታ ዓኣ ዓሳ ናንጊና ናንጋ ጎዳም ዲንጎያ ማሂ ሺኢሾ ቆልሞ ዔያታ ፔ ሺኔና ናሽኪ ያኦሲ ጉሙርቃ ዓሶም፤ ቄኤሶና ለዊ ዓሶናም ዲንጌ፤ ሃሣ ጌኤዢ ማኣሮኮ ሱኡጎ ማዕ ቄኤሶ ቢያኮ ዑፃሢ ሂልቂያ፤ ዛካሪያሴንታ ዪሂዔኤሌንታ ዑሣ ዓኣዲያ ቦንቾ ኬሎና ዲንጎ ዲንጊሢ ማሂ ሺኢካንዳ ላምዖ ሺያና ላሆ ዪኤታ ማራናይ ዓዴና ኮላናይና፤ ሃይሣ ዪኤታ ዚያ ጌማይና ቄኤሶም ዲንጌ።

9 ለዊ ዓሶኮ ሱኡጎ ማዕ ኮናኒያና ዲዛኮ ጌርሲንሢ ሸማዒያና ኔታኒዔኤሌና፤ ዬያጉዲ ሃሣ ሃሻቢያ፤ ዪዒዔኤሌንታ ዮዛባዴንታ ለዊ ዓሳ ዑሣ ዓኣዲያ ቦንቾ ኬሎና ዲንጊያ ማሂ ሺኢሾንዶ ዶንጎ ሺያ ማራናይ ዓዴና ኮላናይና፤ ዬያጉዲ ሃሣ ዶንጎ ዪኤታ ዚያ ጌማይ ዲንጌ።

10 ዑሣ ዓኣዲያ ቦንቾ ኬሎም ማዕ ባካ ጊኢጊንቴሰካፓ ቄኤሶና ለዊ ዓሶና ካኣቲ ዓይሣ ጎይያ ዔያታ ፔኤኮ ማዳ ቤዘ ቤዘ ዓርቄ፤

11 ዑሣ ዓኣዲያ ቦንቾ ኬሎም ሹኪንቴ ማራናኣቶ ዓዴና ኮላናኣቶናኮ ዒልያ ለዊ ዓሳ ሹኪ ኬሳዛ፤ ቄኤሳ ሱጉያ ያኦሲም ዲንጎ ባኮ ሺኢሾሢ ዑፃ ፑጨ፤

12 ሚቹ ዲንጎ ዲንጊያም ዲንጊንቴ ቆልሞ ማኣሮ ዓሶና ዓሶና ፓቂንቴ ዴሮም ዔያታ ጊሸኬ፤ ዬያ ዔያታ ማዳሢ ሙሴ ዔርዜ ዋጎይዳ ዓይሢንቴ ጎይያና ዲንጎ ዲንጊያ ዓሳ ሺኢሻንዳጉዲ፤ ዚዮ ጌማቶም ዔያታ ዲማይዴ፤

13 ለዊ ዓሳ ዋጎ ዓይሢያ ጎይያና ዑሣ ዓኣዲያ ቦንቾ ኬሎና ዲንጊንታ ባኮ ታሚዳ ሚቹ፤ ያኦሲም ዴማዴ ዲንጊያ ዴኤፒ ዖቲና፤ ሳኣሚ ዖቲና ዳካ ዖቲናይዳ ካሢ ቤዘማና ዴሮም ጊሸኬ፤

14 ዬካፓ ለዊ ዓሳ ፔኤም፤ ሃሣ ዓኣሮኔ ዜርያ ማዕ ቄኤሶም ዑሣ ዓኣዲያ ቦንቾ ኬሎ ዲንጎ ዲንጊያ ጊኢጊሹ፤ ዓይጎር ጌዔቴ

ቄሌሳ መቼ ቢንጎ ቢንጊያና ማሎና ጉቤ ዴንዲ ሳዓ ዓማንዳኣና መቼ ቢንጋሢሮኬ፤

15 ሃካፓ ዴማ ሱንፃ ፃኣፒንቲ ዓኣ ለዊ ዓሢ ዓሳኣፔ ቶኦኪ ማዔ፥ ናንጊና ናንጋ ጎዳ ቦንቾም ዓይኑም ዓይናዳዘንሢ ካኣቲ ዳውቲ ዓይሢ ዳምቦ ጎይያ ዔያታ ማዳንዳጉዲ ጌሦና ቤዛ ዓኣኔ፤ ዩንሢያ፡- ዓሳኣፔ፥ ሄማኔንታ ካኣቲም ያኦሲ ማሊያ ኬኤዛ ዪዲታኔንታኬ፤ ሃንጎ ለዊ ዓሳ ዑሣ ዓኣዲያ ቦንቾ ኬሎም ቢንጎ ቢንጊያ ዔያቶም ጊኣጊሻያ ማዔሢሮ ጌኤዢ ማኣሮ ካሮ ካፓ ዓሳ ዔያታ ካፓ ቤዛፓ ሺኢኩዋሴ፤

16 ዩያይዲ ናንጊና ናንጋ ጎዳ ካኣሽኮ ካኣዢ ዳምቦና ዑሣ ዓኣዲያ ቦንቾ ኬሎና መቼ ቢንጎ ቢንጊያ ቢንጎ ቤዘይዳ ሺኢሺያ ማዳ ቢያ ካኣቲ ዒዮሲያሴ ዓይሢ ጎይያ ዩና ኬሎ ማዳንቲኔ፡፡

17 ዒማና ዒኢካ ዓኣ ዒሰራዔኤሌ ዴራ ቢያ ዑሣ ዓኣዲያ ቦንቾ ኬሎ ቦንቼኔ፤ ዩያጉዲ ሃሣ ላንካይ ኬሊ ላኦዳ ሙዒ ቦንቾ ቦንቾዋ ቦንቼኔ፤

18 ያኦሲ ማሊያ ኬኤዛ ሳሙዔኤሌ ዋዳፓ ዓርቃያ ዑሣ ዓኣዲያ ኬሊ ዩያይዲ ቦንቼንቲ ቤቁባኣሴ፤ ካኣቲ ዒዮሲያሴ፥ ቄሌሳ፥ ለዊ ዓሳ፥ ዒሰራዔኤሌንታ ዪሁዳንታ ዩሩሳላሚንታይዳ ናንጋ ዴሮና ዑሣ ዓኣዲያ ቦንቾ ኬሎ ቦንቼሢጉዲ ዩያኮ ቤርታ ካኣታዴ ካኣቶይዳ ቦንቼ ካኣቲ ፔቲታያ ባኣሴ፤

19 ዩይ ቦንቾ ኬላ ቦንቼንቲሢ ዒዮሲያሴ ካኣታዴንቲ ታጾ ሳላሳ ሌዖናኬ፡፡

ዒዮሲያሴ ካኣቱሞኮ ጋፖ (2ካኣቶ. ማ 23:28-30)

20 ካኣቲ ዒዮሲያሴ ጌኤዢ ማኣሮም ዩያ ቢያ ጊኣጊሺ ዴዲሼሰካፓ ጊብፄ ካኣቲ ኒካዑ ዔፕራፂሴ ዋሮ ዓጫ ዓኣ ካርካሚሼ ጌይንታ ቤዛ ያላኒ ያሎ ዓሶ ዔኪ ሙካዛ፥ ዒዮሲያሴ ዒማና ዔያቶ ያሊ ማሃኒ ኬሰኬኔ፤

21 ኒካዑ ጋዓንቲ ዒዮሲያሴም፡- «ዪሁዳ ካኣቲዮ! ኔኤና ታኣና ዑራሳንዳ ዓይጎ ባኣዚያ ባኣሴ! ታኣኒ ሙኬሢ ታኣኮ ሞርኮ ያላኒ ማዓንዳፓዓቲም ኔና ያላኒቱዋሴ፤ ታኣኒ ታ ሞርኮ ሩኡሪና ያላንዳጉዲ ያኦሲ ታና ዓይሢኔ፤ ያኦሲ ታኣና ዋላታሢሮ ኔ ታና ማኪባኣቲ ቃራኬ፤ ኔ ዒፃቶ ጋዓንቲ ያኦሲ ኔና ባይዛንዳኣኬ!» ጋዓ ኪኢታ ዒዮሲያሴም ዳኬኔ፤

22 ዲዮሲያሴ ጋዓንቲ ያሎ ዒዛና ዓርቃኒ ቱኡቲ ዒቄኔ፤ ያኦሲ ካኣቲ ኒካዑ ዛሎና ኬኤዜሢ ዒ ወይዛኒ ኮዒባኣሴ፤ ካኣቱሞ ማእዓሢ ላኣሚ ማሌ ዓሲ ማሊ ማጌዶይዳ ዓኣ ቦኦላ ያልታኒ ዓኣዴኔ።

23 ዒማና ያላ ኮሺ ዶዳዛ ካኣቲ ዲዮሲያሴ ገብፄ ዓጮ ፖኦሊሳ ሂኢሺና ዱኬኔ፤ ዬያሮ ዒዚ ፔኤኮ ያሎ ዓሶ ዓይሣ ዓሶሞ፡- «ታና ዱኪ ማእሳንሦናሢሮ ያሎ ቤዛፓ ታና ኬሱዋቲ!» ጌዔኔ፤

24 ዒያታ ዒማና ዒዛኮ ሳርጌሎ ያይታፓ ዒዛ ኬይሲ ዒኢካ ዓኣ ማሌ ሳርጌላ ያይታይዳ ዴይሢ ዬሩሳላሚ ዔኪ ዴንዳዛ ዒኢካ ዒ ሃይቄ፤ ካኣታ ዱኡታ ቤዛ ዱኡቲኔ፤ ዪሁዳና ዬሩሳላሚና ዴራ ቢያ ዒዛ ዬኤኬኔ።

25 ዒማና ያኦሲ ማሊያ ኬኤዛ ዔርሚያሴ ካኣቲ ዲዮሲያሴ ሚጪንቲ ቃዬኔ፤ ዬያሮ ቃዮ ቃያ ላኣሎንታ ዓቲንቆንታ ዲዮሲያሴ ማሊ ዬኤካ ወዶና ዬኖ ዔርሚያሴ ቃዬ ቃዬሎና ቃዬ ዬኤኪፃ ዒሰራዔኤሌ ዓጮይዳ ዔርቲያ ማዔኔ፤ ዬይ ቃያሢ ዒሰራዔኤሌ ዓሶኮ ማታሢ ዬኤፖ ማፃኣፖይዳ ፃኣፒንቲ ዓኣኔ።

26 ዲዮሲያሴ ማዴ ማሌ ባካ ቢያ ናንገና ናንጋ ጎዳ ዛሎ ዒዛኮ ዓኣ ዴኤፖ ናሹማ፤ ያኦሲ ዋጎሞ ዓኣ ዔኤዒ ዓይሢንቲፃ፡

27 ዓይፃፓ ጋፖ ሄላንዳኣና ዒዛ ሃይሳ ዓቲዋዎ ዒሰራዔኤሌና ዪሁዳናኮ ካኣቶ ሃይሶ ማፃኣፖይዳ ፃኣፒንቲ ዓኣኔ።

36

ዪሁዳ ካኣቲ ዒዮዓሃዜ
(2ካኣቶ. ማ 23:30-35)

1 ዪሁዳ ዓሳ ዲዮሲያሴ ናኣዚ ዒዮዓሃዜ ዶኦሪ ዓዶ ቤዛ ዬሩሳላሚይዳ ካኣታሢኔ፤

2 ዒዮዓሃዜ ዪሁዳይዳ ካኣታዳኣና ሌዓ ዒዛኮ ላማታሚ ሃይሦኬ፤ ዒዚ ዬሩሳላሚይዳ ናንገ ሃይሦ ዓገኒ ወይሢኔ።

3 ዬካፓ ገብፄ ካኣቲ ኒካዑ ዒዮዓሃዜ ካኣቱማፓ ኬይሲ ቱኡሲ ዓሲ ማሂ ዔኪ ዓኣዴኔ፤ ዒማና ዒዚ ዪሁዳ ዓሳ ሃይሦ ሺያና ያይዶ ፄኤታ ኪሎ ማዓ ቢራና ሃይሢታሚ ያይዶ ኪሎ ማዓ ዋርቄና ገኢራንዳጉዲ ገኢራ ዓጌኔ።

4 ገንሣ ኒካዑ ዒዮዓሃዜኮ ጌርሲ ዔሊያቂሜ ዪሁዳና ዬሩሳላሚናይዳ ካኣታሢ ሱንፆ ዒዛኮ ዒዮዓቂሜ ጌይ ላኣሚ ጌሢኔ፤ ጋዓንቲ ዒዮዓሃዜ ዒዚ ቱኡሲ ዓሲ ማሂ ገብፄ ዔኪ ዓኣዴኔ።

ዪሁዳ ካኣቲ ዒዮዓቄሜ
(2ካኣቶ. ማ 23:36—24:7)

5 ዒዮዓቄሜ ዪሁዳይዳ ካኣታዳኣና ሌዓ ዒዛኮ ላማታሚ ዶንካኬ፤ ዒዚ ዬሩሳላሜይዳ ናንጊ ታጾ ፔቲ ሌዔ ዎይሄኔ፤ ዒዚ ጎሜ ማዲ ናንጊና ናንጋ ጎዳ ማዔ ዒዛኮ ያኦዛሢ ያዪሴኔ፤

6 ዬካፓ ባብሎኔ ካኣቲ ናብካዳናያኦሬ ዪሁዳ ዓጮ ያላኒ ኬስኬኔ፤ ዒዚ ዒዮዓቄሜ ያሎና ባሺ ሞኦና ዓንጊፓ ኮሾና ካኒ ቢራታና ቱኪ ዔኪ ባብሎኔ ዓጮ ዓኣዴኔ።

7 ናብካዳናያኦሬ ዒማና ጌኤዢ ማኣሮኮ ሜሆ ቡሪ ዔኪ ባብሎኔይዳ ፔኤኮ ያኦዛ ካኣሽኮ ማኣራ ጌሄኔ፤

8 ካኣቲ ዒዮዓቄሜ ማዴ ባካ ቢያ፡ ሻኣካያ ማዔ ዒዛኮ ማዶና ዒ ማዴ ፑርቶ ባካ ቢያ፡ ዒስራዔኤሌና ዪሁዳ ካኣቶና ሃይሶ ማፃኣፓ ፃኣፒንቲ ዓኣኔ፤ ዒዛ ቤዛ ናኣዚ ዒዛኮ ዮዓከኔ ካኣታዴኔ።

ዪሁዳ ካኣቲ ዮዓከኔ
(2ካኣቶ. ማ 24:8-17)

9 ዮዓከኔ ዪሁዳይዳ ካኣታዳኣና ሌዓ ዒዛኮ ታጾ ሳሊኬ፤ ዒዚ ዬሩሳላሜይዳ ናንጊ ሃይሆ ዓጊኒና ታጾ ኬለና ዎይሄኔ፤ ዬካፓ ዒዚ ጎሜ ማዲ ናንጊና ናንጋ ጎዳ ያዪሴኔ።

10 ሲሎ ዓጊና ሄላዛ ካኣቲ ናብካዳናያኦሬ ዮዓከኔ ቱኤሲ ዓሲ ማሂ ባብሎኔ ዔኪ ዓኣዴኔ፤ ዬያ ሌሊቱዋንቲ ጌኤዢ ማኣሮኮዋ ሜሆ ቡሪ ዔኪ ዳንዴኔ፤ ዬካፓ ዮዓከኔኮ ጌርሲ * ሴዴቂያሴ ዪሁዳና ዬሩሳላሜናይዳ ዒ ካኣታሄኔ።

ዪሁዳ ካኣቲ ሴዴቂያሴ
(2ካኣቶ. ማ 24:18-20፤ ዔር. 52:1-3)

11 ሴዴቂያሴ ዪሁዳይዳ ካኣታዳኣና ሌዓ ዒዛኮ ላማታሚ ፔቲኬ፤ ዒዚ ዬሩሳላሜይዳ ናንጊ ታጾ ፔቲ ሌዔ ዎይሄኔ፤

12 ዒዚያ ጎሜ ማዲ ናንጊና ናንጋ ጎዳ ማዔ ዒዛኮ ያኦሲ ያዪሴኔ፤ ሃሣ ያኦሲ ማሊያ ኬኤዛ ዔርሚያሴማኣ ሼሌውሞና ዋይዚባኣሴ።

ዬሩሳላሜኮ ዶዒያ
(2ካኣቶ. ማ 25:1-21፤ ዔር. 52:3-11)

36:5 ዔር. 22:18-19፤ 26:1-6፤ 35:1-19። 36:6 ዔር. 25:1-38፤ 36:1-32፤ 45:1-5፤ ዳኣኔ. 1:1-2። * 36:10 ጌርሲ ጋዓዛ፡ ዔብሪ ዓሶ ሙኡጮ ማፃኣፓይዳ ዓዶ ዒሻ ሃንጎ ዓዶ ጌኤዚ ማዓኒያ ዳንዳዓያኬ። 36:10 ዔር. 22:24-30፤ 24:1-10፤ 29:1-2፤ 37:1፤ ሂዚ. 17:12-13። 36:11 ዔር. 27:1-22፤ 28:1-17።

13 ሴዴቂያሴ ዒዛሞ ጉሙርቂንታያ ማዓንዳጉዲ ያሕሲ ሱንያና ጫክቂሴ ካኣቲ ናብካዳናያኦሬሞ ዋይዞ ዒፄኔ፤ ዒዚ ጎሞ ቡኡፂ ናንጊና ናንጋ ጎዳ ማዔ ዒሰራዔኤሌ ያኦዛሢ ባንሢ ማዒያዋ ሃሺ ዒኖ ዶዲሺ ዒፄኔ።

14 ቃሲ ሃሢ ቄኤሶኮ ሱኡጎና ዳራኣ ሜሌ ያኦዞ ካኣሽኪያና ዒያቶኮ ኮይላ ዓኣ ሜሌ ዳሮኮ ፑርቶ ማዶ ማላቶ ዒኬኔ፤ ናንጊና ናንጋ ጎዳ ፔኤሮ ዴማሴ ጌኤዢ ማኣሮዋ ዒያታ ዒኢሴኔ፤

15 ያዲ ማዔቴያ ናንጊና ናንጋ ጎዳ ማዔ ዒያቶኮ ቤርታኣ ዓዶንሢ ያኦዛሢ ፔ ዳርና ፔኤኮ ጌኤዢ ማኣሮና ባይሲንታፓ ዓይሳኒ ኮዒሢሮ ዒያቶሞ ላቲ ኬኤዞሞ ዒዛ ማሊያ ኬኤዛ ዓሶ ዳኪያ ሃሺባኣሴ።

16 ዒሰራዔኤሌ ዳራ ጋዓንቴ ያሕሲኮ ኪኢቶ ዓሶይዳ ዓማሌኔ፤ ዒዛ ማሊያ ኬኤዛ ዓሶዋ ቦሂ፥ ናንጊና ናንጋ ጎዳኮ ቃኦሎዋ ዳካ ባኣዚ ማሄኔ፤ ዬያሮ ናንጊና ናንጋ ጎዳኮ ዳጋ ዳሮይዳ ኬዳኔ፤ ዒዛኮ ዴኤፖ ዳጋፓ ቶላኒ ዒያታ ዳንዳዒባኣሴ።

17 ዬያሮ ባብሎኔ ካኣቲ ዒያቶ ያላንዳጉዲ ናንጊና ናንጋ ጎዳ ማሄሞ፥ ጌኤዢ ማኣሮይዳ ዓኣ ዓሶዋ ዓይሱዋዎ ዪሁዳይዳ ዓኣ ዴጌ ዓቲንቆ ቢያ ጩንቻ ዓፓሮና ካኣቲ ዎዲ ኩርሴኔ፤ ናንጊና ናንጋ ጎዳ ናብካዳናያኦሬሞ ዓኣሢ ዒንጌሢሮ ዴንሢንታ ጋርቾ ዓቲንቆንታ ላኦሎንታ ያናኣ ዴማሱዋዎ ጉቤሢ ሚጨንቲሢ ባኣያና ዎዲ ባይዘኔ።

18 ዬያ ሌሊቱዋንቴ ካኣቲ ናብካዳናያኦሬ ጌኤዢ ማኣሮሲንታ ካኣቲንታ ካኣቲኮ ዶንዞ ማዔ ቢታንታ ዓኣ ዓሶኮ ቆሎ ቢያ ዲዒ ዒኪ ባብሎኔ ዴንዴኔ፤

19 ሃሢ ጌኤዢ ማኣሮ፥ ዬሩሳላሚ ካታሞ፥ ሹጮና ማዢና ካኣቱሞ ማኣሮንታ ዓኣ ቆሎዋ ሚቹኔ፤ ካታሞኮ ኬኤሎ ዲሮዋ ዶይሴኔ፤

20 ጩንቻ ዓፓሮና ዎዲንቱዋዎ ቶሊ ዓቲዞንሢ ቢያ ዲዒ ዒኪ ባብሎኔ ዒ ዓኣዴኔ፤ ዬይ ዒኪ ዓኣዶና ዓሳ፡- ፓርሴ ካኣቲ ካኣታዴ ዎዶ ሄላንዳኣና ዒኢካ ባብሎኔ ዓጫ ካራሚ ማዒ ካኣቲ ናብካዳናያኦሬና ዒዛኮ ዜርያናሞ ማዴኔ።

21 ናንጊና ናንጋ ጎዳ ፔ ማሊያ ኬኤዛ ዒርሚያሴ ዛሎና ቤርታ፡- «ዳራ ታኣኮ ሃውሻ ኬሎ ቦንቹባኣሢጉዴያ ዓጨላ ላንካይታሚ ለዒ ዓሲ ናንጉዋያ ጉሬ ዓጨ ማዒ ናንጋንዳሢሮ ሃውሻ ኬሊ ዒዛ ዴንቃንዳኔ» ጌይ ኬኤዜ ሎንሆ ቃኣላ ዬያይዲ ኩሜኔ።

ካኣቲ ቂኢሮሴ ዓይሁደ ዓሳ ዲዒንታፓ ማዓንዳጉዲ ዓይሄሄ
(ዒዘ. 1:1-4)

²² ናንጊና ናንጋ ጎዳ ፔ ማሊዖ ኬኤዛሂ፥ ዔርሚያሴ ዛሎና
ቤርታ ኬኤዜ ሎንሣ ቂኢሮሴ ፓርሴ ካኣቲ ማዒ ካኣታዴ ቤርታሳ
ሌዖና ኩሜኔ፤ ሃይካፓ ዴማ ዓኣ ዓይሂዖ ኬሳንዳጉዲና ዒ ካኣታዲ
ዎይሣ ዓፎ ቢያ ፃኣፒ ዳኪ ዴግ ጌዔ ዑኡሲና ዴሮሞ ናባቢንቲ
ኬኤዚንታንዳጉዲ ማሃኒ ናንጊና ናንጋ ጎዳ ቂኢሮሴ ዔቂሴኔ።

²³ ዬያ ፃኣፒንቲ ባኮኮ ማሊዖ፡- «ሃይ ፓርሴ ካኣቲ ቂኢሮሴ
ዓይሥሂኬ፤ ጩሪንፎ ጎዳ ማዔ ያኣዛሂ ዓፎ ቢያ ታና ዎይሃያ
ማሄኔ፤ ዪሁዳ ዓፎይዳ ዓኣ ዬሩሳላሜ ካታማ ዒዛ ቦንቾሞ ጌኤሺ
ማኣሪ ማኸንዳጉዲ ታና ዒ ዓይሄኔ፤ ዬያሮ ያኦሲ ዓሲ ማዔ ዓሳ
ዒንሂ ቢያ ዬሩሳላሜ ዓኣዲዎቲ፤ ናንጊና ናንጋ ጎዳ ማዔ ዒንሂኮ
ያኣዛሂ ዒንሂና ዎላ ማዖንጎ» ጋዓያኬ።

lxxxv

ጌሌዢ ማጥኢ

The Holy Bible in the Maale language of Ethiopia, using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማጥኢ

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 19 Dec 2025 from source files dated 13 May 2025

bbcfb90a-3ae3-5452-983d-6c4c02375929